

Kuyantika 1	Yobi
Kuyantika 2	
Kuyantika 3	
Kuyantika 4	
Kuyantika 5	
Kubasika	
Levi	



MIKANDA *ya* **Kubasika ti Levi**

Baleso 24 sambu na bana ti bajeune

Musoniki: *Maman Lorella Rouster. MCE*



Ministères pour Chaque Enfant



Le Projet Mwinda

Edition 2025

ecmafrica@ecmafrica.org

Merci sambu na bafoto na: www.freebibleimages.com/Sweet Publishing, /Bible Pathway Adventures, /Moody Publishers, /Bible Scenes

MIKANDA YA KUBASIKA TI LEVI**BALESO KELE NA MUKANDA YAI :****Dititi**

1. Bantu ya Israele kotaka na kimpika. Kubasika 1 :1-14.....	2
2. Farao sosaka kumanisa bana-bakala ya Israele, kansi fami ya Moize bumbaka yandi. Kubasika 1 :15—2 :1-10.....	5
3. Moize fwaka muntu na makasi, yo yina yandi tinaka. Kubasika 2 :11-22.....	9
4. Nzambi bingaka Moize ti tindaka yandi na Farao. Kubasika 2 :23-25, 3 :1-22, 4 :1-17....	13
5. Moize bondilaka Farao, kansi Farao pesaka Israele kaka kisalu ya kuluta. Kubasika 4 :18-31, 5 :1-23.....	17
6. Nzambi silaka kukatula bana ya Israele na kimpika. Kubasika 6 :1-30, 7 :1-9.....	21
7. Nzambi tindaka bampasi iya na Ezipte. Kubasika 7:14-- 8 :1-32.....	25
8. Nzambi tindaka bampasi ya nkaka na Ezipte. Kubasika 9 :1—10 :29.....	29
9. Bantu ya Israele yilamaka sambu na fete ya Paki. Kubasika 11 :1 & 12 :1-28.....	33
10. Mwana ya ntete fwaka na konso fami, ebuna Farao pusaka bo kubasika. Kubasika 12 :29-51.....	36
11. Nzambi twadisaka Israele na nzila ti kangulaka Nzadi ya Mbwaki sambu bo sabuka. Kubasika 13 :17-22--14 :1-31.....	39
12. Bantu ya Israele kumisaka Nzambi na bankunga. Kubasika 15 :1-21.....	43
13. Nzambi sadisaka bantu na Yandi diaka ti diaka. Kubasika 15 :22-27, kapu 16, tii na 17 :1-7.....	46
14. Jethro songaka Moize : Nge kele na mfunu ya lusadisu. Kubasika 17 :8-16, kapu 18.....	50
15. Nzambi pesaka bansiku kumi ya nene na Yandi kusonga beto mfunu ya Mvulusi Bansiku ya ke songa mpila kuvanda ti Nzambi--Kubasika kapu 19-20 :1-11.....	54
16. Nzambi pesaka bansiku kumi ya nene na Yandi kusonga beto mfunu ya Mvulusi Bansiku ya ke songa mpila kuvanda ti bantu ya nkaka—Kubasika 20 :12-17.....	58
17. Nzambi tendulaka bansiku na Yandi sambu na luzingu ya lumbu na lumbu. Kubasika somere bakapu 21-23, detayi kapu 24.....	61
18. Nzambi lombaka makabu kutunga ntenta ya bisambu ti songaka mutindu kusala yo. Kubasika kapu 25-31 somere.....	65
19. Bantu fwaka bansiku ya nene ya Nzambi. Kubasika kapu 32.....	76
20. Nzambi pesaka bansiku na Yandi diaka. Kubasika kapu 33-35.....	80
21. Bantu salaka nzo ya bisambu ya ntenta ti yantikaka kusamba kuna. Kubasika 36-40.....	83
22. Nzambi songaka Moize bansiku ya nkaka na kati ya nzo ya bisambu ya ntenta. (Somere ya mukanda ya Levi yonso, kapu 1-27).....	86
23. REVISIO YA MIKANDA YA KUBASIKA TI LEVI.....	90
24. KUBAKISA SIKA YA MIKANDA YAI NA KATI YA LUKANU YA BIBLE.....	92
Linya ya Ntangu.....	94
Bankunga beto sadila na mukand yai.....	97

Nki kele na kati ya baleso yai :

Beto ta longa mukanda ya Kubasika kuluta mukanda ya Levi, sambu yo kele na istware mingi ya kele mfunu na beto kubakisa. Mukanda ya Levi kele bansiku mingi ke tadila bansiku ya Bayuda. Yo yina, beto ke sala kaka leso mosi (Leso 22) na somere ya mukanda yina. Baleso zole ya nsuka kele revisio ya mikanda ya Kubasika ti Levi, ti kuyindula mikanda yai na kati ya lukanu ya Bible ya mvimba.

Leso 1. Bantu ya Israele kotaka na kimpika.

Kubasika 1 :1-14

I. Preparasio ya moniteur--

🕒 Kikuma ya Leso yai :

Konso ntangu bana ta tula ntima na Nzambi, ata na ntangu ya kiese to ya mpasi, sambu bo ta bakisa nde, ata beto mona bampasi mingi na luzingu yai, Nzambi kele ditadi na beto ya lenda nikana ve.

🗣️ Bankunga ya kwenda nzila mosi ti leso yai :

Landa, Mo' Ta Landa Nge, Mfumu
Mfumu Zaba Nzila na Mono
Mono me Sila Kulanda Yesu

❤️ Verse ya bana ta longuka :

Beno tula ntima na Mfumu Nzambi tii kuna, sambu Yandi kele dikunzi ya ngolo na beto ya mvu ya mvu. Yezaya 26 :4 (Na verse ya konso leso, bana ya fioti tuba kaka bandinga ya kele sulinye.)

II. Kusala Revisio –

⤴️ Beto me landa dezia mikanda ya Kuyantika ti ya Yobi. Na nsuka ya mukanda ya Kuyantika, fami ya Yozefi vandaka wapi ? (Na nsi ya Ezipte.)

⤴️ Nzambi pesaka tata ya Yozefi, Yakobi, zina Israele. Yakobi vandaka na bana ya bakala 12, yina kumaka batribu 12 ya Israel. Ntangu mukanda ya Kubasika ke yantika, Israele ikele na Ezipte.

III. Kulonga bana leso yai --

🕒 Kuyantika leso :

Na leso mosi ya ntama, beto me longuka muntu mosi ya vandaka ntete na luzingu ya mbote, kansi luzingu na yandi balulaka mutindu ya nkaka na kati ya lumbu mosi. Keti nge bambuka Yobi ?

Bantu ya Israele monaka kaka kiteso mosi. Na nsuka ya mukanda ya Kuyantika, bo vandaka kuzinga na kiese na Ezipte. Mfumu ya bo bingaka Farao, yandi vandaka kuyamba bo na kiese yonso. Kansi na nima, na mukanda ya Kubasika, beto ta mona kana kiese yina landaka, to kana ntangu ya mpasi kwisaka.

🏠 Developpement--Malongi ya nene ya leso yai na banti 4 :

1.1 Bantu kaka 70 ya fami ya Israele kwendaka na Ezipte.

📖 **Tangila bana :** Kubasika 1 :1 & 5a

1 Bana ya Yakobi, bayina kwendaka ti yandi na nsi ya Ezipte, konso muntu na fami na yandi, bo yai : (bo tangaka bazina ya bampangi 11 ya Yozefi).

5a Bantu yonso na fami ya Yakobi mpenza, bo vandaka bantu 70...

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

1.2. Na bandonga ya fami na nima, bana ya Israele kumaka mingi.

📖 **Tangila bana :** Kubasika 1 :6-7

6 Yozefi, bampangi na yandi, ti bantu yonso yina butukaka na ntangu na yandi, bo yonxo fwaka.

7 Kansi bantu ya Israele butaka bana mingi. Bo kumaka bantu mingi-mingi mpenza ti ngolo. Mpidina ntoto yonso fulukaka na bo.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

1.3. Farao ya mpa yina zabaka Yozefi ve wilaka bantu ya Israele boma. Yo yina, yandi sosaka kumanisa bo.

📖 **Tangila bana :** Kubasika 1 :8-10

8 Ntangu yai, bo tulaka mfumu ya mpa na nsi ya Ezipte, yina zabaka Yozefi ve.

9 Yandi tubaka na bantu na yandi nde :
« Atasio ! Bantu ya Israele me kuma mingi.
Bo me kuma mpi ngolo mingi kuluta beto.

10 *Ebuna beto baka mayele. Beto sosa mpila nde bo kuma diaka mingi-mingi ve. Mbala ya nkaka, kana bitumba kubwa, bo ta wakana na bambeni na beto sambu na kunwanisa beto...*

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

1.4. Yo yina, Farao yina kumisaka bantu ya Israele bampika ti pesaka bo kisalu ya ngolo.

📖 **Tangila bana :** Kubasika 1 :11-14,
Kuyantika 15 :13

11 *Yo yina, bantu ya Ezipte tulaka bakapita sambu na kupesa bantu ya Israele mpasi na bisalu ya kingolo-ngolo...*

12 *Kansi, ata bantu ya Ezipte vandaka kumonisa bantu ya Israele mpasi, bantu ya Israele vandaka kukuma kaka mingi-mingi. Bantu ya Ezipte yantikaka kutina bo boma.*

13-14 *Yo yina, bo pesaka bo bisalu ya ngolo-ngolo bonso bampika. Luzingu (na bo) kumaka mpasi mpenza sambu na kisalu ya nku bakapita yina vandaka kupesa bo . . .*

(Bana, bambuka mbikudulu ya Nzambi songaka tata na bo Abrahami bamvula kiteso ya bamvula 250 me luta :)

Kuyantika 15 :13 : *Ebuna Mfumu Nzambi songaka Abrahami nde : “Zaba mbote-mbote nde bana na nge ta vanda banzenza na nsi ya nkaka. Bo ta vanda bampika, bantu ta niokula bo bamvula 400.*

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

>|< **Kumanisa lesu :**

Luzingu ya beto bantu kele na bantangu ya kiese, ti bantangu ya mawa ti ya mpasi. Bana ya Israele

kotaka na Ezipte na kiese yonso, kansi na nima-nima, mfumu ya mpa telamaka ya zabaka Yozefi ve. Yandi kumisaka bantu ya Israele bampika. Luzingu na bo kumaka mpasi.

Na luzingu na beto bakristo mpi, ntangu ya kiese ti ya mpasi ikele. Bonso bana ya Israele, beto fweti nikana ve, ata luzingu ya kiese baluka, yo kuma luzingu ya mpasi. Nzambi na beto kele nkunzi ya lenda baluka ve. Beto tula Yandi ntima.

👤 **Devoir sambu na bakristo :**

Devoir mono ke pesa beno bakristo na mposo yai, yo yai : Konso lumbu, beno yindula mingi ve kana lumbu yina kele kiese to mpasi. Kaka tula ntima na Nzambi. Yindula Yandi, sosa Yandi, lomba zina na Yandi, ti pesa Yandi lukumu.

✝ **Kubinga bana ya zaba Yesu ntete ve :**

Kansi, mbala ya nkaka ntangu mono tubaka nde, “beno bakristo”, nge bakisaka ve mono zolaka kutuba nani. Mbala ya nkaka nge zaba ve kana nge kele mukristo. Mukristo kele muntu ya me balula ntima sambu na Yesu. Yandi me bika nzila ya kuzola masumu. Yandi me balula, me kota na nzila kulanda Yesu. Yandi me binga zina ya Nzambi kulomba ndolula ya masumu yonso na yandi. Kana nge zaba ve kana nge me zenga sambu na Yesu, nge lenda zenga kaka bubu yai sambu na Yandi. Kana nge zola beto kutendula nge kuluta, na nima ya ecodim, ntangu bantu ya nkaka basika, nge basika ve, kansi nge kwisa kuvanda awa. Beto ta kwisa kusadisa nge.

Kana ntangu lunga—

📖 **Kulonga Mikanda ya Bible –**

Mukanda ya ntete ya Bible nki ? (Kuyantika)
Mukanda ya zole ya Bible nki ? (Kubasika)
Beto binga yo Kubasika, sambu na luyantiku ya mukanda yai ya zole, bantu ya Israele kuma bampika na nsi ya Ezipte. Mukanda yai songa mutindu bantu ya Israele basikaka na kimpika yina.

=== NSUKA YA LESO 1 ===

Leso 1



***Beno
tula
ntima
na
Mfumu
Nzambi***

***tii kuna,
sambu Yandi kele dikunzi ya
ngolo na beto ya mvu na mvu.***

Yezaya 26 :4

Leso 2. Faro sosaka kumanisa bana-bakala ya Israele, kansi fami ya Moize bumbaka yandi.

Kubasika 1 :15—2 :1-10

I. **Preparasio ya moniteur**--[*Moniteur, yindula mambu yai na ntwala ntangu ya kulonga*].

🕒 Kikuma ya lesu yai :

Bana ta bakisa nde ata konso mambu bwila beto, Nzambi kele kaka ti beto sambu na kusadisa beto. Yo yina, bo ta tula Yandi ntima konso lumbu, ata na kiese, ata na mpasi.

🗨️ Bankunga ke kwenda nzila mosi ti lesu yai :

Landa, Mo' Ta Landa Nge, Mfumu
Mfumu Zaba Nzila na Mono
Mono me Sila Kulanda Yesu

❤️ Verse ya bana ta longuka :

[*Moniteur, songa bana verse na ntwala kulonga lesu. Bana tuba yo mbala 2, ebuna twadisa bo kuyimba yo mbala zole.*]

2 *Nzambi kele kisika ya beto ke tininaka.*

Yandi kele ngolo na beto.

Yandi kele awa sambu na kusadisa beto na ntangu ya mpasi.

3 *Yo yina, beto ta wa boma ve. . .*

Bankunga 46:2-3a

III. **Kusala revisio** --

† Nzambi me tuba ntama na tata ya bana ya Israele Abrahami, kusonga yandi nde bana na yandi ta vanda banzenza na nsi ya nkaka (Kuyantika 15 :13a). Yo salamaka na ntangu ya Yozefi bingaka fami na yandi kukwenda na Ezipte na ntangu ya nzala. Beto me mona mambu yai na nsuka ya mukanda ya Kuyantika.

† Ata Farao yambaka bo ntete, na nima ya ntangu, fami ya Yozefi yonso fwaka, ti Farao mpi fwaka. Farao ya mpa zabaka ve Yozefi. Yandi waka boma sambu bana ya Israele vandaka kukuma mingi. Yo yina, yandi kumisaka bo yonso bampika. Bambuka nde, Nzambi songaka na Abrahami nde *bana na yandi ta kuma bampika. Bantu ta niokula bo*

bamvula 400. Ntangu yai, mbikudulu yina mpi me salama na mpila Nzambi tubaka.

† Beto landa diaka histoire na Israele ntangu bo vandaka bampika, mpila bo monaka mpasi mingi na Ezipte.

III. **Kulonga Lesu Yai na Bana** --

👉 Kuyantika lesu :

Beto me bika bantu ya Israele na kimpika na Ezipte. Kimpika kiese to mpasi ? (Ee, yo kele mpasi kaka.) Kansi bambuka nki verse na beto me tuba sambu na Nzambi: *“Yandi kele awa sambu na kusadisa beto na ntangu ya mpasi. Yo yina, beto ta wa boma ve.”* Kana beto ke wa boma ve, kele ve sambu mpasi ke konda. Mpasi ikele. Beto ke na boma ve sambu beto zaba nde Nzambi ke sadisa beto.

🏠 **Developpement--Mambu ya nene ya lesu yai na banti 4 :**

2.1. Farao pesaka ordre ya mbi na bankento ya sadisaka bankento ya Israele kubuta: Bo fweti kufwa bana ya bakala yonso. Kansi bo landaka ordre ya Farao ve. Yo yina, Nzambi sakumunaka bana ya Israele nde bo kuma kuluta mingi ti ngolo diaka.

📖 **Tangila bana :** Kubasika 1 :15-16

15 *Ebuna mfumu ya Ezipte tubaka na bankento ya vandaka kubutisa bankento ya Ba-Ebreo (bantu ya Israele, nde :*

16 *“Ntangu beno ke butisa bankento ya Ba-Ebreo, kana mwana kele bakala, beno fweti kufwa yandi...”*

17 *Kansi bankento yina, bo salaka ve mpila Farao tubaka, sambu bo tinaka Nzambi boma...*

18 *Ntangu yai, Farao bingaka bankento yango nde : “Sambu na nki beno ke sala mutindu yai? Beno me fwa ve bana-babakala. »*

19 *Bo vutulaka nde : « Bankento ya Ba-Ebreo...kele ngolo. Bo ke butaka bo mosi na ntwala beto me kuma. »*

20-21 *Nzambi salaka mambote na bankento yina. Yandi pesaka bo bana mingi sambu bo*

zitisaka Yandi. Ebuna bantu ya Israele kumaka kaka mingi-mingi ti ngolo.

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

☞ Bana yimba ti kina sambu na kusonga nki me salama.

2.3. Farao pesaka ordre ya zole nde : bo fweti losa bana ya bakala yonso na nzadi ya Nile.

📖 **Tangila bana :** Kubasika 1 :22

22 Ntangu yina, Farao songaka bantu na yandi yonso nde : « Konso mwana-bakala yina me butuka na Ba-Ebreo, beno losa yandi na nzadi ya Nile... »

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

☞ Bana yimba ti kina sambu na kusonga nki me salama.

2.4. Moize butukaka, ebuna bibuti bumbaka yandi bangonda 3 na nzo. Na nima, bo bumbaka yandi na kitunga na kati ya matiti na lweka ya Nile.

📖 **Tangila bana :** Kubasika 2 :1-4

1 Muntu mosi ya dikanda ya Levi kwelaka nkento na dikanda mpi yo yina ya Levi. (Bambuka nde Levi mosi ya dikanda ya Israele.)

2 Nkento bakaka divumu. Yandi butaka mwana ya bakala...Yandi bumbaka yandi bandonga tatu.

3 Na nima, yandi monaka nde mpila ya kubumba yandi tii kuna vandaka ve. Yo yina, yandi bakaka kitunga, yandi pakulaka yo gudro, yandi tulaka mwana muna. Ebuna yandi kwendaka kutula yandi na kati ya matiti ya nda na lweka ya nzadi ya Nile.

4 Mwana yango, mbuta na yandi ya nkento kwendaka kutelama mwa-ntama, kumona nki mambu ta bwila mwana.

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

☞ Bana yimba ti kina sambu na kusonga nki me salama.

2.6. Mwana-nkento ya Farao monaka bebe ti wilaka yandi mawa. Yandi pesaka mama ya Moize nzila kusansa yandi tii yandi me yela ndambu. Na nima, Moize kwendaka kuzinga na nzo ya Farao.

📖 **Tangila bana :** Kubasika 2 :5-10

5 Farao vandaka na mwana ya nkento. Yandi kwisaka kukulumuka na nzadi sambu na kuyobila... Yandi monaka kitunga na kati ya matiti. Ebuna yandi tindaka mwana-nkento mosi nde : “Kwenda kubakila mono kitunga yina.” Yandi kwisaka kunata kitunga,

6 ebuna ntangu mwana ya mfumu kangulaka yo, yandi monaka mwana ya bakala ke dila. Yandi wilaka yandi mawa. Yandi tubaka nde : “Yai fweti vanda mwana ya Ba-Ebreo.”

7 Ntangu yai, mbuta ya mwana kwisaka kutubila yandi nde : « Pardo, keti nge zola mono kwenda kubingila nge nkento mosi ya Ba-Ebreo kupesa mwana yai mabele ? »

8 Mwana ya mfumu nde : «E, kwenda. » Ebuna (yandi) kwendaka kubinga mama na yandi.

9 Mwana ya mfumu tubaka na mama nde : « Baka mwana yai, sansila mono yandi. Ebuna mono ta futa nge. . .

10 Ntangu mwana me yela, mama nataka yandi na mwana ya mfumu. ...Yandi pesaka yandi zina Moize, sambu yandi tubaka nde : « Mono lokutaka yandi na masa. »

NB sambu na bana ya me yela :

Na nima na kati ya Bible, beto longuka bazina ya fami ya Moize : Tata na yandi Amrami, mama na yandi Yokebedi, mbuta ya bakala Aaroni, ti mbuta ya nkento Mariami. Beto ta mona bo diaka na baleso ke kwisa.

>|< Kumanisa lesa :

Farao me kuma makasi mingi, me zenga nde yandi fweti manisa bana ya Israele. Kansi tala mpila Nzambi sadisaka bo. Ntete, bana ya butisaka bana

na bo salaka na mpila ya mayele sambu bo kufwa bana ve.

Ya zole, Nzambi sadisaka fami ya Moize nde bo sansa yandi tii ntangu yandi me yela. Na nima, yandi kwendaka kuzinga na nzo ya mfumu ya zolaka kufwa yandi ! Muntu yai Moize kele mfunu mingi, sambu kele yandi ya Nzambi ta sadila kukatula bantu ya Israele na kimpika. Kansi beto ta mona yo na bamposo ke kwisa.

Ntangu ya mpasi sambu na bana ya Israele, kansi na kati na yo, Nzambi vandaka sikamosi ti bo, Nzambi vandaka mpi kusadisa bo mpila verse na beto ke tuba.

[Moniteur, ntangu yai, bana lenda yimba verse mbala zole diaka. Na nima, tula bana na bandambu zole : Bana ya Kinshasa ti Bana ya Lubumbashi. Bo sala kompetisio nani lenda tuba verse kuluta mbote.]

Devoir sambu na bakristo :

Beno bana ya me tula ntima ya Yesu dezia, devoir mono ke pesa beno mposo yai ikele kutula ntima na Nzambi konso lumbu, ata lumbu na nge vanda ya kiese to ya mpasi. Konso lumbu, kubinga zina ya Nzambi kulomba lusadisu na Yandi.

Kubinga bana ya zaba Yesu ntete ve :

Mbala ya nkaka nge zaba ve kana nge me tula ntima na Yesu. Bible ke songa beto nde beto lenda zaba mambu yina. Kuwa 1 Yoane 5 :13 : ‘Beno bayina me tulaka ntima na Mwana-Nzambi, mono ke sonikila beno mambu yai sambu beno kuzaba nde beno ke na moyo ya mvula na mvula.’ Nge

fweti vanda ve na keti-keti. Kana nge zola kuzaba ya kieleka, na nima ya ecodim me mana, ntangu bana ya nkaka basika, nge kubasika ve, kansi kwisa kuvanda awa na bakiti yai [*moniteur songa bakiti yina*]. Beto ta kwisa kusadisa nge sambu nge mpi lenda zaba nde nge me guluka.

Kana ntangu lunga—

Kulonga Mikanda ya Bible –

Mikanda ya Kuwakana ya Ntama kele 39

Mikanda ya Kuwakana ya Mpa kele 27

Bible yonso kele mikanda 66

Na mikanda yai, Ndinga ya Nzambi me lunga. Beto ke yika mikanda ya nkaka diaka ve.

Yonso ke tuba lukanu ya Nzambi sambu na kugulusa bantu ya makanda yonso na Mwana na Yandi Yesu Kristo.

Mikanda 5 ya ntete ya Bible beto binga bo, “Mikanda ya Moize.”

[*Moniteur, twadisa bana kuyimba nkunga, “Mikanda ya Moize.”*]

[*Moniteur, twadisa bana kutuba mikanda 5 ya Moize :*] Kuyantika, Kubasika, Levi, Kutanga, Kulonga.

=== NSUKA YA LESO 2 ===



Fami ya Moize bumbaka yandi sambu Farao kufwa yandi ve.

Leso 2

***Nzambi
kele
kisika ya
beto ke
tininaka,***

Yandi kele ngolo na beto.

***Yandi kele awa sambu na
kusadisa beto na ntangu ya
mpasi.***

***Yo yina, beto ta wa boma
ve....***

Bankunga 46:2-3a

Leso 3. Moize fwaka muntu na makasi, yo yina yandi tinaka.

Kubasika 2 :11-22

I. Preparasio ya moniteur --

🕒 Kikuma ya lesa yai :

Na nsuka ya lesa yai, bana ta bakisa ti ndima nde beto fweti sadila Nzambi na mpila ya Yandi me songa beto, na mpila ya beto mosi ve.

🗨️ Bankunga ke kwenda nzila mosi ti lesa yai :

Mfumu Zaba Nzila na Mono
Mo' Ta Kwisa na Nzambi na Lulendo Ve
Tesa Mono

❤ Verse ya bana ta longuka :

Kudiyindula ve nde nge kele mayele. Tina Mfumu Nzambi boma, ti bika kusala mbi.
Bingana 3 :7

II. Kusala revisio --

Na mposo me luta, beto monaka nde :

- † Mfumu ya nene Farao zolaka kusala nki mambu ya mbi ? (Kufwa bana ya bakala yonso ya bantu ya Israele)
- † Nani me butuka? (Mwana Moize)
- † Nani sansaka Moise ntangu yandi vandaka fioti ? (Mama na yandi Yokebedi, sambu mwana-nkento ya Farao wilaka mwana Moize mawa)
- † Nani sansaka Moize na jeunesse na yandi ? (Mwana-nkento ya Farao)

III. Kulonga lesa yai --

🕒 Kuyantika lesa :

Beto me bika Moize wapi ? (Ee, yandi me yela, ebuna yandi me kuma mwana ya mwana-nkento ya Farao.)

Moize yelaka na nzo ya Farao na jeunesse yonso na yandi tii ntangu ya yandi me kuma mbuta.

Kana muntu ke zinga na nzo ya mfumu ya nene, luzingu na yandi ta vanda nki mutindu? Madia nki

mutindu ? Nzo-nkanda nki mutindu ? Bilele nki mutindu ? (Bana pesa mvutu.)

📖 **Developpement--Mambu ya nene ya lesa yai na banti 4 :**

3.1 Ata Moize yelaka na nzo ya Farao ya Ezipte, yandi waka kimpangi ti bantu ya Israele.

📖 **Tangila bana :** Kubasika 2 :11

11 Kilumbu mosi, ntangu Moize me kuma mbuta, yandi kwendaka kutala bampangi na yandi Ba-Ebreo. Yandi monaka nde bo vandaka kumona mpasi na bisalu ya kingolo-ngolo. Yandi monaka mpi muntu mosi ya Ezipte kufwa mpangi na yandi Mu-Ebreo.

? Yula bana bakestio ke tadila baverse yai.

🗨️ Bana bageste to mwa-seneti ya ke songa nki me salama.

🗨️ Bana yimba ti kina sambu na kusonga nki me salama.

3.2 Moize monaka mpasi ti makasi sambu na bampasi ya bampangi na yandi. Yo yina, yandi fwaka muntu ya Ezipte yina vandaka kupesa bo mpasi. Yandi banzaka nde muntu zabaka ve, kansi bantu mingi zabaka, ata Farao mpi.

📖 **Tangila bana :** Kubasika 2 :12-15a

12 Yandi talaka ndambu na ndambu. Yandi monaka muntu ve, ebuna yandi fwaka muntu ya Ezipte. Yandi bumbaka yandi na kati ya zelo.

[Moniteur, awa kele sika ya mbote kusonga bana verse ya kulunguka, Bingana 3:7. Bo lenda tanga yo na carte to nge tangila bo fraz na fraz, ti bo tuba na nima na nge. Bo ta tuba yo mbala tatu, na nima nge ta landa lesa diaka.]

13 Na kilumbu landaka, yandi vutukaka na kutala diaka bampangi na yandi. Yandi monaka Ba-Ebreo zole ke nwana. Yandi tubaka na muntu yina... nde : « Sambu na nki nge ke bula mpangi na nge ? »

14 Muntu yina tubaka nde : « Nani muntu tulaka nge mfumu kusambisa beto ? Nge zola fwa mono mutindu nge fwaka muntu ya Ezipte ? » Moize waka boma. Yandi nde : « A, bantu me zaba mambu ya mono salaka. »

15a *Ntangu mfumu ya Ezipte waka mambu yina, yandi sosaka mpila ya kufwa Moize . . .*

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

3.3 Na boma, Moize tinaka na nsi ya Madiani, sika bantu yambaka yandi.

📖 **Tangila bana :** Kubasika 2 :15-21

15b . . .kansi Moize tinaka. Yandi kwendaka kuzinga na nsi ya Madiani.

16 *Nganga-Nzambi na nsi yina vandaka na bana-bankento nsambwadi. Kilumbu mosi, ntangu Moize vandaka me vanda penepene na bidulu mosi ya masa, bana-bankento yango kwisaka kubaka masa...*

17 *Kansi bamvungi ya nkaka, bo kwisaka kukula bana-bankento yango. Ntangu Moize monaka mpidina, yandi kwendaka kusadisa bo. Yandi pesaka bambisi na bo masa.*

18 *Ntangu bo vutukaka na tata na bo Yetro, yandi yulaka bo nde : “Nki mutindu bubu yai beno me kwisa kuvutuka nswalu mpidina ?*

19 *Bo vutulaka nde : “Muntu mosi ya Ezipte me sadisa beto. Yandi me katula beto na maboko ya bamvungi. Yandi me pesa mpi bambisi na beto masa.”*

20 *Tata na bo nde :..Beno kwenda kubinga yandi, yandi kwisa kudia na beto.”*

21 *Moize monaka nde kele mbote kubikala kuna. Ebuna Yetro pesaka yandi nkento, mwana na yandi zina ya Sefora.*

NB kutendula bana : Madiani bubuyai kele parti ya nsi beto binga Arabie Saudique. Bantu kuna vandaka bampangi ya bantu ya Israele. Na nima nkento ya Abrahami Sara fwaka, Abrahami kwelaka diaka nkento zina ya Ketura (Kuyantika 25 :2). Bo butaka bana, na kati na bo Madiani. Sika ya bana ya Madiani zingaka, bo bingaka yo nsi ya Madiani.

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

3.4 Moize ti Sefora butaka mwana Gershomi.

📖 **Tangila bana :** Kubasika 2 :22

22 *Sefora butaka mwana ya bakala. Moize pesaka mwana zina Gershomi...*

>|< Kumanisa lesu :

Moize zolaka kusadisa bampangi na yandi Israele na mpasi ya bo vandaka kumona na Ezipte. Kansi yandi lombaka ve Nzambi kusonga yandi nki mutindu kusala yo. Yandi salaka na mabanza na yandi mosi, na makasi na yandi mosi.

Bantu zabaka yo. Yo yina, mfumu ya nene Farao zolaka kufwa yandi. Na boma, Moize tinaka mwan-tama, na nsi ya nkaka ya bampangi distant. Yandi kwendaka kuzinga na nsi ya Madiani. Kansi ata kuna, Nzambi vandaka kusadisa yandi, ti kuyidika yandi sambu, kana ntangu ya Nzambi lunga, Moize kukatula bampangi na yandi na kimpika. Ntangu yina, yandi ta sala yo na mpila ya Nzambi ta songa yandi.

👤 **Bana yimba ti kina :**

♥ **Verse ya Kulonguka :** [Moniteur, longa verse ya kulonguka, Bingana 3 :7 ntangu yai. Bana lenda tuba yo na bandambu mutindu na mutindu. Na nsuka, bana tatu tesa kutuba yo bo mosi, ti bana ya nkaka vanda bazuzi kana bo me tuba yonso mbote.]

✚ **Devoir sambu na bakristo :**

Keti nge me sala mambu mosi ya nge monaka mfunu ti mbote, kansi nge sosaka Nzambi ve sambu na kuzaba nki mutindu nge fweti sala yo ? Kusala na mpila na beto mosi, yo ke sadisa ve. Kusala na mpila ya Nzambi songa beto, yo ta sadisa mbote.

Beno ya kele bakristo, beno ya me yamba Yesu Kristo bonso Mvulusi na beno, devoir mono ke pesa beno, yo yai : Na mposo yai ya mvimba, lomba Nzambi kutwadisa nge na yonso nge sala.

✚ **Kubinga bana ya zaba Yesu ntete ve :**

Kansi, mbala ya nkaka nge me yamba Yesu ntete ve na luzingu na nge. Nge lenda landa nzila na Yandi

ve, kana nge me kuma mwana na Yandi ntete ve. Yesu kele konso ntangu kuingila nge. Yandi me sila nde, « Konso muntu yina ta kwisa na Mono, Mono ta buya yandi ve » (Yoane 6 :37). Kwisa na Yesu bubuyai na ntima na nge yonso. Yandi ta buya nge ve. Yandi ta yamba nge bonso mwana na Yandi ti nduku na Yandi.

Kana nge ke sosa lusadisu kuyamba Yesu, na nima ya ecodim, kubasika ve ti bana ya nkaka, kansi kwisa vanda na zulu ya bakiti yai awa [*moniteur, songa wapi.*] Beto ta vanda na kiese kusadisa nge kuyamba Yandi.

Kana ntangu lunga—

📖 Longa mikanda ya Bible --

Bana yimba « Mikanda ya Moize ». Moize sonikaka mikanda yai tanu, ti yandi kele muntu ya nene na kati na yo yonso.

Bana tuba Mikanda 5 ya Moize. Pesa bo devoir kulonguka kutuba yonso, bo mosi. Songa bo index ya mikanda na luyantiku ya Bible ya Kituba, ti songa bo mikanda 5 ya Moize kele wapi na kati na yo.

=== NSUKA YA LESO 3 ===

Leso 3



Moize fwaka muntu ya Ezipte na makasi. Yo yina, na boma yandi tinaka.

Kudiyindula ve nde nge kele mayele.

Tina Mfumu Nzambi boma, ti bika kusala mbi.

Bingana 3 :7

Leso 4. Nzambi bingaka Moize ti tindaka yandi na Farao.

Kubasika 2 :23-25, 3 :1-22, 4 :1-17

I. Preparasio ya moniteur –

🎯 Kikuma ya lesu :

Bu Nzambi binga, bana ta ndima, sambu bo bakisa nde Yandi kele na ksalu sambu na konso muntu.

❤ Verse ya kulonguka :

Kubasika 3 :10-12a (Nzambi na Moize :)

10 Ebuna ntangu yai, kwenda! Mono ke tinda nge na Farao sambu nge basisa bantu na Mono yai . . .

11-12a Moize tubaka na Nzambi nde : « Mono kele nani na kutelama na meso ya mfumu ya nene ya Ezipte ? » 12 Nzambi tubaka nde : “Mono ta vanda na nge... »

🗨 Bankunga ya kwenda nzila mosi ti lesu yai :

Ee, Mfumu, ee

Kwenda na Yesu

Mfumu Zaba Nzila na Mono

Yidika bima ya ta vanda mfunu sambu na lesu yai :

Bana ta yantika kulonguka mikanda 5 ya Moize. Yo yina, sala papie mosi ya kele na zina ya konso mwana na ntwala ntangu ya ecodim. Konso mwana ya longuka mikanda yina, sonika design ya 😊 na zina na yandi. Nata papie yina ti marker ya kusunika 😊 na ecodim.

II. Kusala Revisio --

👆 Beto me bika Moize wapi ?

(Na nsi ya Madiani)

👆 Sambu na nki yandi kwendaka kuna ?

(Sambu na kutina mfumu ya nene ya Ezipte ya bo bingaka Farao)

👆 Sambu na nki Farao sosaka kukanga Moize ?

(Sambu yandi waka mutindu Moize fwaka muntu ya Ezipte yina pesaka bantu ya Israele mpasi.)

👆 Nki Moize salaka na nsi ya Madiani ?

(Bamvutu possible :

--Yandi sadisaka bankento kupesa masa na bambisi na bo.

--Yandi zingaka na nzo ya nganga-Nzambi mosi zina ya Yetro

--Yandi kwelaka Sefora ti butaka mwana.

III. Kulonga bana lesu yai –

➡ Kuyantika lesu :

Keti nge me kudiyula, « Nki Nzambi zola mono kusala to kukuma ? Ketu mono fweti vanda infirmier to commersante ? Pasteur to choriste ? Mama ya fami ya nene to longi ?

Nzambi vandaka na ksalu sambu na Moize— kutwadisa bantu ya Israele kubika kimpika na Ezipte. Moize tinaka na nsi ya Madiani na age ya 40, ti yandi salaka bamvula 40 diaka kuna. Ntangu ya lesu yai, yandi me lungisa bamvula 80. [Moniteur, informasio yai kele na malongi ya Bisalu 7 :23 & 30.]

Nki Nzambi zolaka yandi kusala ntangu yina ?

🌟 Developpement--Mambu ya nene ya lesu yai na banti 4 :

4.1 Kima ya yituka bendaka atasio ya Moize--nti ya vandaka kupela tiya, kansi kuzikwa ve.

📖 Tangila bana : Kubasika 3 :1-3

3 :1 Moize vandaka kusala ksalu ya kukeba mameme ti bankombo ya bukilo na yandi Yetro... Yandi nataka bambisi... tii yandi kwisaka kukuma na ngumba...ya Nzambi.

2 ...Moize monaka nde mwa-nti... vandaka kupela tiya, kansi yo vandaka kuzikwa ve.

3 Yandi tubaka...nde : « Mono ta kwenda penepene. Mono ta tala kima yai ya kuyituka. .»

❓ Yula bana bakestio ke tadila baverse yai.

🏰 Bana bageste to mwa-seneti ya ke songa nki me salama.

🗨 Bana yimba ti kina sambu na kusonga nki me salama.

4.2 Nzambi songaka nde Yandi me mona mpasi ya Israele. Yandi me kulumuka sambu na kubasisa bo na kimpika na diboko ya Moize.

📖 Tangila bana : Kubasika 3 :4-10

4 ...Ebuna Moize waka ndinga ya Nzambi vandaka kubasika na kati ya mwa-nti nde :

“Moize ! Moize !” Yandi nde : “Mono yandi yai.”

5- 7 Nzambi nde... Mono kele Nzambi ya bankaka na nge”...“Mono me mona...mutindu bantu na Mono ke mona mpasi na nsi ya Ezipte... mutindu bo ke dilaka...

8 Yo yina, Mono me kukulumuka sambu na kukatula bo...ti kunata bo na nsi ya nkaka yina kele mbote mpenza...

10 Ebuna ntangu yai, kwenda ! Mono ke tinda nge na Farao sambu nge basisa bantu na Mono yai...”

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

👑 Bana yimba ti kina sambu na kusonga nki me salama.

4.3 Moize ndimaka kisalu yina nswalu ve.

📖 Tangila bana : Kubasika 3 :11-15

11-12 Moize tubaka na Nzambi nde : « Mono kele nani na kutelama na meso ya Farao... kubasisa bantu ya Israele na Ezipte ?” Nzambi tubaka nde : “Mono ta vanda na nge. . .

13 Kansi Moize tubaka na Nzambi nde : « Ntangu Mono ta kwenda kusonga bantu ya Israele..., kana bo yula...: ‘Nzambi yango, zina na Yandi nani ?’ ebuna mono ta tuba nki ?

14 Nzambi vutulaka nde, «...Nge fweti tuba mutindu yai...’...zina na Yandi ‘Mono Ikele.’

15 Songa bantu ya Israele mpi nde : ‘Mfumum-Nzambi, Nzambi ya bankaka na beno...Muntu me tinda mono na beno...”

? Yula bana bakestio ke tadila baverse yai.

✚ Bana bageste to mwa-seneti ya ke songa nki me salama.

👑 Bana yimba ti kina sambu na kusonga nki me salama.

4.4 Nzambi tindaka Moize ntete na bambuta ya Israele ti pesaka yandi bidimbu kusonga nde Yandi mosi me tinda yandi.

📖 Tangila bana :

16 Ntangu yai, kwenda kubinga bambuta ya bantu ya Israele. Bo kwisa kisika mosi. Ebuna tubila bo nde : ‘Mfumum Nzambi, Nzambi ya bankaka na beno...me songa mono nde...Yandi me mona mutindu bantu ya Ezipte ke pesa beno mpasi.

17 Ebuna Yandi me zenga nde Yandi fweti basisa beno na nsi ya Ezipte...(ti) nata beno na ntoto...mosi ya mbote’...

18 «...Ebuna nge ti bambuta, beno ta kwenda kutuba na mfumu ya Ezipte nde : ‘Mfumum Nzambi, Nzambi na beto Ba-Ebreo, me kwisa kumonika na beto. Pardo, pesa beto nzila beto sala vwayaze ya bilumbu tatu na ntoto ya zelo na zelo, sambu na kupesa makabu na Mfumum Nzambi...na beto.’

20 ...Mono ta pesa bantu ya Ezipte ndola na bidimbu ya boma yina ya Mono ta sala kuna. Ebuna yandi ta bika beno kukwenda...

4 :1 Moize tubaka na Mfumum Nzambi nde : “Kansi kana bantu ya Israele kundima ve, ...nki mono ta sala ?”

2 Mfumum Nzambi yulaka yandi nde : “Nki kima yina na maboko na nge ? Moize nde : “Yo kele nti.”

3 Nzambi nde : “Losa yo na ntoto. » Ntangu Moize losaka yo na ntoto, yo kitukaka nioka. . .

4 ...Mfumum Nzambi tubaka na yandi nde : « Tangula diboko. Simba yo na mukila. » Moize simbaka yo, ebuna yo kumaka diaka nti.

5 Mfumum Nzambi nde, « Nge ta sala mpidiyai. Mpidina bo ta ndima nde Mono Mfumum Nzambi ... »

6 Mfumum Nzambi songaka Moize diaka nde : « Kotisa diboko na nge na lele. » Moize kotisaka diboko. Ntangu yandi basisaka yo, yo vandaka me fuluka na maladi ya lepre.

7 Mfumum Nzambi nde : « Vutula diaka diboko na nge na lele. » Moize vutulaka yo. Ntangu yandi basisaka yo diaka, yo me kuma mbote bonso misuni ya nkaka.

8-9 *Mfumu Nzambi nde : Kana bo ndima nge ve na bidimbu yai zole...nge ta baka ndambu ya masa ya Nile, nge ta losa yo na ntoto. Masa ta kituka menga. »*

? Yula bana bakestio ke tadila baverse yai.

🙏 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

>|< **Kumanisa leso :**

Nzambi bingaka Moize kusala kosalu ya nene, kansi yandi waka boma. Yandi ndimaka nswalu ve.

Nzambi kele na kosalu sambu na konso muntu.

Kana Yandi binga nge, keti nge ta tuba nde, « Pardo, Nzambi, tinda muntu ya nkaka ? »

👉 **Devoir sambu na bakristo :**

Kana nge zaba Yesu bonso Mvulusi na nge, Nzambi kele na kosalu sambu na nge. Kana nge kuwa Yandi kubinga nge, keti nge ta ndima ? Devoir mono ke pesa beno bakristo na mposo yai, yo yai : Beno samba Nzambi konso lumbu nde, “Nzambi, songa mono nki Nge zola mono kusala. Mono sila nde, mono ta sala yo.”

✝ **Kubinga bana ya zaba Yesu ntete ve :**

Kana nge zaba Yesu ntete ve na ntima na nge, Nzambi kele kubinga nge bubuyai nde, “Kwisa na Mono. Tula ntima na Mwana na Mono Yesu Kristo.” Yesu tubaka nde, “Nzambi tindaka ve Mwana na Yandi awa na nsi-ntoto sambu na kwisa kupesa bantu ndola, kansi sambu na kwisa kugulusa bo” (Yoane 3:17). Kana nge zola kutula ntima na Yesu, bubuyai mbala ya ntete, na nima ya ecodim, kwisa kuvanda awa na bakiti yai awa. Beto ta kwisa kusadisa nge.

Kana Ntangu Lunga—

📖 **Kulonga Mikanda ya Bible --**

[Lomba bana iya kutuba mikanda tanu ya Moize.

Kana mwana zaba yonso ve, kuingila yandi ve, kaka songa yandi kutula ngolo diaka kulonguka yo.

Dessiner 😊 na nima ya zina ya konso mwana ya zaba kutuba yo. Beto ta landa yai mposo na mposo tii ntangu bo yonso me longuka yo.] Bana yimba nkunga, ‘Mikanda ya Moize.’

=== NSUKA YA LESO 4 ===



Leso 4 ***Kubasika***

3 :10-12a

(Nzambi na Moize :)

***10 Ebuna
ntangu yai,
kwenda !***

***Mono ke tinda nge na Farao
sambu nge basisa bantu na Mono
yai...***

***11-12a Moize tubaka na Nzambi
nde : « Mono kele nani na
kutelama na meso ya mfumu ya
nene ya Ezipte ?»***

***12 Nzambi tubaka nde : “Mono ta
vanda na nge... »***

Leso 5. Moize bondilaka Farao, kansi Farao pesaka Israele kaka kisalu ya kuluta.

Kubasika 4 :18-31, 5 :1-23

I Preparasio ya moniteur –

🕒 Kikuma ya lesa :

Na nsuka ya lesa yai, bana ta bakisa nde, kana bo zaba bo ke sala mutindu Nzambi ke zola, bo fweti kaka kanga ntima ti kinga Yandi kusala.

♥ Verse ya kulonguka :

...beto zola nde beno landa mbandu ya bantu ya lukwikilu, yina ke kangaka ntima. Yo yina, bo ke bakaka mambu ya Nzambi silaka. Baebreo 6 :12

🗣️ Nkunga ya kwenda nzila mosi ti lesa yai :

Mono Kele na Nzo Kitoko, verse 7 ,“Makabu kele kana beto kanga ntima”

II. Kusala Revisio –

↑ Nzambi monikaka na Moize ti bingaka yandi na kati ya nki? (Mwa-nti ya pelaka tiya, kansi yo vandaka kuzikwa ve)

↑ Nzambi bingaka Moise kusala nki ? (Kutelama na ntwala ya mfumu ya nene ya Ezipte Farao, kusonga nde yandi basisa bantu ya Israele na kimpika)

↑ Keti Moize vandaka na kiese kukwenda kutuba na Farao ? (Ikele ve. Yandi songaka Nzambi nde, ‘Pardo, tinda muntu ya nkaka.)

III. Kulonga bana lesa yai –

👉 Kuyantika lesa :

Kana muntu zola kuma ingénieur ya ke tunga banzo ya nda, nki fweti salama ntete ?

Ee, yandi fweti longuka maths mingi, yandi fweti sala mbote na nzo-nkanda, yandi fweti nunga mbote na baexamen, yandi fweti baka diplôme d’etat, yandi fweti kwenda na universite, etc. Preparasio mingi. Yo lomba bamvula.

Kana nge zaba nde Nzambi me binga nge kusala kisalu ya nene kusadisa dikanda na nge ya mvimba, nki fweti salama ntete na ntwala nge sala yo ? Ee,

preparasio lenda konda ve.

Kisalu ya Nzambi pesaka Moise vandaka kutelama na ntwala ya Farao, mpi kubasisa bantu ya Israele na kimpika. Kansi ntete, preparasio. Kuyilama.

🏠 Developpement--Mambu ya nene ya lesa yai na banti 4 :

5.1 Moize solulaka na fami kisalu ya Nzambi me pesa yandi.

📖 Tangila bana somere yai ya Kubasika

4 :18-20 :

Na luzitu yonso, Moize kwendaka kusonga bukilo na yandi kisalu Nzambi me pesa yandi kusala. Na nima, yandi bakaka fami na yandi ti simbaka nzila kusala mutindu Nzambi me songa yandi.

? Yula bana bakestio ke tadila baverse yai.

🗣️ Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

5.2 Moize kwendaka ntete ti Aroni na kutendudila bambuta ya dikanda ya Israele misio na yandi.

📖 Tangila bana : Kubasika 4 :27-31

27...*Mfumu Nzambi tubaka na Aroni nde : « Kwenda, nge kutana na Moize... » Aroni kwendaka kukutana na Moize na ngumba ya Nzambi. . .*

28 *Ntangu yai, Moize telaka Aroni mambu yonso ya Mfumu Nzambi tubaka . . .*

29 *Ebuna Moize ti Aroni kwendaka na Ezipte. Bo bingaka bambuta yonso ya bantu ya Israele..*

30 *Aroni telaka bo mambu yonso ya Mfumu Nzambi tubaka na Moize. Moize salaka mpi bidimbu yonso na meso ya bantu.*

31 *Mpidina, bantu ndimaka mambu yina yonso. ...bo sambaka Nzambi.*

? Yula bana bakestio ke tadila baverse yai.

🗣️ Bana bageste to mwa-seneti ya ke songa

nki me salama.

☞ Bana yimba ti kina sambu na kusonga nki me salama.

5.3 Farao buyaka kuwa ndinga ya Nzambi, kansi Moize na Aroni landaka kaka kubenda makutu na yandi.

📖 **Tangila bana :** Kubasika 5 :1-2

5 :1 *Ntangu yai, Moize ti Aroni kwendaka kutuba na Farao nde : « Mfumu Nzambi, Nzambi ya Israele, ke tuba nde : ‘Bika bantu na Mono, bo kwenda kusala fete na Mono na ntoto ya zelo na zelo.’*

2 *Farao tubaka nde : « Mfumu Nzambi yango nani ? Sambu na nki mono fweti wila Yandi kubika bantu ya Israele, bo kwenda ? Mono zaba Mfumu Nzambi ve. Mono mpi ke pesa bantu ya Israele nzila ve na kwenda. »*

☞ Yula bana bakestio ke tadila baverse yai.

☞ Bana bageste to mwa-seneti ya ke songa nki me salama.

☞ Bana yimba ti kina sambu na kusonga nki me salama.

5.4 Farao pesaka nsiku nde bo kumisa ksalu ya Israele kuluta mpasi. Yo yina bo vandaka kubokuta, ti Moize vandaka na mfunu kukanga ntima mingi.

📖 **Tangila bana :** Kubasika 5 :4-22

4-5 *Mfumu ya Ezipte nde : «...Bantu yai me kuma mingi-mingi. Bo me luta bantu ya nsi na mono. Ebuna beno ke zola ve nde bo sala ksalu na bo ? »*

6-7 *Na kilumbu yo yina, mfumu ya Ezipte songaka bakapita yonso...nde : « Beno lenda pesa bantu diaka ve matiti na kusala babriki... Bo fweti kwenda kusosa yo bo mosi.*

8 *Kansi beno lenda kulumuna ntalu ya babriki ve... Bumolo me simba bo. Yo yina bo ke dila-dila nde : ‘Bika beto kwenda kupesa makabu na Nzambi na beto.’*

13 *Bakapita yangisaka bo nde, “Beni fweti sala ntalu ya babriki kiteso mosi...”*

14 *Bakapita ya Farao yantikaka kubula bantu... Bo yulaka bo nde : “Sambu na nki beno me sala ve bubu yai babriki kiteso mosi mutindu beno me sala ntete ?”*

19-20 *Bakapita yango...monaka nde bo me kota na mpasi. Ntangu bo basikaka na nzo ya mfumu, bo kutanaka Moize ti Aroni ke vingila bo.*

21 *Bakapita tubilaka bo nde : «...Beni bantu me pesa bo nzila na kufwa beto.”*

22 *Ntangu yai, Moise vutukilaka diaka Mfumu Nzambi nde : « Mfumu, sambu na nki Nge ke pesa bantu na Nge mpasi mpidiyai ? Sambu na nki Nge tindaka mono awa ?”*

☞ Yula bana bakestio ke tadila baverse yai.

☞ Bana bageste to mwa-seneti ya ke songa nki me salama.

☞ Bana yimba ti kina sambu na kusonga nki me salama.

>|< **Kumanisa leso :**

Beto zaba nde bana ya Israele fweti basika na Ezipte ti mfumu ya Ezipte fweti pesa bo nzila, sambu Nzambi silaka yo. Kansi na luyantiku ya mambu yina, mpasi lutaka mingi. Ntangu Moize ti Aroni kwendaka na mfumu ya Ezipte, luzingu kumaka kuluta mpasi diaka. Bantu ya Israele vandaka kutala ve mambu ya Nzambi me sila bo. Bo vandaka kutala kaka mpasi na bo na ntangu yina. Bo vandaka na mfunu ya kukanga ntima, kansi bo monaka yo mpasi kusala yo.

☞ **Devoir sambu na bakristo :**

Nge, mukristo, mbala ya nkaka nge me samba ngolo, kansi mambu me kuma kaka kuluta ngolo, kuluta mpasi. Nge ke na mfunu kukanga ntima. Landa kusamba ti tula ntima na Nzambi. Yandi ta lungisa bansilulu na Yandi.

Devoir mono ke pesa beno bakristo mposo yai, yo yai : Konso lumbu, lombi Nzambi kusadisa nge kukanga ntima, kukwikila Yandi.

Kubinga bana ya zaba Yesu ntete ve :

Mbala ya nkaka na kati na beno kele mwana mpi ya me zaba Yesu ntete ve na ntima na yandi. Kana nge zaba Yandi ntete ve, zaba nde Yandi ke kinga nge. Yandi zola nge kutula Yandi ntima bubuyai sambu nge guluka. Bible ke tuba nde : “Bubu yai kele kilumbu ya beto lunga guluka” (2 Korinto 6 :2b). Keti nge ta binga zina na Yandi bubu yai sambu Yandi gulusa nge? Sambu Yandi kitula nge muntu ya mpa mu Yesu ? Konso mposo beto kele awa na nima ya ecodim sambu na kutana ti konso mwana ya zola tula ntima na Yesu Kristo.

Kana ntangu lunga--

 **Kulonga Mikanda ya Bible --**

Bubuyai, songa bana nde na konso mukanda ya Bible, bantu ke kabisa yo na bandambu ya nene ya beto binga bakapu. Banombre ya bakapu ke monika na zulu ya konso page (songa bo). Ebuna na konso kapu, bo me kabisa yo na bandambu ya fioti ya beto binga baverse to banzila ya kutanga. Banombre ya baverse ke monika na kati ya bakolon ya kusonika. Konso verse ke yantika na nombre na yo.

Moniteur, sadisa bana kumona mukanda ya zole ya Bible, mukanda ya Kubasika. Sadisa bo kumona kapu 4 ti 5, ti baverse na kati ya bakapu yina.

===NSUKA YA LESO 5

Leso 5



***...beto
zola nde
beno
landa
mbandu***

***ya bantu ya lukwikilu,
yina ke kangaka ntima.***

***Yo yina, bo ke bakaka mambu
yina ya Nzambi silaka.***

Baebreo 6 :12

Leso 6. Nzambi silaka kukatula bana ya Israele na kimpika.

Kubasika 6 :1-30, 7 :1-9

I Preparasio ya moniteur--

🕒 Kikuma ya lesu :

Na bampasi na beto ya luzingu yai, bana fweti bambuka Nzambi kele Nani, bo bambuka mpi yonso Yandi me sala sambu na beto. Ebuna bo ta mona mpila kutula Yandi ntima na mambu ya fweti kwisa.

❤ Verse ya kulonguka :

Mono ke yindula bilumbu me luta, mono ke yindula mambu yonso ya Nge salaka. Bankunga 143 :5

🗣 Bankunga ya kwenda nzila mosi ti lesu yai :

Banzambi ya Nkaka
Mfumu Zaba Nzila na Mono
Nzambi ke Mbote

II. Kusala revisio –

↑ Na mposo me luta, beto me mona nde Moize ti Aroni monaka nki mpasi ?
(Bo kwendaka na Farao bonso Nzambi songaka bo kusala. Kansi Farao waka bo ve. Yandi kumisaka kisalu ti luzingu ya bantu ya Israele kuluta mpasi.)

III. Kulonga Leso Yai –

🔄 Kuyantika lesu :

Na nsuka ya lesu ya me luta, Moize vandaka kusamba Nzambi. Kansi lombilu na yandi vandaka ve kutonda Nzambi to kumisa Yandi, kansi kubokuta. Moize vandaka kubokuta sambu bana ya Israele vandaka kumona mpasi ya kuluta, mpi bo vandaka kumona bonso yandi muntu me tula bo na mpasi yina. Nki yandi fweti sala ? Bubuyai beto ta mona mvutu ya Nzambi pesaka na Moize.
Kubasika 6 :1.

🌟 Developpement--Mambu ya nene ya lesu yai na banti 4 :

6.1 Nzambi bambukisaka Moize Yandi kele Nani, ti nki mutindu Yandi zabanaka na bambuta na bo.

📖 Tangila bana : Kubasika 6 :1-4

1 *Mfumu Nzambi vutulaka nde : “Ntangu yai, nge ta mona mambu ya Mono ke sala mfumu ya Ezipte...yandi ta pesa beno nzila kukwenda...”*

2-4 *Nzambi tubaka na Moize nde : « Mono kele Mfumu Nzambi. Mono kudisongaka na Abrahami, Izaki ti Yakobi nde Mono kele Nzambi-Mpungu...Mono songaka bo nde Mono ta pesa bo nsi ya Kanana...*

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣 Bana yimba ti kina sambu na kusonga nki me salama.

6.2 Nzambi songaka Moize kubambukisa bantu ya Israele mambu yina. Moize songaka bo, kansi bo waka ve.

📖 Tangila bana : Kubasika 6 :6-9

6 *Ebuna nge fweti songa bantu ya Israele nde : ‘Mfumu Nzambi ke songa beno nde : Mono kele Mfumu Nzambi. Kele Mono yina ta katula beno na kisalu ya kimpika...*

7 *Mono ta kumisa beno bantu na Mono mpenza. Mono ta vanda Nzambi na beno, ti beno ta zaba nde Mono kele Mfumu Nzambi na beno...*

8 *Mono ta nata beno na nsi ya Mono silaka kupesa na Abrahami, Izaki ti Yakobi. Mono ta pesa beno yo...*

9 *Moize songaka bantu ya Israele mambu yai, kansi bo wilaka Yandi ve. Bampasi ya kimpika kulutilaka bo.*


? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣 Bana yimba ti kina sambu na kusonga nki me salama.

6.3 Nzambi tindaka Moize ti Aroni na Farao diaka, na ndongisila nde Yandi ta sala bimpa mingi, ti na

nsilulu nde na nsuka Farao ta basisa bo.


 **Tangila bana :** Kubasika 6 :10-11, 7 :2-5
10-11 *Ntangu yai, Mfumu Nzambi tubaka na Moize nde ...“Beno songa diaka bantu ya Israele ti Farao mfumu ya Ezipte nde yandi basisa bantu na Mono na nsi ya Ezipte.”...*


7.2 *Nge ta songa Aroni mambu yonso ya Mono ke songa nge. Yandi ta tuba yo na mfumu . . .*

3-4 *Mono ta kumisa Farao ntu-ngolo. Ata Mono sala bidimbu mingi...ya kuyituka na nsi ya Ezipte, yandi ta wila beno ve. Ebuna Mono ta...pesa ndola ya ngolo na bantu ya Ezipte. Mono ta basisa bantu na Mono Israele na nsi ya Ezipte...*


5 *Mpidina bantu ya Ezipte ta zaba nde Mono kele Mfumu Nzambi...*

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.


 Bana yimba ti kina sambu na kusonga nki me salama.


6.4 Nzambi songaka Moize ti Aroni kidimbu ya ntete ya bo fweti sala.

 **Tangila bana :** Kubasika 7 :6-9
6 *Moize ti Aroni salaka kaka mutindu Mfumu Nzambi songaka bo.*

...8-9 *Mfumu Nzambi tubaka na Moize ti Aroni nde :« Kana mfumu ya Ezipte kusonga beno nde : ‘Beno sala kimpa ...‘Baka nti na nge ya kutambudila. Losa yo na ntoto na meso ya mfumu. Yo ta kuma nioka.’ »*

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa lesa :

Moize ti Aroni vandaka na boma mingi, kansi Nzambi bambukisaka bo mpila Yandi me monika na bambuta na bo. Bo yantikaka kuyindula diaka mingi ve ngolo ya fioti ya bo mosi. Bo yantikaka

kuyindula ti kubambuka ngolo ya nene ya Nzambi. Ntangu yina, bo monaka mpila kusala mambu ya Nzambi songaka bo kusala.

 Devoir sambu na bakristo :

Nge, mukristo--nki Nzambi me sala sambu na nge ? Bambuka mpila Yandi gulusaka nge. Bambuka mbala yonso Yandi me wa lombilu na nge. Beto tanga sesepiyai mambu yonso ya mbote ya Nzambi me pesa beto. [*Moniteur, pesa bana nzila kutuba bima ya mbote Nzambi me sala bo.*]

Devoir mono ke pesa beno mposo yai kele kutula ngolo konso lumbu kubambuka bima ya mbote Nzambi me sala nge. Na nima, songa Yandi nde nge ke tula Yandi ntima mpi na bampasi yonso ya nge ke mona bubuyai.

 Kubinga bana ya zaba Yesu ntete ve :

Kana nge me yamba Yesu Kristo ntete ve, kima mosi ya mbote ke kinga ya Nzambi zola kupesa nge, kana nge ta kaka baka yo. Kima ya mbote yango kele mpulusu. Nzambi zola kugulusa nge na masumu na nge yonso. Yandi zola kumisa nge mpi mwana na Yandi.

Bible ke tuba nde ntangu Yesu vandaka kuzinga na ntoto yai, « Yandi kwisaka na nsi na Yandi mosi, kansi bampangi na Yandi yambaka Yandi ve. Kansi bantu ya nkaka yambaka Yandi. Bo ndimaka yandi mpi na ntima na bo. Ebuna Yandi pesaka bo kiyeka na kukituka bana ya Nzambi » (Yoane 1 :11-12)

Keti nge me yambaka Yesu ? Ketu nge zaba yo mbote-mbote, kukonda keti-keti ?

Konso mposo, na nima ya ecodim, bakiti yai kele awa [*Moniteur, songa wapi*] sambu na konso mwana ya me yamba Yesu ntete ve, kansi zola kuyamba Yandi. Kana nge zola yamba Yandi, kwisa, vanda awa na nima ya ecodim.

Yesu, bo ke yambaka Yandi ve konso dimanche to konso lumbu. Bo ke yambaka Yandi mbala mosi. Nzambi sakumuna beno yonso ya me yambaka Yandi bonso Mvulusi na beno.

 Aktivite kusala kana ntangu ke bikala :

Sonika baline 7 na tableau, na papie, to na ntoto ti nti.

Na zulu ya baline yai, beto zola sonika ndinga mosi ke tadila lesa na beto bubuyai. Beto yantika na mwana mosi, yandi tuba letre mosi. Kana letre yina kele na kati ya ndinga yina, nge moniteur sonika yo na sika na yo. Kana ve, nge nikisa ntu 've' ti bana yonso tuba ZONK! Bana tesa kutuba nki ndinga yo kele.

[Moniteur, ndinga yai kele :

B A M B U K A)

Kana ntangu lunga--

Kulonga Mikanda ya Bible --

Yimba “Bankunga ya Moize” mbala mosi. Na nima, kangula Bible ti songa bo nki mutindu kusosa Kubasika kapu 6, verse 1. Kanga Bible diaka. Bana ya kele na Bible kwisa na ntwala. Bo tula Bible na zulu. Nge tuba adresse : Kubasika kapu 6, verse ya ntete. Bo tuba yo na nima ya nge, baBible na zulu. Ntangu nge songa bo kidimbu, bo kangula baBible na bo ti sosa verse yina. Mwana ya ntete kumona yo yantika kutanga, ti yandi kele shampio. Bana yonso bula maboko sambu na yandi.

NB: Beto zaba nde bana yonso ta vanda na Bible ve, kansi nsaka yai ta pesa enkurazema na bo kusosa kuzwa Bible, bo mosi.

===NSUKA YA LESO 6

Nzambi bambukisaka bo mpila Yandi me kudisonga na bankaka na bo, mpila Yandi me sila kupesa bo nsi ya Kanana.

Leso 6

***Mono
ke
yindula
bilumbu
me luta.***



***Mono ke yindula mambu
yonso ya Nge salaka.***

Bankunga 143 :5

Leso 7. Nzambi tindaka bampasi iya na Ezipte.

Kubasika 7 :15--8 :1-32

I. Preparasio ya moniteur--

🕒 Kikuma ya lesa :

Na nsuka ya lesa yai, bana ta bakisa nde Mfumu Nzambi na beto kele Nzambi Mpungu ya kieleka, kuluta ngolo ti banzambi yonso ya nkaka ya fioti ya bantu me sala-sala. Yo yina, bo ta sadila kaka Yandi.

♥ Verse ya kulonguka :

Mfumu Nzambi songaka beno bamambu yai sambu beno zaba nde ke na Nzambi ya nkaka ve, kaka Yandi mpamba. Kulonga 4 :35

🗣️ Moniteur, yilama na bankunga ya kwenda nzila mosi ti lesa yai :

Banzambi ya Nkaka
Kumisa Nzambi
Vutuka, Afrika, Vutuka !

II. Kusala Revisio –

Beto bambuka nde Nzambi tindaka Moize ti Aroni na Farao, mfumu ya nene na Ezipte. Dikanda na bo Israele me kuma bampika na nsi yina, ti Nzambi me tinda Moize ti Aroni kusonga Farao kubasisa bo. Bambuka nde Nzambi songaka bo na ntwala nki fweti salama.

Keti Farao ndimaka nswalu nde bo kwenda ? Ikele ve. Nki salamaka ? Farao pesaka bo kisalu ya kuluta, kisalu ya mpasi ya bo lenda sala ve. Ntangu bo kukaka ve kusala yo, bakapita bulaka bo. Dekurazema kumaka mingi.

Kansi Nzambi songaka bo nde, ata Fararo ta ndima ve na luyantiku, na nsuka, yandi fweti basisa bo. Nzambi zolaka kusonga ngolo ti kinene na Yandi sambu bantu yonso ya Ezipte kuzaba nde kaka Yandi mpamba kele Nzambi.

III. Kulonga Lesa Yai –

🕒 Kuyantika lesa :

Moize ti Aroni kwendaka na Farao. Aroni losaka nti na yandi na ntoto, ti Nzambi kitulaka yo nioka.

Kansi Farao ndimaka ve nde bo basika. Na nima, Nzambi tindaka bo na Farao diaka.

🏠 **Developpement--Mambu ya nene ya lesa yai na banti 4 :**

7.1 Mpasi ya ntete—Nzambi kumisaka masa ya nzadi nil, yo kuma menga.

📖 **Tangila bana :** Kubasika 7 :15-22

15 Kwenda kutana na Farao na suka... Songa yandi nde : ‘Mfumu Nzambi...me tinda mono na kusonga nge nde : Bika bantu na Mono, bo kwenda...kusamba Mono...’

17 Mambu yai...ta songa nge nde Yandi kele Mfumu Nzambi. Nti na mono yai, mono ta bula yo na masa, ebuna masa yonso ta kuma menga.

18 Bambisi ya masa ta fwa. Masa yonso ta kuma nsudi mingi. Bantu ya Ezipte ta mona mpila ya kunwa yo ve.’ ”

...20 Moize ti Aroni salaka mutindu Mfumu Nzambi songaka bo...

21 Bambisi ya masa fwaka. Nzadi kumaka nsudi mingi. Bantu ya Ezipte monaka mpila ya kunwa yo ve...

22 Kansi banganga ya Ezipte salaka mutindu mosi na mayele na bo. Ebuna Farao kumaka ntu-ngolo. Yandi wilaka Moize ti Aroni ve, kaka mutindu Mfumu Nzambi tubaka...

📖 **Tangila bana ntendula yai :**

Bantu ya Ezipte sambaka banzambi mingi. Bampasi yai ya bwilaka bo, bwilaka banzambi na bo mosi-mosi. Mpasi yai ya ntete bwilaka nzambi na bo ‘Hapi’, nzambi ya Nil. Mfumu Nzambi Mpungu songaka bo pwelele nde Yandi vandaka na ngolo na zulu ya kiteki na bo Hapi.

❓ Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

7.2 Mpasi ya zole--Makototo fulusaka nsi ya Ezipte. Kubasika 7 :25—8 :11

 **Tangila bana :**

7 :25-27...na nima bilumbu 7 lutaka, Nzambi tubaka na Moize nde : « Kwenda kusonga Farao nde : ‘Mfumu Nzambi me tuba nde : Pesa bantu na mono nzila kukwenda kusadila Mono. Kana nge buya, Mono ta tinda makototokuyangisa beno.

8 :1-2 Mfumu Nzambi tubaka diaka na Moize... Ebuna Aroni tedimisaka diboko na yandi na zulu ya bamasa, yo yina makototo basika-basikaka, yo fulukaka nsi ya mvimba.

3 Kansi banganga ya Ezipte, na mayele na bo, bo mpi basisaka makototo.

4 Farao bingaka Moize ti Aroni nde : « Beno bondila Mfumu Nzambi, Yandi katula makototo yai ntama ti beto, ebuna mono ta bika bantu na beno, bo kwenda....’

6 Moize nde : ...Mbasi...mono ta lombila beno Nzambi. Mpidina nge ta zaba nde nzambi ya nkaka kele ve bonso Mfumu Nzambi...

...8 Moize ti Aroni basikaka na nzo ya Farao. Moize dilaka Nzambi sambu Yandi kukatula makototo...


9-10 Mfumu Nzambi ndimaka bisambu ya Moize, ebuna makototo...yo fwaka. Bantu ya Ezipte lokuta-lokutaka yo...ntoto yonso kumaka nsudi na makototo ya kupola.

11 Ntangu mfumu ya Ezipte monaka nde makoto me mana, yandi kumaka diaka ntu-ngolo. Yandi wilaka ve Moize ti Aroni, kaka mutindu Mfumu Nzambi tubaka.


 **Tangila bana ntendula yai :**

Na mpasi yai ya makototo, Mfumu Nzambi Mpungu songaka ngolo na Yandi na zulu ya nzambi na bo ‘Heketi’. Kiteki yina vandaka na ntu ya dikototo ti nitu ya nkento. Bantu ya Ezipte sambaka yandi sambu bankento na bo kubuta. Bo monaka pwelele nde ngolo ya Mfumu Nzambi me luta yina ya yandi !


? Yula bana bakestio ke tadila baverse yai.

 Bana bageste to mwa-seneti ya ke songa

nki me salama.

 Bana yimba ti kina sambu na kusonga nki me salama.

7.3 Mpasi ya tatu—Putulu ya ntoto kumaka bambembele. Yo fulusaka Ezipte, ye ngolo ya Nzambi nungaka yina ya bamazisieni.

 **Tangila bana :** Kubasika 8 :12-15


12 Mfumu Nzambi tubaka na Moize nde : « Tuba na Aroni, yandi bula nti na yandi na ntoto. Putulu ya ntoto ta kuma bambembele na Ezipte ya mvimba.


13 Aroni salaka mpidina. Yandi tandulaka diboko na yandi. Yandi bulaka nti na ntoto. Putulu ya ntoto kumaka bambembele na zulu ya bantu ti na zulu ya bambisi. Putulu ya ntoto ya Ezipte yonso kumaka bambembele kaka.

14 Banganga mekaka na mayele na bo kusala mutindu mosi, kansi bo kukaka ve...

15 ebuna banganga tubaka na Farao nde : « Nzambi... me sala mambu yai. » Kansi Farao vandaka kaka ntu-ngolo. Yandi wilaka ve Moize ti Aroni, mutindu Mfumu Nzambi tubaka.

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

7.4 Mpasi ya iya--Banzinzi fulusaka Ezipte, kansi yo kotaka ve na bisika bantu ya Israele vandaka. Kansi na bampasi yai yonso, Farao ndimaka ve nde bantu ya Israele basika.

 **Tangila bana :** Kubasika 8 :16-28

16 Ebuna Mfumu Nzambi tubaka na Moize nde : « Kwenda na suka yonso kukutana na mfumu ya Ezipte...Tuba na yandi nde : ‘Mfumu Nzambi me tuba nde : ‘Bika bantu na Mono, bo kwenda kusamba Mono.

17 Kana nge buya, Mono ta tinda banzinzi ya ke nata maladi. Bo ta yangisa nge...ntoto yonso ta fuluka na bo...

18 ...Kansi na sika bantu na Mono ke zinga, kuna banzini ta vanda ve. Mpidina nge ta zaba nde Mono Mfumu Nzambi ke songa ngolo na Mono na nsi yai.

...20 Yo bwaka mpi mpidina. Mfumu Nzambi tindaka banzini mingi-mingi na nzo ya Farao ti na nsi yonso ya Ezipte. Ntoto bebaka mpenza na baniamana.

21 Farao bingaka Moize ti Aroni nde : « Kwenda kupesa makabu na Nzambi na beno . . . Mono ke pesa beno nzila.»

...26 Moize bikaka mfumu ya Ezipte, yandi kwendaka kusamba Mfumu Nzambi.

27 Mfumu Nzambi wilaka yandi. Banzini katukaka ntama na Ezipte. Ata niama mosi bikalaka diaka ve.

28 Kansi ata mbala yai, Farao kumaka ntungolo. Yandi pesaka bantu ya Israele nzila ve na kwenda.

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

>|< Kumanisa lesu :

Nzambi me songa Farao mbala iya nde Yandi mosi kaka kele Nzambi. Ata banganga ya Ezipte salaka ndambu na mayele na bo na luyantiku, bo kukaka ve kusala yonso ya Nzambi salaka. Kieleka Nzambi ya nkaka kele ve, kaka Mfumu Nzambi Mpungi ya beto ke sambaka.

👤 Devoir sambu na bakristo :

Nge mukristo, keti nge zaba muntu ya ke sambaka banzambi ya nkaka ? Devoir mono ke pesa nge mposho yai, yo yai : Tula muntu yina na lombilu, ebuna kusosa ntangu kusonga yandi nde, “Mfumu Nzambi me luta nene !”

✚ Kubinga bana ya zaba Yesu ntete ve :

Kansi kana nge me ndima Yesu ntete ve, nge kele ntete ve na kati ya bantu ya Nzambi. Bible ke tuba nde “Nzambi zaba bantu na Yandi” (2 Timoteo 2 :19). Kana Nzambi vandaka kutanga bazina ya bantu na Yandi ya ecodim yai bubu, keti Yandi ta tanga zina na nge ?

Kana nge zaba ve, nge lenda. Bikala na bakiti yai awa [moniteur, songa wapi] na nima ya ecodim bubuyai. Beto ta sadisa nge kundima Yesu Kristo sambu nge guluka, ti nge kuma mpi mwana ya Nzambi.

Kana ntangu lunga--

👤 Kulonga Mikanda ya Bible --

Yimba nkunga “Mikanda ya Moize ». Yula bana, bo vutula na kimvuka :

- Nki mukanda kwisa na nima ya Kuyantika ? (Kubasika)
- Nki mukanda kwisa na ntuala ya Kubasika ? (Kuyantika)
- Nki kele mukanda ya ya ntete na kati ya Bible ? (Kuyantika)
- Mukanda ya zole? (Kubasika)

=== NSUKA YA LESO 7

Leso 7



Nzambi fulusaka ntoto ya Ezipte na makototo, kansi Farao pesaka bantu ya Israele nzila ve kubasika.

***Mfumu
Nzambi
songaka
beno
bamambu
yai***

***sambu beno zaba nde ke na
Nzambi ya nkaka ve,
kaka Yandi mpamba.***

Kulonga 4 :35

Leso 8. Nzambi tindaka bampasi ya nkaka na Ezipte.

Kubasika 9 & 10

I. Preparasio ya moniteur --

🎯 Kikuma ya lesa :

Ntangu bana kuwa ndinga ya Nzambi, bo sala ntu-ngolo ve, kansi bo wila yo. Yo yina, bo ta katuka na bampasi mingi ya zolaka kubwila bo.

♥ Verse ya kulonguka :

...Nzambi ke tuba nde : 'Bubu yai, kana beno ke wa ndinga na Mono, kusala ntu-ngolo ve...

Baebreo 3 :15b

🗣️ Bankunga ya kwenda nzila mosi ti lesa yai :

Ee, Mfumu, Ee

Kuwa Bible

Tesa Mono

II. Kusala Revisio –

👆 Revisio ya lesa me luta :

Na mposo me luta, beto monaka bampasi iya Nzambi tindaka na Ezipte. Nani lenda bambuka ndambu na yo ? (Masa kumaka menga, makototo, bambembele, ti banzini.)

👆 Na kati ya bampasi yai iya, nge mona nki mpasi ya kuluta ? [Moniteur, bika bana kutuba mabanza na bo kaka ntangu fioti.]

III. Kulonga bana lesa yai –

➡ Kuyantika lesa :

Bampasi ya Ezipte me mana ve. Yo me kaka yantika. Nki mutindu beto zaba nde yo me mana ntete ve ? (Ee, sambu Farao me sala ntu-ngolo. Yandi me pesa bo nzila kukwenda ntete ve.)

🏠 Developpement--Mambu ya nene ya lesa yai na banti 4 :

8.1 Mpasi ya tanu—Bambisi fwaka na maladi, kansi Farao salaka kaka ntu-ngolo.

📖 Tangila bana somere yai ya 9 :1-6 :

Mfumu Nzambi songaka Farao diaka kubasisa bantu na Yandi Israele, kana ve, bambisi na bo

na bwa maladi ti mingi ta fwa. Kansi Farao buyaka diaka. Yo yina, Nzambi bwilaka bambisi ya bantu ya Ezipte na maladi mpila Yandi tubaka.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

8.2 Mpasi ya sambanu—Bantu ti bambisi belaka bivimbu ya mpasi.

📖 Tangila bana : Somere ya verse 8-9 :

Mfumu ya Ezipte Farao kaka buyaka kulemfuka na Nzambi. Yo yina Nzambi songaka Moize ti Aroni nki kusala diaka :

10 ...Bo bakaka putulu ya tiya... Moize losaka yo na zulu, ebuna yo kumaka bivimbu ya basisaka bamputa na bantu ti na bambisi yonso.

11 Banganga ya Ezipte monaka mpila ve na kukuma na ntwala ya Moize, sambu bo mpi, bo belaka bivimbu...

Somere ya verse 12 : Kansi Farao vandaka kaka ntu-ngolo. Yandi lemfukilaka Mfumu Nzambi ve.

NB: Tangila bana ya me yela to bajeune :

Na kati ya banzambi mingi ya bantu ya Ezipte sambaka vandaka mosi ya nene zina ya Isisi. Bo monaka yandi bonso nzambi ya bankisi, kansi ata nkisi mosi sadisaka ve bivimbu ya Nzambi tindaka. Yo yina, Nzambi nungaka, ti Isisi belaka.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

8.3 Mpasi ya nsambwadi—Mvula ya matadi nokaka na nzazi.

📖 Tangila bana :

Somere ya 9 :13 : Nzambi songaka Farao diaka

mbala ya 7, kulemfukila Mono. Kana ve,
14 ...ndola ta bwila nge mpenza, ti bantu na nge
yonso. Mpidina nge ta zaba nde awa na nsi-
ntoto ke na...ya nkaka ve bonso Mono...

16 ...Mono zola nde nge mona ngolo na Mono...

18-19 Mbasi na suka . . . Mono ta nokisa mvula
ya matadi. Songa bantu na nge bo katula
bambisi ti bima yonso kele na nganda, bo tula yo
na kati ya banzo...

20-21 Bantu ya nkaka ya mfumu waka...Kansi
bantu ya nkaka...bikaka...bo na nganda. Kansi
Farao lemfukaka ve. Yo yina yo salamaka kaka
mutindu Nzambi tubaka...

25 Mvula ya matadi bebisaka bima yonso ya
vandaka na nganda, ti bantu ti bambisi...bima
yonso na bilanga... banti yonso.

26 Kaka na...kisika ya bantu ya Israele vandaka
kuzinga, mvula ya matadi nokaka ve.

27 Mfumu ya Ezipte bingaka Moize ti Aroni
nde : “Ntangu yai, mono me ndima nde mono
salaka mbi. Mfumu Nzambi me nunga. Mono ti
bantu na mono, beto me bela.

28 Beno samba Mfumu Nzambi sambu banzasi
ti mvula ya matadi kumana. Mono ta pesa beno
nzila kubasika.”

33--35 Moize....sambaka Mfumu Nzambi. Yo
yina, banzasi bwaka diaka ve ti mvula ya matadi
zenganaka. Ntangu mfumu ya Ezipte monaka
nde mvula ya matadi me zengana... yandi salaka
diaka mbi kiteso mosi... Yandi buyaka nde bantu
ya Israele basika, kaka mutindu Mfumu Nzambi
tubaka na Moize.

NB : Kutangila bana ya me yela to bajeune :

Na kati ya banzambi mingi ya bantu ya Ezipte sambaka
vandaka Nuti. Bo yindulaka nde Nuti yalaka zulu yai ya
beto ke mona. Kansi Nuti vandaka na ngolo ve kukanga
nzasi ti mvula ya matadi. Kaka Mfumu Nzambi nungaka
kusala yo.

? Yula bana bakestio ke tadila baverse yai.

👥 Bana bageste to mwa-seneti ya ke songa
nki me salama.

👤 Bana yimba ti kina sambu na kusonga nki
me salama.

8.4 Bampasi ya nana ti uvwa—Bampasu fulukaka na Ezipte, ti mpimpa ya ngolo kubwaka.

📖 Tangila bana : Kubasika 10 :3-29

Ebuna Nzambi tindaka Moize ti Aroni na Farao
mbala ya nana.

10 :3 ...Moize ti Aroni...nde : “Mfumu Nzambi...
me yula nde : ‘Nki ntangu nge ta lemfukila
Mono ? Bika bantu na Mono, bo kwenda
kusamba Mono.

4-5 Kana nge buya, ...mbasi Mono ta tinda
bampasu na nsi na nge. Bo ta fuluka na zulu ya
ntoto yonso...

7 Bantu ya Farao...nde : “Nki ntangu muntu yai
ta bika kupesa beto mpasi ? Bika bo kwenda...
Keti nge ke mona ve nde mpila nsi ya Ezipte me
beba ?”

Somere, vs 8-11 : Ebuna Farao yantikaka kusosa
mpila bantu ya Israele kukwenda, kansi kaka na
mpila yandi tubaka. Ntete yandi tubaka kaka
babakala kwenda. Moize buyaka. Bo fweti
basika na mpila Nzambi tubaka.

12 Ntangu yai, Mfumu Nzambi tubaka na Moize
nde : «Tedimisa diboko na nge na zulu, bampasu
kukwisa...

13-15 Moize tedimisaka nti na yandi... Nsi yonso
fulukaka na bampasu... Ntoto yonso kumaka
ndombe sambu na yo. Bo diaka matiti yonso . . .

16-17 Mfumu ya Ezipte bingaka Moize ti Aroni
nswalu nde : “Mono me sala mbi...Pardo, beno
wila mono mawa kaka mbala yai. Beno samba
Mfumu Nzambi na beno sambu Yandi katula
mono ndola yai...”

18-19 Moize . . . kwendaka kusamba Mfumu
Nzambi...Yo yina, Nzambi...katulaka bampasu
yonso...

21 Mfumu Nzambi tubaka na Moize nde :
« Tedimisa diboko sambu mpimpa ya ngolo
kubwa na nsi ya Ezipte. »

22-23 Moize tedimisaka diboko... Yo yina,
mpimpa kubwaka na nsi yonso ya Ezipte
bilumbu tatu. Mpila ya kumona muntu ya nkaka

vandaka ve ... Kansi na...bantu ya Israele, mwini vandaka.

24 Mfumu ya Ezipte bingaka Moize nde : « Beno kwenda kusamba Mfumu Nzambi... Kansi mameme, bankombo ti bangombe, yo fweti bika awa. »

Kansi yina vandaka ve mpila Nzambi me songa Moize kusala. Yo yina, yandi buyaka. Ebuna, Farao buyaka diaka nde bo kwenda. Na makasi,

28 Yandi tubaka na Moize nde : « Katuka awa ! Atasio, kwisa diaka ve ! Kana nge meka diaka, mono ta fwa nge ! »

29 Moize nde : «Mambu ve. Mutindu nge me tuba, mono ta kwisa diaka ve. »

NB : Kutangila bana ya me yela to bajeune :

Na kati ya banzambi mingi ya bantu ya Ezipte sambaka vandaka mosi ya nene ya bo bingaka Ra. Bo kwikilaka nde ntangu na zulu lemfukilaka yandi. Kansi Ra belaka, ti bantu yonso monaka nde ngolo ya Nzambi me luta yina ya Ra.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

>|< Kumanisa leso :

Na mambu ya yituka yai yonso, Nzambii songaka bo nde ngolo na Yandi me luta yina ya banzambi yonso na bo ya fioti-fioti. Kansi na yo yonso, Farao bikalaka kaka ntu-ngolo. Yandi kaka buyaka kulemfukila Mfumu Nzambi. Sambu na yo, yandi ti bantu na yandi monaka mpasi na mpasi na mpasi.

Ebuna nge, kana nge kuwa ndinga ya Nzambi, kuvanda ntu-ngolo ve bonso Farao. Ndimba Ndinga ya Nzambi na ntima na nge sambu Nzambi kuvanda kiese na nge.

👤 Devoir sambu na bakristo :

Beno bakristo, mono ke pesa beno devoir yai : Konso ntangu beno kuwa ndinga ya Nzambi na mposo ke kwisa, tula ngolo kulemfuka na yo. Lomba Nzambi nde yo kota mbote na ntima na nge.

✝ Kubinga bana ya zaba Yesu ntete ve :

Kansi mbala ya nkaka na kati ya beno bana kele muntu ya me yamba Yesu ntete ve. Ndola ya nene ke kinga beno bantu ya yamba Yesu ve. Kansi nge lenda pindula mabanza, nge lenda tula ntima na Yesu bubuyai. Kana nge zola yamba Yesu bonso Mwana-Nzambi ti Mvulusi na nge, na nima ya ecodim, kwisa kuvanda awa [*moniteur, songa wapi*]. Beto ta sadisa nge.

Kana ntangu lunga--

📖 Kulonga Mikanda ya Bible --

Bana yimba 'Mikanda ya Moize'.

Moniteur : Mukanda ya ntete ti ya zole ya Bible ?

Bana : Kuyantika ti Kubasika

Moniteur : Mikanda yai zole kele na Kuwakana ya Ntama, to na Kuwakana ya Mpa ?

Bana : Na Kuwakana ya Ntama.

Moniteur : Na ntwala to na nima ya Yesu ?

Bana : Na ntwala ya Yesu.

===NSUKA LESO 8

Leso 8



**...Nzambi ke tuba nde :
'Bubu yai, kana beno ke wa
ndinga na Mono, kusala ntu-
ngolo ve...**

Baebreo 3 :15b

Leso 9. Bantu ya Israele yilamaka sambu na fete ya Paki.

Kubasika 11 :1 & 12 :1-12 :28

I. Preparasio ya moniteur --

🕒 Kikuma ya lesu :

Bana ta bakis nde, bantu ya Israele gulukaka kaka kana bo tulaka menga na munoko ya nzo. Kiteso mosi, beto ta guluka kaka kana beto tula ntima na menga ya Yesu pesaka sambu na beto.

♥ Verse ya kulonguka :

*Beno ta tula menqa na bakielo ya banzo na beno.
Mono ta mona yo, ebuna Mono ta luta beno.
Mpidina, mpila Mono ta fwa bantu ya Ezipte, yo ta bwila beno ve. Kubasika 12 :13*

🗨️ Bankunga ya kwenda nzila mosi ti lesu yai :

Kana Mo' Mona Menga
Kwisa na Yesu Kristo

III. Kusala Revisio –

† Nzambi tindaka bampasi mingi na bantu ya Ezipte sambu bo bakisa nde banzambi na bo vandaka na ngolo ve, kansi Mfumu Nzambi vandaka Nzambi ya kieleka. Nani lenda tuba ndambu ya bampasi yina ?
(Masa kumaka menga, makototo, banzini, bambembele, bambisi fwaka na maladi, bivimbu na bambisi ti na bantu, mvula ya matadi, mpimpa ya ngolo.)

III. Kulonga Lesu Yai –

➡ Kuyantika lesu :

Ata Farao me ndima ntete ve, ntangu lungaka nde yandi fweti pesa bana ya Israele nzila kukwenda. Ata na ntwala yo salamaka, Nzambi songaka bo mpila ya bo fweti yilama.

🏠 Developpement--Mambu ya nene ya lesu yai na banti 4 :

9.1 Nzambi songaka Moize nde kaka ndola mosi me bikala. Na nima, Farao ta basisa bo. Bo fweti tula menga ya mwana-dimeme na kielo ya nzo sambu Nzambi luta nzo na bo, bana na bo kufwa ve.

📖 Tangila bana : Kubasika 11 :1-7

1 Mfumu Nzambi tubaka na Moize nde :
« Mono ta tinda kaka ndola mosi ya nsuka. Na nima, Farao ta pesa beno nzila kukwenda...

12 :1,3 Ntangu yai, Mfumu Nzambi tubaka na Moize ti Aroni...nde : »...konso muntu fweti sola mwana-dimeme...konso nzo mbisi mosi.

...5, 7 Mbisi yina ya bo fweti dia, yo lenda vanda na kifu ve to mputa ve... Bo ta baka ndambu ya menga ya bambisi na bo. Bo ta pakula-pakula yo na bakielo ya banzo ya bo...

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗨️ Bana yimba ti kina sambu na kusonga nki me salama.

9.2 Nzambi songaka Moize nki mutindu bo fweti kudia mwana-dimeme yina. Yandi silaka nde ntangu Yandi mona menga na kielo ya nzo, Yandi ta luta sambu bo kufwa ve.

📖 Tangila bana : Kubasika 12 :8-13

8-10 Na mpimpa yango yina, bo ta yoka bambisi na tiya, ebuna bo ta dia yo ti mampa yina ke na nkisi ve...Konso ndambu yina ta bikala, beno fweti yoka...


11 ...Beno ta lwata... basandale na makulu, nti na maboko. Beno fweti dia yo nswalu-nswalu. Yai kele Nkisi ya Paki sambu na kukumisa Mono Mfumu Nzambi.

12 Na mpimpa yango yina, Mono ta kwenda kuluta na nsi ya Ezipte. Mono ta fwa konso mwana-mbuta ya bakala, bantu ti bambisi. Mono ta pesa banzambi yonso ya Ezipte ndola. Mono kele Mfumu Nzambi.


13 Beno ta tula na menqa na bakielo ya banzo na beno. Mono ta mona yo, ebuna Mono ta luta beno. Mpidina kufwa yina ya Mono ta fwa bantu ya Ezipte, yo ta bwila beno ve.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

9.3 Nzambi songaka bo mutindu kubambuka mpimpa yina konso mvula na fete a Paki.

 **Tangila bana :** Kubasika 12 :14-21, 26-27
14 Kilumbu yai ta vanda kilumbu ya beno fweti bambuka mambu ya Mono Mfumu Nzambi me sala beno...


16 ...Beno fweti kutana kisika mosi sambu na kusamba Mono. Beno lenda sala kisalu ve...kaka madia mpamba beno lenda lamba.


17 Beno fweti salaka nkinsi... Beno ta bambuka kilumbu ya Mono basisaka beno na nsi ya Ezipte ...Beno ti bana na beno, beno ta sala nkinsi yai tii kuna...

21 Moize bingaka bambuta yonso ya Israele, yandi tubaka na bo nde : « Beno kwenda kusola bana-mameme to bankombo sambu na bafami na beno. Beno fwa yo sambu na Nkinsi ya Paki.

26-27 Ntangu bana na beno kuyula beno nde : 'Nki disongidila ya nkinsi yai ?', beno ta vutula nde : 'Yai kele nkinsi ya Paki ya Mfumu Nzambi. Beto ke fwa mbisi sambu na kupesa Mfumu Nzambi makabu, sambu ntangu Yandi fwaka bantu ya Ezipte, Yandi lutaka banzo na beto. Yandi fwaka beto ve.' "

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

9.4 Bo pakula bakielo ya banzo na bo menga. Ebuna bantu yonso ya Israele lemfukaka na ndinga ya Nzambi pesaka Moize.

 **Tangila bana :** Kubasika 12 :22-23, 28


22 Beno baka...menga, ...beno pakula yo na bakielo ya banzo. Muntu kumeka ve na kubasika na nganda tii na suka.


23 Ntangu Mfumu Nzambi ta kwisa kuluta na nsi ya Ezipte sambu na kufwa bantu ya Ezipte,

Yandi ta mona menga na zulu ya bakielo. Mpidina Yandi ta pesa wanzio ya lufwa mpila ve kukota na banzo na beno sambu na kufwa beno.

28 Ebuna bo...salaka kaka mutindu Yandi songaka Moize ti Aroni.

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa lesu :

Kana bantu kwikilaka ndinga ya Nzambi songaka bo, bo tulaka menga na bakielo na bo. Konso fami ya tulaka menga, bantu fwaka ve na nzo yina.

Menga yina ke songa nde Nzambi ta tinda Mwana na Yandi, Yandi ta pesa menga na Yandi sambu na masumu na beto. Yesu Kristo fwaka ye telamaka na lufwa, yonso sambu na beto. Bubuyai, konso muntu yina tula ntima na Yandi, yandi ta guluka.

Devoir sambu na bakristo :

Devoir mono ke pesa beno bakristo kele kusonga histoire yai na fami ti na banduku na nge na mposi yai. Kana bantu yina me tula ntima na Yesu ntete ve, samba Nzambi nde Yandi benda bo kuguluka.

Kubinga bana ya zaba Yesu ntete ve :

Kansi nge mosi, keti nge me ndima nde menga Yandi pesaka, yo vandaka sambu na masumu na nge ? Kana nge zaba yo mbote-mbote ve, bubuyai nge lenda tula Yandi ntima. Nge lenda binga zina na Yandi ata na konso ntangu, ata na konso kisika. Nge lenda lomba Yandi kugulusa nge.

Kana ntangu lunga--

Longa Mikanda ya Bible --

Mikanda ya Kuwakana ya Ntama beto lenda kabisa na bandambu yai : Mikanda ya Moize, Mikanda ya Histoire ya Bayuda, Mikanda ya Poesi, ti Mikanda ya Mbikidulu to Profesi. Kubasika kele mukanda ya zole na Mikanda ya Moize. Mpeve ya Nzambi twadisaka Moize kusonika mikanda yina, ti Moize kele muntu ya nene na kati ya histoire ya mikanda yina.

===NSUKA YA LESO 9



Leso 9

***Beno ta
tula
menga
na
bakielo
ya***

banzo na beno.

***Mono ta mona yo, ebuna Mono
ta luta beno.***

***Mpidina, mpila Mono ta fwa
bantu ya Ezipte, yo ta bwila
beno ve.***

Kubasika 12 :13

Leso 10. Mwana ya ntete fwaka na konso fami, ebuna Farao pusaka Israele kubasika.

Kubasika 12 :29-51

I. Preparasio ya moniteur --

☉ Kikuma ya lesa :

Beto tula ntima na menga ya Mwana-Dimeme ya kitoko Nzambi me pesa beto, Yesu Kristo Mwana na Yandi.

♥ **Verse ya kulunguka** : 13 *Kana menga ya bangombe ti bankombo...sukulaka bantu (na bilumbu ya ntama), 14 Nki mutindu kuluta diaka menqa ya Kristo...ta sukulu ntima na beno...sambu beno lenda sadila Nzambi ya moyo !...*
Baebreo 9 :13-14

🗨️ **Bankunga ya kwenda nzila mosi ti lesa yai :**

Kana Mo' Mona Menga
Kwisa na Yesu Kristo

II. Kusala Revisio –

Beto me mona nde Nzambi me songa bantu ya Israele nde Yandi ti wanzio na Yandi ta luta na banzo ya Ezipte na mpimpa.

- † Nzambi ta sala nki ?
(Yandi ta fwa mwana ya ntete ya bakala na konso fami, bantu ti bambisi.)
- † Bantu fweti sala nki sambu ndola yina kusimba bo ve ?
(Bo fweti kufwa mwana dimeme, bo pakula menga na yo na kielo na bo.)
- † Ntangu Nzambi mona menga ya mwana-dimeme, Yandi ta sala nki ?
(Yandi ta luta nzo yina. Muntu ta fwa ve.)

III. Kulonga Lesa Yai –

➡ Kuyantika lesa :

Nzambi me songa bantu nde na mpimpa, Yandi fweti fwa mwana ya ntete ya bakala na konso fami, bantu ti bambisi. Yandi mpi me wila bo mawa. Yandi me songa bo mpila bo lenda basika na ndola yina. Kaka bo kwikila ndinga na Yandi, bo lemfuka na kutula menga ya mwana-dimeme na kielo ya

nzo na bo. Konso ntangu, mambu fweti kubwa kaka na mpila ya Nzambi me tuba yo. Yo yina---

🏠 **Developpement--Mambu ya nene ya lesa yai na banti 4 :**

10.1 Na zero ere na mpimpa, Nzambi fwaka bana ya ntete ya bakala yonso na mpila Yandi tubaka. Yo yina, Farao ti bantu yonso ya Ezipte pusaka bantu ya Israele kubasika nswalu.

📖 **Tangila bana** : Kubasika 12 :29-33

29 *Kilumbu yo yina, na midi ya mpimpa, Mfumu Nzambi fwaka bana ya ntete yonso ya babakala na nsi ya Ezipte, katuka mwana ya mfumu...*

30 *Mfumu ti bantu yonso telamaka na mpongi, ebuna bidilu vandaka mingi na nsi yonso, sambu konso nzo vandaka ti mvumbi.*

31 *Na mpimpa yina, mfumu ya Ezipte bingaka Moize ti Aroni nde : "Beni ti Israele, beno sasuka, beno katuka awa. . ."*

32-33 *Beni baka mameme, bankombo ti bangombe na beni, beni kwenda. . ."* Bantu ya Ezipte pusaka bantu ya Israele ngolo na kubasika nswalu na nsi na bo...

? Yula bana bakesio ke tadila baverse yai.

🗨️ Bana bageste to mwa-seneti ya ke songa nki me salama.

🗨️ Bana yimba ti kina sambu na kusonga nki me salama.

10.2 Bantu ya Israele basikaka nswalu, ti bantu ya Ezipte pesaka bo bima ya wolo.

📖 **Tangila bana** : Kubasika 12 :35-39

35 *Bantu ya Israele salaka mutindu Moize songaka bo, bo lombaka bilele na bantu ya Ezipte ti bima-makutu ya bo salaka na arza ti wolo.*

36 *Mfumu Nzambi pesaka bantu ya Ezipte ntima ya mbote, yo yina bo wilaka bantu ya Israele, ebuna bo pesaka bo bima yina ya bo lombaka...*

37 *Bantu ya Israele...simbaka nzila na kwenda . . .Bo vandaka bafami kiteso ya 600,000.*

38 Bantu ya nkaka mingi kwendaka ti bo.
Mameme, bankombo ti bangombe kwendaka
mpi mingi.

39 Bo lambaka mampa kukonda nkisi na yo ti
nataka yo ti bo na kubasika ya Ezipte, sambu bo
basikaka na Ezipte nswalu kukonda kuyidika
madia ya nzila.

? Yula bana bakestio ke tadila baverse yai.

👥 Bana bageste to mwa-seneti ya ke songa
nki me salama.

👂 Bana yimba ti kina sambu na kusonga nki me
salama.

10.3 Bantu ya Israele me zinga na Ezipte bamvula 430, kansi na mpimpa yina, bo yonso basikaka.

📖 **Tangila bana :** Kubasika 12 :40
40 Bantu ya Israele vandaka me zinga na nsi ya
Ezipte bamvula 430.

? Yula bana bakestio ke tadila baverse yai.

👥 Bana bageste to mwa-seneti ya ke songa
nki me salama.

👂 Bana yimba ti kina sambu na kusonga nki
me salama.

10.4 Nzambi songaka bo kubambuka tii kuna nki Yandi me sala.

📖 **Tangila bana :** Kubasika 13 :3-8
13 :3-5 Moize tubaka na bantu ya Israele nde...
Mfumu Nzambi tubaka mbote-mbote na
bankaka na beno nde Yandi ta pesa beno ntoto
ya bantu ya Kanana... Ntangu Yandi ta nata
beno na nsi yango, beno fweti salaka nkisi
konso mvula...

...8 Na kilumbu yango, beno ta tendula bana ya
beno nde : 'Nkisi yai ke songa beto mambu ya
Mfumu Nzambi salaka sambu na beto ntangu
Yandi basisaka beto na Ezipte.'

? Yula bana bakestio ke tadila baverse yai.

👥 Bana bageste to mwa-seneti ya ke songa
nki me salama.

👂 Bana yimba ti kina sambu na kusonga nki
me salama.

>|< Kumanisa lesa :

Ebuna bana ya Israele basikaka na Ezipte. Farao ti
bantu yonso ya Ezipte vandaka kupusa bo nde,
“Beni kwenda nswalu kaka.” Bo vandaka
kukwenda ti bana yonso na bo. Mbuta na bafami
na bo fwaka ve, sambu Nzambi monaka menga ya
mwana-dimeme na kielo na bo. Ata bantu ya
nkaka ya Ezipte, kana bo mpi kwikilaka Nzambi,
kana bo mpi salaka mpila Yandi tubaka, bo mpi
gulukaka. Bo mpi basikaka, ti Nzambi vandaka
kulunda bo. Kiteso mosi na beto bubuyai. Konso
muntu ya tula ntima na menga ya Yesu Kristo,
yandi ta basika na kimpika ya Satana. Yandi ta
guluka.

👉 Devoir sambu na bakristo :

Beno bakristo, devoir mono ke pesa beno mposo
yai kele kuyindula bantu ya nge zaba ya me tula
ntima na Yesu ntete ve. Yantika kutanga bazina na
bo na ntwala ya Yesu sambu Yandi benda bo, bo
kuguluka.

✚ Kubinga bana ya zaba Yesu ntete ve :

Mbala ya nkaka nge mosi zaba Yesu ntete ve. Nge
me wa nde Yesu pesaka menga na Yandi sambu na
kufuta mfuka ya masumu na nge. Kansi nge me
tula Yandi ntima ntete ve. Nge kele ve na kati ya
bantu ya me basika na nzila ya masumu. Kansi nge
lenda vanda na kati. Yesu me sila nde Yandi ta
buya muntu ve ya zola kwisa na Yandi (Yoane
6 :37b).

Kaka kwikila bubuyai nde Yesu Mwana-Nzambi
fwaka na zulu ya kulunsi sambu na mbi ya nge,
kwikila nde Yandi telamaka na lufwa, binga Yandi
kukota luzingu ti ntima na nge. Zenga nde nge ta
landa Yandi. Yandi ta gulusa nge bubuyai.

Kana ntangu lunga--

📖 Longa Mikanda ya Bible --

Bazina to batitre ya konso mukanda ke songa na
nkufi mambu ya nene ya kele na kati.
Nki kele na Kuyantika ? (Kuyantika ya bima yonso)
Kubasika ? (Kubasika ya dikanda ya Israele na
kimpika na Ezipte)
Bana yimba nkunga, “Mikanda ya Moize »

===NSUKA YA LESO 10



Mpasi ya nsuka-
Mwana ya
bakala ya
mbuta ya konso
fami kufwaka
kana menga
vandaka ve na
bibaka ya kielo.

Leso 10

***Kana
menga ya
bangombe
ti
bankombo***

***sukulaka bantu (na bilumbu ya
ntama),***

***nki mutindu kuluta diaka
menga ya Kristo...***

ta sukula ntima na beno ...

***sambu beno lenda sadila Nzambi
ya moyo !***

Baebreo 9 :13-14

Leso 11. Nzambi twadisaka Israele na nzila, ti kangulaka Nzadi ya Mbwaki sambu bo sabuka.

Kubasika 13 :17-22--14 :1-31

I. Preparasio ya moniter --

🕒 Kikuma ya lesu :

Nzambi ya ngolo yonso, Yandi keke na mpila kusadisa beto, ata beto mona mpila ve. Yo yina, bana ta tula ntima na Yandi.

♥ Verse ya kulonguka :

Moize tubaka nde : « Beno mona boma ve. Vanda na kikesa. Mpidina, beno tala nki mutindu Mfumu Nzambi ta gulusa beno bubu yai...Kubasika 14 :13a

🗣️ Bankunga ya kwenda nzila mosi ti lesu yai :

Mfumu Zaba Nzila na Mono
Nki Mutindu Moize Sabukaka Nzadi ya Mbwaki ?

II. Kusala Revisio –

⤴ Na lesu me luta, beto monaka nde na nsuka-nsuka, Farao pesaka bantu ya Israele nzila nde bo basika na Ezipte. Yandi mpi pusaka bo kukwenda nswalu. Beto monaka nde ndambu bantu ya nkaka kwikilaka Nzambi ti kwendaka nzila mosi ti bo.

III. Kulonga Lesu Yai –

🕒 Kuyantika lesu :

Beto me mona mpila nde kiese ya lumbu mosi, yo lenda kuma mawa lumbu na nima. Bana ya Israele kwendaka na Ezipte na kiese. Farao yambaka bo. Kansi na nima, Farao ya nkaka kumisaka bo bampika. Kiese kitukaka mawa.

Na lesu ya bubuyai, bantu ya Israele yantikaka na kiese, sambu Farao me pesa bo nzila kubasika na kimpika. Keti bo ta tula ntima na Nzambi, ata na ntangu ya kiese to ya mawa ? Beto landa histoire ya Bible diaka na Kubasika 13.

🕒 Developpement--Mambu ya nene ya lesu yai na banti 4 :

11.1 Nzambi twadisaka bantu ya Israele na nzila ya Nzadi ya Mbwaki, ti bo nataka mikwa ya Yozefi, mpila yandi songaka bo. Na mwini,

Nzambi twadisaka bo na dituti ya nene, ti na mpimpa, na dititi ya tiya.

📖 **Tangila bana :** Kubasika 13 :17-21
17-18 *Ntangu mfumu ya Ezipte pesaka bantu ya Israele nzila kukwenda, Nzambi nataka bo... kulanda nzila ya zelo na zelo na ndambu ya Nzadi ya Mbwaki...*

19 *Moize nataka mikwa ya Yozefi mutindu yandi me lomba. . .*
(*Bambuka Kuyantika 50 :25 : Yozefi songaka bampangi na yandi nde : « Ntangu Nzambi ta lungisa mambu yai [kunata bo na nsi ya Kanana], beno ta katula nitu na mono awa na kisika yai. »*)

20 *Bantu ya Israelekwendaka kutunga camp na bo...penepene na ntoto ya zelo na zelo.*

21 *Na mwini, Mfumu Nzambi vandaka kwenda na ntwala na bo na kati ya dituti ya nene sambu na kusonga bo nzila. Ebuna na mpimpa... na kati ya tiya ya ngolo . . .*

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

11.2 Farao balulaka mabanza ti landaka bo na basoda sambu na kuvutula bo na kimpika.

📖 **Tangila bana :** Kubasika 14 :1-9

1-2 *Mfumu Nzambi tubaka na Moize nde : Songa bantu ya Israele...bo kwenda kutunga camp na bo...na lweka ya masa...*

4 *Farao...ta landa beno. Lukumu na Mono ta monika, ntangu Mono ta bedisa yandi ti basoda na yandi. Mpidina bantu ya Ezipte ta zaba nde Mono keke Mfumu Nzambi. »*

5 *Ntangu Farao waka nde bantu ya Israele me tina, yandi ti bantu na yandi...tubaka nde : « Nki ...beto me sala ? Beto me pesa bantu ya Israele nzila kutina kimpika ! Bo ta sadila beto kisalu diaka ve !”*

7-9...(Farao) bakaka bapusu-pusu na yandi yonso...ya mbote-mbote 600 ti basoda, ti

bampunda na bo... Bo yonso landaka bantu ya Israele. Bo kwisaka kukanga bo na kisika ya bo tungaka camp. . .

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👂 Bana yimba ti kina sambu na kusonga nki me salama.

11.3 Bantu ya Israele vandaka na boma mingi, kansi Moize pesaka bo kikesa.

📖 **Tangila bana :** Kubasika 14 :10-18

10... Bantu ya Israele monaka bantu ya Ezipte vandaka kulanda bo. Ebuna boma simbaka bo. Bo yantikaka kudidila Mfumu Nzambi na ndinga ya ngolo.

11 Bo nganinaka Moize nde : "...Nge kwisaka kunata beto kwaku na ntoto ya zelo na zelo sambu beto kufwa ?

13-14 Moize tubaka nde : « Beno mona boma ve. Beno vanda na kikesa, ebuna beno tala nki mutindu Mfumu Nzambi ta gulusa beno bubu yai. Beno ta mona diaka ve bantu ya Ezipte... Mfumu Nzambi ta nwanina beno..."

15-16 Mfumu Nzambi tubaka na Moize nde : . . « Simba nti na nge. Tandula diboko na nge na zulu ya masa. Ebuna yo ta kabana. Mpidina bantu ya Israele lenda sabuka na zulu ya zelo.

17...Bantu ya Ezipte...ta landa beno. Ebuna lukumu na Mono ta monika ntangu Mono ta bedisa mfumu ya Ezipte, basoda na yandi yonso, bapusupusu na yandi, ti bantu yina ke nata yo.

18 Bantu ya Ezipte ta zaba nde Mono kele Mfumu Nzambi...

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👂 Bana yimba ti kina sambu na kusonga nki me salama.

11.4 Nzambi sabukaka bo na Nzadi ya Mbwaki,

kansi Yandi bedisaka Farao ti armee na yandi. Yo yina, bantu ya Israele bakisaka kinene ya Nzambi.

📖 **Tangila bana :** Kubasika 14 :19-31

19 Wanzio ya Nzambi (na dituti) yina vandaka kwenda na ntwala ya bantu ya Israele, yandi kwisaka kuvanda na nima na bo. . .

20...Dituti yango vandaka ndambu ya nkaka mpimpa ve, ndambu ya nkaka mpimpa. Mpidina ...basoda ya Ezipte monaka mpila ve kukuma penepene na bantu ya Israele.

21-22 Moize tandulaka diboko na yandi na zulu ya masa, ebuna...masa kabanaka na ndambu zole. Bantu ya Israele sabukaka na zulu ya zelo. Masa vandaka bonso bibaka zole.

23-24 Bantu ya Ezipte kwisaka kulanda bo. Bo kotaka na masa...na suka yonso. Mfumu Nzambi...talaka...basoda ya Ezipte ti kumisaka bo kisakasaka.

25 Makulu ya bapusupusu na bo, Yandi kangisaka yo ngolo sambu yo tambula na mpasi. Bantu ya Ezipte tubaka nde : «...Mfumu Nzambi ke nwanina bo. »

26-28 Mfumu Nzambi tubaka na Moize nde : « Tandula diboko na nge na zulu ya masa sambu masa kuvutuka mutindu yo vandaka ntete... ebuna masa vutukaka. Yo fikaka bapusupusu... Bantu yonso kufwaka.

29 Kansi bantu ya Israele tambulaka na zulu ya zelo na kusabuka masa...

30-31 Na kilumbu yina, Mfumu Nzambi gulusaka bantu ya Israele na maboko ya bantu ya Ezipte... Bo monaka mpi ngolo ya Mfumu Nzambi... Ebuna bo tinaka Mfumu Nzambi boma. Bo tulaka Yandi ntima...

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👂 Bana yimba ti kina sambu na kusonga nki me salama.

>|< Kumanisa lesa :

Ntangu bantu ya Israele monaka nde Farao vandaka kulanda bo diaka, bo monaka mpila ve kubasika. Masa ya nene ya Nzadi ya Mbwaki vandaka na ntwala na bo. Bo lenda kwenda wapi ? Bo monaka mpila ve kubasika. Kansi diboko ya Nzambi kele nkufi ve. Muntu lenda kanga Yandi ve. Konso mambu ya me salama, yo lendaka kukanga Yandi ve. Yandi kele Nzambi Mpungu.

 Devoir sambu na bakristo :

Na luzingu na beto mpi, beto lenda mona bonso bampasi me lutila beto. Kansi bambuka nde Nzambi yina sabukaka Moize ti bantu ya Israele, Yandi kele Nzambi na beto mpi. Yandi lenda sadisa beto, ata nzila ke monika ve.

Devoir mono ke pesa beno bakristo mposho yai, yo yai : Konso lumbu na mposho yai, tula bampasi yonso na maboko ya Nzambi. Yandi kele ngolo !

 Kubinga bana ya zaba Yesu ntete ve :

Keti nge me yambaka Yesu Kristo na ntima ti na luzingu na nge ? Beto bantu yonso, beto me bikisa nzila ya Nzambi. Beto kele bankwa-mbi. Beto me sala masumu na meso ya Nzambi. Beto kele na makambu ti Yandi sambu na masumu na beto. Ata beto sala ngolo, yo ta tula beto mbote ti Yandi ve.

Kansi, bambuka mpila Nzambi kangulakaka nzila sambu na bantu ya Israele. Kiteso mosi, Nzambi me kangula nzila nde beto bankwa-mbi lenda kwisa na Yandi. Nzila yina kele Yesu Kristo, Mwana ya Nzambi. Yesu Yandi mosi tubaka nde, “Mono kele nzila,” (Yoane 14 :6).

Nzila ya nkaka ikele ve kukuma na Nzambi.

Ntumwa Piere tubaka nde, “Bantu lenda guluka kaka na Yandi, sambu Nzambi me pesaka bantu zina ya muntu ya nkaka ve awa na nsi-ntoto yina lenda gulusa bo” (Bisalu 4 :12).

Kana nge me yilama kuyamba Yesu, na nima ya ecodim, kwisa vanda awa na bakiti yai. Beto ta vanda na kiese kusadisa nge.

Kana ntangu lunga--** Longa Mikanda ya Bible –****Niveau Primaire :**

Bible ke songa beto histoire ya kieleka. Yo kele ve kaka mambu ya bantu me yindula. Yo kele mambu ya salamaka ya kieleka na nsi-ntoto yai. [Bana tuba na kimvuka mikanda ya Moize.]

Niveau Secondaire :

Mukanda ya Kuyantika songa beto histoire ya kieleka katuka na luyantiku kiteso ya bamvula 4,000 na ntwala ya Yesu. Yo songa beto nsilulu ya Nzambi nde Mesia fweti kwisa. Yo songa beto luyantiku ya dikanda ya fweti pesa beto Mesia, mpila Yesu butuka na dikanda ya Abrahami sambu na kuvanda Mvulusi ya bantu yonso. Yo songa mpila dikanda ya Abrahami yelaka na batribu 12, ti mpila bo kwendaka na Ezipte. Bo kwendaka na kiese, kansi na nima, bo kumaka bampika na mpasi.

Mukanda ya Kubasika yantika kiteso ya bamvula 1400 na ntwala ya Yesu. Mukanda ya Kubasika ke songa mpila bantu ya Israele basikaka na kimpika na Ezipte.

[Bana tuba na kimvuka mikanda ya Moize.]

===NSUKA YA LESO 11

Leso 11

Nzambi kangulaka masa sambu bantu ya Israele sasuka.
Yandi kangaka yo sambu armee ya Ezipe kulanda bo ve.



**Moize
tubaka
nde :
Beno
mona**

boma ve.

Vanda na kikesa.

***Mpidina, beno tala nki
mutindu Mfumu Nzambi ta
gulusa beno bubu yai...***

Kubasika 14 :13a

Leso 12. Bantu ya Israele kumisaka Nzambi na bankunga.

Kubasika 15 :1-21

I. Preparasio ya moniteur --

🕒 Kikuma ya lesa :

Bana ta kuwa nzala na kumisa Nzambi na mambu yonso ya mbote Yandi sala sambu na bo.

♥ Verse ya kulonguka :

Mfumu Nzambi kele ngolo na mono. Mono ke yimba sambu na Yandi. Kele Yandi me gulusa mono.

Yandi kele Nzambi na mono...Yandi kele Nzambi ya tata na mono, yo yina mono ta kumisa Yandi.

Kubasika 15 :2

🗨️ Bankunga ya kwenda nzila mosi ti lesa yai :

Bandeke Kele Yimba

Kumisa Nzambi !

Kumisa Zina ya Yesu

II. Kusala Revisio –

† Nki mutindu Nzambi manisaka Farao ti basoda yonso na yandi ?

(Bo landaka bantu ya Israele tii na Nzadi ya Mbwaki. Na nima bantu ya Israele me sabuka, Nzambi songaka Moize kukulumuna diboko ti nti na yandi, ebuna masa vutukaka. Farao ti basoda na yandi yonso fwaka na masa.

III. Kulonga Lesa Yai –

🕒 Kuyantika lesa :

Nki beto fweti sala kana Nzambi me sadisa beto na ntangu ya mpasi ? Beto fweti tonda Yandi ti kumisa zina na Yandi. Nzambi me sadisa bantu ya Israele na nki bampasi ?

~Yandi me katula bo na kimpika.

~Yandi me gulusa bo na basoda ya Farao ya vandaka kulanda bo sambu na kukangisa bo diaka.

~Yandi me manisa bambeni ya me pesa bo mpasi.)

Ntangu yai, bambeni kele kulanda bantu ya Israele diaka ve. Bo kele bampika diaka ve. Bo kele libre.

Nki bo ta sala ?

🏠 Developpement--Mambu ya nene ya lesa yai na bandambu 3 :

12.1 Moize ti bantu ya Israele yimbaka nkunga na Mfumu Nzambi.

📖 **Tangila bana :** Kubasika 15 :1-2

1 Ntangu yai, Moize ti bantu ya Israele yimbaka nkunga yai sambu na kukumisa Mfumu Nzambi : « Mono ke yimbila Mfumu Nzambi nkunga sambu Yandi me songa lukumu ya nene na Yandi. Yandi me losa na masa bampunda ti bantu ya vandaka kunata yo.

2 Mfumu Nzambi me songa ngolo na Yandi yonso sambu na mono.

Yo yina, mono zola kukumisa Yandi. . .

Yo yina, mono zola kuyimbila Yandi bankunga.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗨️ Bana yimba ti kina sambu na kusonga nki me salama.

12.2 Bo tangaka na nkunga mambu ya nene ya Nzambi me sala sambu na bo—mambu kuluta yina ya banzambi ya nkaka lenda sala.

📖 **Tangila bana :** Kubasika 15 :6-17

6-7 « Mfumu, diboko na Nge ya kibakala kele ngolo mingi mpenza... Lukumu na Nge kele ya kuyituka mpenza...

11 “Nani nzambi ya nkaka bonso Nge, Mfumu?.. Nani ya nkaka lenda sala mambu ya kuyituka bonso Nge ?...


13 Na mawa na Nge, Nge me twadisa bantu ya Nge me gulusa...

14-15 Bantu ya nkaka ta wa boma ntangu bo wa mambu yai...


Bantu yonso ya nsi ya Kanana, boma ti matekita ta simba bo.

? Yula bana bakestio ke tadila baverse yai.


👥 Bana bageste to mwa-seneti ya ke songa nki me salama.


 Bana yimba ti kina sambu na kusonga nki me salama.


12.3 Miriam twadisaka bankento kuyimbila Nzambi na mwa-bangoma.

 **Tangila bana :** Kubasika 15 :20-21
20 Ebuna profete ya nkento Miriami, mpangi ya Aroni, yandi bakaka mwa-ngoma. Yandi yantikaka kubula yo.
Bankento yonso ya Israele landaka yandi ti bangoma na bo. Bo kwendaka kulanda yandi kubula ngoma ti kukina.

21 Miriami vandaka na ntwala na bo ke kwenda kuyimba nde :
« Beno yimba na kukumisa Mfumu Nzambi , sambu Yandi me songa lukumu na Yandi ya nene-nene...

 Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa leso :

Bana ya Israele yimbilaka Nzambi sambu na kiese na mpila Yandi me gulusaka bo. Beto mpi lenda bambuka mambu yonso ya mbote Nzambi me sala sambu na beto. Beto lenda yimbila Yandi sambu na yonso ya mbote ya Yandi me sala.

Bana Yimba :

Nkunga, Nki Mutindu Moize Sabukaka Nzadi ya Mbwaki ?

Devoir sambu na bakristo :

Devoir ya mono ke pesa beno bakristo na mposho yai, yo yai : Kutanga konso lumbu mambu ya mbote ya Nzambi me sala nge, ti kumisa Yandi na kutuba na nge ti na bankunga.

Kubinga bana ya zaba Yesu ntete ve :

Nzambi gulusaka bantu ya Israele na kimpika. Bible ke tuba nde beto yonso vandaka bampika ya masumu. Na Yoane 8 :34, beto tanga nde Yesu

tubaka, “Konso muntu yina ke salaka masumu, yandi kele mpika ya masumu.” Roma 3:23 ke songa beto nde beto yonso me sala masumu. Yo yina, kukonda Yesu, beto yonso kele bampika ya masumu.

Kansi Yesu, Mwana ya Nzambi, kwisaka sambu na kukatula beto na kimpika ya masumu na mpila nde beto sadila Nzambi.

Keti Yesu me katula nge na kimpika ya masumu ? Ketu nge zaba yo mbote-mbote ? Ketu nge lenda bambuka ntangu Yandi salaka yo ?

Kana nge mona keti-keti na mambu yina, kwisa vanda awa na bakiti yai na nima ya ecodim. [Moniteur, songa wapi.] Beto ta kwisa kusadisa nge kuzenga mambu yina mbote-mbote sambu nge mpi vanda mukristo.

Kana ntangu lunga—

Kulonga Mikanda ya Bible –

- Bantu ya nene na mukanda ya Kuyantika vandaka nani ?
(Nzambi, Adami, Eva, Abele, Noa, Abrahami, Izaki, Yakobi, Yozefi)
- Bantu ya nene na mukanda ya Kubasika kele nani ?
(Moize ti Aroni. Moize ti Aroni ta vanda muntu ya nene na mikanda 5 yonso ya Moize.)
- Mukanda ya tatu ya Bible, na nima ya Kuyantika ti Kubasika, kele nki ? [Moniteur, kana bana bambuka ve, bo yimba nkunga, « Mikanda ya Moise » sambu na kubambuka.]
(Ee, mukanda ya Levi.) Levi vandaka mosi ya makanda to tribu 12 ya Israel. Levi, mwana ya Yakobi, tata ya dikanda yina. Moize ti Aroni vandaka bantu ya dikanda ya Levi. Nzambi solaka dikanda ya Levi kusala bisalu ya tadilaka bisambu na Yandi. Yo yina, mukanda ya Levi kele bansiku Nzambi pesaka Bayuda nki mutindu bo fweti samba Yandi.

==NSUKA YA LESO 12



Leso 12

**Mfumu
Nzambi
kele
ngolo na
mono.
Mono ke**

Bantu ya Israele yimbaka ti kinaka sambu na kumisa Nzambi na mpila Yandi me gulusa bo.

yimba sambu na Yandi.

Kele Yandi me gulusa mono.

Yandi kele Nzambi na mono.

Yandi kele Nzambi ya tata na mono, yo yina mono ta kumisa Yandi.

Kubasika 15 :2

Leso 13. Nzambi sadisaka bantu na Yandi diaka ti diaka.

Kubasika 15 :22-27, 16 tii na 17 :1-7

I. Preparasio ya moniteur

🕒 Kikuma ya lesu :

Kana bana ke konda bima ya kele mfunu, bo bokuta ve, kansi bo lomba Nzambi, sambu Nzambi zola sadisa bantu na Yandi.

♥ **Verse ya kulonguka** : ...konso ntangu beno ke samba Nzambi, lomba Yandi konso mambu ya beno ke na yo mfunu, Ntangu beno ke lomba Yandi yo, pesa Yandi mersi. Filipi 4 :6b

🗣️ Moniteur, yilama na bankunga ya kwenda

nzila mosi ti lesu yai :

Lomba na Nzambi Kaka
Nzambi Ta Kuwa Nge

II. Kusala Revisio –

- ⤴ Na baleso me luta, beto monaka nde Nzambi sadisaka bantu ya Israele nki mutindu ?
(Yandi basisaka bo na kimpika na Ezipte. Yandi bedisaka bambeni na bo ya zolaka kukanga bo.)
- ⤴ Bo salaka nki na nima Nzambi gulusaka bo ?
(Bo kumisaka Yandi na bankunga ti na kukina.)

III. Kulonga bana lesu yai –

➡ Kuyantika lesu :

Konso lumbu beto kele na mambu ya kele mfunu na luzingu na beto. Ata Nzambi me sadisa beto mazono, beto ke na mfunu ya bima ya nkaka bubu yai. Konso lumbu, beto kele na mfunu ya mupepe, ya masa, ya madia, ti ya bima ya nkaka.

Nzambi me sadisa bantu ya Israele ngolo. Yandi me basisa bo na mpasi ya kimpika na Ezipte. Kansi na nima, bo vandaka na mfunu ya bima ya nkaka. Beto tala bubuyai nki mutindu Nzambi sadisaka bo na bima yina mpi.

🌟 **Developpement--Mambu ya nene ya lesu yai na banti 3 :**

13.1 Nzambi sadisaka bantu ya Israele ntangu bo kondaka masa ya mbote ya kunwa.

📖 **Tangila bana** : Kubasika 15 :22-27

22 Moize songaka bantu ya Israele kukanga bima sambu bo katuka pana na lweka ya nzadi ya Mbwaki. Bo simbaka nzila kukwenda na ntoto ya zelo na zelo... Bo tambulaka bilumbu tatu... kansi bo monaka masa ve.

23 Ntangu yai, bo kumaka na kisika...ya masa vandaka ndudi mingi. Bo monaka mpila ya kunwa yo ve...

24 Bantu yantikaka kubokutila Moize nde :
« Nki beto lenda nwa ntangu yai ? »

25 Moize bondilaka Mfumu Nzambi, ebuna Yandi songaka yandi nti. Ntangu yandi losaka yo na kati ya masa, yo kumaka mbote.

27 Na nima, bantu ya Israele kwisaka kukuma na bwala Elimi. Pana vandaka banto ya masa 12, ti maba 70. Bo tungaka camp na bo kuna na lweka ya masa.

? Yula bana bakestio ke tadila baverse yai.

🗣️ Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

13.2 Nzambi sadisaka bo na madia ya katukaka na zulu ntangu bo vandaka na nzala.

📖 **Tangila bana** : Kubasika 16 :1-35

1 Bantu yonso ya Israele...kwisaka kukuma na nseke ya zelo...

2-3 Bantu yonso bokutilaka Moize ti Aroni kuna nde : “Mbote kana Mfumu Nzambi fwaka beto na Ezipte... Beno me nata beto awa. . . sambu beto kufwa na nzala.”

4 Mfumu Nzambi tubaka na Moize nde : « Ntangu yai, Mono ta tindila beno madia ya ta katuka na zulu. Konso kilumbu, bantu fweti...lokuta madia ya me fwana sambu na kilumbu yina...

5 Na kilumbu ya sambanu, bo fweti lokuta madia sambu na bilumbu zole...

8 Moize tubaka... nde: “Mfumu Nzambi...ta pesa beno mbisi na nkokila, ebuna mampa na suka...

...14-15 Ntangu malulu yumaka, ntoto yonso fulukaka na bima ya fioti-fioti bonso bimpusu ya kwakere. Ntangu bantu ya Israele monaka yo...bo yulanaka bo na bo nde : « Yai nki ? » Moize tubaka na bo nde : « Yai kele madia ya Mfumu Nzambi me pesa beno. Beno dia...

21-26 Konso suka, bo vandaka kulokuta bima yina, konso muntu kiteso ya yandi vandaka na yo mfunu... Na kilumbu ya sambanu, bo lokutaka madia ya bilumbu zole... Ebuna Moize tubaka na bo nde...na Kilumbu ya Kupema, yo ta monika ve.”

...31 Bantu ya Israele pesaka madia yina “Mana.” Yo vandaka...ya mpembe, ntomo na yo bonso mikati ya bo me sala na bwiki.

35 Bantu ya Israele vandaka kudia mana bamvula 40 tii kuna bo kwisaka...na nsi ya Kanana.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👂 Bana yimba ti kina sambu na kusonga nki me salama.

6 Mono ta telama na ntwala na nge... Nge ta bula ditadi, ebuna masa ta basika sambu bantu kunwa. » Moize salaka mpidina na meso ya bambuta ya Israele (ye masa basikaka, bo yonso nwaka).

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👂 Bana yimba ti kina sambu na kusonga nki me salama.

>|< Kumanisa leso :

Beto yonso kele na bima ya beto ke na yo mfunu. Mbala mingi, bonso bantu ya Israele, beto ke bokutaka. Kansi Nzambi zola beto kusamba. Yandi zola beto kutula Yandi ntima. Yandi ZOLA sadisa bantu na Yandi.

👋 Devoir sambu na bakristo :

Devoir mono ke pesa beno bakristo, beno ya zaba Yesu dezia na ntima na beno, yo yai : Na mposo ke kwisa, beno bokuta ve, kansi beno samba Nzambi konso lumbu. Beno lomba Yandi bima yonso ya beno ke na yo mfunu.

✝ Kubinga bana ya zaba Yesu ntete ve :

Kansi kana nge zaba Yesu ntete ve na ntima na nge, kana nge me tula Yandi ntima ntete ve kugulusa nge, nge me kuma mwana ya Nzambi ntete ve. Nge me bikala na nganda ya fami ya Nzambi.

Kansi yo fweti vanda mpidina ve. Nzambi zola nde konso muntu kuguluka, konso muntu balula ntima, konso muntu kuma mwana ya fami na Yandi. Nge fweti kaka ndima nde nge me sala mambu ya Nzambi ke zola ve. Beto binga mambu yina « masumu. » Masumu me zenga kinduku ya nge ti Nzambi. Kansi Nzambi zola nge mingi. Yo yina, Yandi tindaka Mwana na Yandi Yesu Kristo sambu na kugulusa nge. Yesu fwaka na zulu ya kulunsi bonso nkailu to makabu ya kufuta mfuka ya masumu na nge ti ya beto yonso. Yandi telamaka na lufwa, ti Yandi vutukaka na zulu.

Bubuyai, maboko na Yandi kele ya kukangula sambu na kuyamba konso nani ta kwisa na Yandi na lukwikilu. Keti nge ta kwisa na Yandi bubu yai ?

13.3 Nzambi pesaka bo masa diaka.

📖 **Tangila bana :** Kubasika 17 : 1-7

1-2 Bantu yonso ya Israele katukaka na ntoto ya zelo na zelo... Bo kumaka na kisika yai Refidimi. Bo tungaka camp kuna, kansi na kisika yango, masa ya kunwa vandaka ve. Yo yina, bantu yantikaka kuyangisa Moize...

3...Nzala ya masa simbaka bo mingi, bo bokutilaka Moize diaka nde : “...Keti nge nataka beto awa sambu beto fwa na nzala ya masa...?”

4-5...Moize didilaka Mfumu Nzambi ngolo... Mfumu Nzambi tubaka na yandi nde : “Binga bambuta...ya Israele... Nata mpi nti na nge...”

Kaka binga Yandi sika ya nge kele. Songa Yandi nde nge me sala masumu, kansi bubuyai nge ke zola kubalula ntima, kutula ntima na Yandi. Yandi ta yamba nge na fami na Yandi.

Kana nge ke na mfunu ya lusadis, to, kana nge me yamba Yesu na ntima na nge bubu yai, ti nge zola kusonga beto, na nima ya ecodim, kwisa kuvanda awa na bakiti yai, sambu beto lenda sadisa nge.

Kana ntangu lunga--

Longa Mikanda ya Bible--

Bana yimba « Mikanda ya Moize » ti tuba mikanda 5 ya Moize.

Niveau Primaire :

- Bana, Bible ya mvimba ke songa nani ? (Yesu Mesia Mvulusi).
- Mikanda 37 ya ntete ya Bible, Kuyantika tii na Malashi, bo kele Kuwakana ya Ntama. Mikanda yai songa beto nki sambu na Yesu ? (Yandi ta Kwisa.)
- Mikanda ya Kuwakana ya Ntama, keti bo sonikaka yo na ntwala Yesu kwisaka, to na nima ? (Na ntwala)

Niveau secondaire :

- Na mukanda ya ntete, Kuyantika, yo songaka

beto nki sambu na Mesia ya ta kwisa ?

(Bamvutu possible—

--Kuyantika 3 :15 songaka beto nde Mesia ta butama kaka ya nkento, kukonda bakala.

--Yandi ta butuka ya fami ya Abrahami, ti Nzambi ta sakumuna makanda yonso na kati na Yandi. Kuyantika 12 :2)

- Na mukanda ya zole, Kubasika, yo songaka beto mpi sambu na Mesia ya ta kwisa ?

(Bamvutu possible—

--Yandi ta pesa menga na Yandi bonso nkailu sambu Nzambi luta masumu na beto. Kubasika 12 :13.

--Bonso mwana-dimeme fweti vanda kitoko kukonda kifu, Mesia ta konda masumu. Kubasika 12 :5a)

===NSUKA YA LESO 13

Leso 13



***...konso
ntangu
beno ke
samba
Nzambi,***

Nzambi pesaka bo madia ya bo vandaka na yo mfunu. Bokuta ve, kansi lomba Nzambi!

***lomba Yandi konso mambu ya
beno ke na yo mfunu.***

***Ntangu beno ke lomba Yandi
yo,***

pesa Yandi mersi.

Filipi 4 :6b

Leso 14. Moize vandaka na mfunu ya lusadisu.

Kubasika 17 :8-16, kapu 18

I. Preparasio ya moniteur--

🕒 Kikuma ya lesu :

Bana ta bakisa nde beto yonso ke na mfunu ya lusadisu ya bantu ya nkaka na luzingu na beto. Yo yina, bo ta vanda ve na lulendo kuyindula nde bo mosi lenda sala yonso, kansi bo ta vanda na ntima ya kuyamba lusadisu.

♥ Verse ya kulunguka :

Bantu zole lenda nwana bitumba yina lenda bedisa muntu mosi. Nsinga ya bo me sala na bansinga tatu kele mpasi na kuzengana. Longi 4 :12

[Moniteur, NB : Sala konfusio ve na kati ya mukanda ya Longi, ya kele mosi ya mikanda ya Poezi na kati-kati ya Bible, mukanda ya Mfumu Solomo sonikaka, ti **Kulonga**, ya kele mukanda ya 5 ya Moize. Beto me longuka ntete ve mikanda ya Poezi, kansi beto ke baka kaka verse yai na mukanda ya Longi sambu yo songa kikuma ya lesu mbote.]

🗣️ Nkunga ya kwenda nzila mosi ti lesu yai :

Beto Bakristo Sadisana
Nsinga ya Bansinga Tatu

II. Kusala Revisio –

- ⤴ Ntangu bantu ya Israele basikaka na Ezipte, bo kotaka na ntoto ya zelo na zelo. Kuna, bo vandaka na mfunu ya nki ?
(Ya masa ti ya madia)
- ⤴ Nki zolaka kuvanda mpila ya mbote kusosa bima yina ? (Kulomba Nzambi bima ya bo vandaka na yo mfunu)
- ⤴ Kieleka, bo sambaka Nzambi ve, kansi bo salaka nki ntangu yina ? (Bo bokutaka na Moize.)
- ⤴ Na bisambu ya Moize, Nzambi sadisaka bo nki mutindu ?
(Yandi pesaka bo masa ya mbote ya kunwa, mampa ya sukadi ya bo bingaka ‘mana’ na suka, ti mbisi ya nguadi na nkokila.)

III. Kulonga bana lesu yai –

🕒 Kuyantika lesu :

Mwana mosi zolaka kusala mambu yonso kaka yandi mosi. Beto ta binga yandi « Mono Mosi ». Fami pesaka yandi ksalu kukatula matiti ya mbi na bilanga. Banduku songaka yandi nde, « Beto ta sadisa nge. Kana beto yonso sala, yo ta lomba ntangu mingi ve. Na nima, beto ta bula futbol.” Kansi Mono Mosi ndimaka ve. “Mono mosi lenda sala yo,” yandi tubaka.

Yo yina, yandi salaka na bilanga. Lumbu ya mvimba yandi salaka. Banduku na yandi kwendaka kubula futbol. Mono mosi, yandi kangamaka kaka na bilanga. Mpimpa kubwaka, kansi Mono Mosi vandaka kaka kusala na bilanga.

Bubuyai beto ta mona nki Moize salaka ntangu mambu bonso yai bwilaka yandi.

🌟 Developpement--Mambu ya nene ya lesu yai na banti 4 :

14.1 Na mvita ti bantu ya Amaleki, Moize nangulaka nti ya Nzambi na diboko. Kana yo vandaka na zulu, Israele nungaka, kansi ntangu Moize lembaka ti kitisaka diboko, Amaleki nungaka.

📖 **Tangila bana :** Kubasika 17 :8-11

8 Bantu ya Amaleki kwisaka kunwanisa bantu ya Israele...

9 Moize tubaka na Yozue nde : « Sola bantu, mbasi nge kwenda kunwana bitumba na bantu ya Amaleki. » Mono ta telama na nsongi ya ngumba ti nti ya Nzambi pesaka mono.”

10 Yozue...kwendaka kunwana bitumba na bantu ya Amaleki...

11 Ntangu bo vandaka kunwana, kana Moize kutedimisa maboko na yandi na zulu, bantu ya Israele kukuma ngolo, kansi kana yandi kulumusa yo na nsi, bantu ya Amaleki yantikaka kununga.

❓ Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

14.2 Bu Moize lembaka, Aroni ti Hure sadisaka kunangula maboko ya Moize. Yo yina, Israele nungaka.



Tangila bana : Kubasika 17 :12-13

12 *Ntangu maboko ya Moize yantikaka kulemba, Aroni ti Hure kwisaka na ditadi. Bo tulaka yo penepene na Moize, ebuna yandi vandaka na zulu na yo. Bo mosi telamaka na lweka na yandi. Bo sadisaka yandi na kutedimisa maboko na zulu, tii kuna ntangu dindaka.*

13 *Ebuna Yozue bedisaka bantu ya Amaleki yonso.*



Yula bana bakestio ke tadila baverse yai.

Bana bageste to mwa-seneti ya ke songa nki me salama.

Bana yimba ti kina sambu na kusonga nki me salama.

14.3 Bukilo ya Moize, Yetro, kwisaka kutala Moize na kusalu. Yandi monaka kizitu ya Moize kusambisa bantu. Yandi pesaka conseye nde Moize sosa lusadis.



Tangila bana : Kubasika 18: 1-19

1-3 *Yetro, bukilo ya Moize ... waka mambu yonso ya Mfumu Nzambi salaka ... (Yandi) bakaka Sefora, nkento ya Moize...ti bana ya Sefora, bo zole...sambu na kunata bo na Moize...*

7-8 *Moize kwendaka kukutana na yandi. Ebuna bo kotaka na nzo ya ntenta ya Moize. Moize yantikaka kutela yandi mambu yonso ya Mfumu Nzambi me sala...*

9-12 *Yetro monaka kiese mingi...Aroni ti bambuta yonso ya Israele kwisaka kusamba ti kudia sika mosi...*

13 *Na kilumbu landaka, Moize vandaka kusambisa bantu. Katuka suka tii na mpimpa bantu vandaka kukwisa kusamba mambu na bo.*

17-19 *Ebuna bukilo na yandi nde : “Mutindu nge ke sala kele mbote ve. Nge ti bantu yai, beno ta lemba nswalu. Kisalu me lutila nge mingi. Nge lenda sala yo ve nge mosi. Ntangu yai, kuwa,*

mono ke pesa nge ndongisila ya mbote, ebuna Nzambi ta sadisa nge...

21 *...Sola bantu ya mayele. Tula bo bambuta ... Bo vanda bantu ke zitisaka Nzambi...*

22 *Bo vanda bazuzi ya bantu tii kuna. Makambu ya nene, bo ta kwisaka kunata yo na nge, kansi bamakambu ya fioti-fioti, bo mosi ta zenga yo. Mpidina, kusalu ta lutilaka nge mingi ve, sambu bo ta sadisa...*

23 *Kana nge sala mpidina, Nzambi ta vanda na nge. Nge ta lemba nswalu ve. Bantu yonso mpi ta vutuka na banzo na bo, makambu na bo me mana. »*



Yula bana bakestio ke tadila baverse yai.

Bana bageste to mwa-seneti ya ke songa nki me salama.

Bana yimba ti kina sambu na kusonga nki me salama.

14.4 Moize landaka conseye ya Yetro. Yandi sosaka lusadis na kusalu na yandi.



Tangila bana : Kubasika 18 :24

24 *Moize wilaka Yetro. Yandi salaka mutindu yandi tubaka...*



Yula bana bakestio ke tadila baverse yai.

Bana bageste to mwa-seneti ya ke songa nki me salama.

Bana yimba ti kina sambu na kusonga nki me salama.

>|< Kumanisa lesa :

Moize vandaka muntu ya kinzambi ya ngolo. Kansi mbala zole na lesa yai, beto mona nde yandi vandaka na mfunu ya lusadis. Yandi ndimaka lusadis. Yo yina, Nzambi sadisaka yandi ti bantu yonso ya Israele, ti Yandi yikaka bo ngolo diaka.

Ata beto kele ngolo nki mutindu, beto yonso ke na mfunu ya lusadis. Nzambi me sala beto kusala kaka beto mosi ve. Kana muntu ke yindula nde kaka yandi mosi ta lunga, yina lulendo na yandi. Mbote beto yonso sosa lusadis, ti beto sadisana na kusalu ya Nzambi, ti na kusalu na beto ya konso

lumbu. Nsinga ya *bo me sala na bansinga tatu kele mpasi na kuzengana.*

♥ **Verse ya Kulonguka :**

Bana tuba Longi 4 :12 mbala zole, na nima bo yimba nkunga yina.

✎ **Devoir sambu na bakristo :**

Devoir ya mono ke pesa beno bakristo, yo yai : Na mposo ke kwisa, beno vanda nswalu kulomba lusadisu kana yo kele mfunu, beno mpi vanda nswalu kusadisa bantu ya nkaka.

✝ **Kubinga bana ya zaba Yesu ntete ve :**

Kansi, kana nge me yamba Yesu ntete ve na luzingu na nge, ata muntu mosi ya nkaka lenda sadisa nge ve kuguluka. Beto lend tendula nge nzila ya kuguluka. Beto lenda samba ti nge, Kansi, kaka Yesu lenda gulusa nge. Ntumwa Piere tubaka nde, “Bantu lenda guluka kaka na Yandi [Yesu]” (Bisalu 4 :12).

Kaka nge mosi lenda kangula kielo ya ntima na nge. Kaka nge lenda binga Yandi kukota. Na Kusonga 3 :20, Yesu tubaka, “Kuwa ! Mono me telama na kielo, ke bula. Kana muntu kuwa ndinga na Mono ti kukangula kielo, Mono ta kota...”

Keti Yandi ke bula na kielo ya ntima ya nge na Yandi bubuyai ? Kana nge zola solula mambu yai, to nge zola muntu ya nkaka kusamba ti nge na mambu yina, kwisa vanda awa [*moniteur, songa wapi*] na bakiti yai na nima ya ecodim.

Kana ntangu lunga—

📖 **Longa Mikanda ya Bible --**

Niveau Primaire :

Tuba mikanda 5 ya Moize na ndonga, ti na ndonga reverse (Yantika na mukanda ya 5, ebuna 4, 3, 2, 1).

Niveau Secondaire :

Bambukisa bana diaka mpila kumona baverse na kati ya Bible (mukanda, kapu, verse) ti songa bo na Bible. Na nima, kana bana ke na ible, pesa bo baverse yai kumona mosi-mosi na kati ya mikanda 5 ya Moize :

Kuyantika 1 :27, Kuyantika 6 :8, Kubasika 3 :7, Levi 9 :6, Kutanga 5 :7, Kulonga 1 :9

===NSUKA YA LESO 14



Leso 14

*Bantu zole lenda
nwana bitumba
yina lenda bedisa
muntu mosi.*

*Nsinga ya bo me
sala na bansinga
tatu kele mpasi na
kuzengana.*

Longi 4 :12

Leso 15. Nzambi pesaka bansiku kumi ya nene na Yandi kusonga beto mfunu ya Mvulusi.

(Bansiku 1-4, yina ya ke songa mpila kuzitisa Nzambi)

Kubasika 19 tii 20 :11

I. Preparasio ya moniteur--

NB : Informatio sambu na nge, moniteur, kutendudila bana kaka kana kestio yai basika :

Bampangi na beto Bakatolika kabisa bansiku ya Nzambi na mpila diferante na beto bamisioni. Bo tanga ve « Kusala ve biteki to bifwanisu ya bima... » (Kubasika 20:4-6) bonso nsiku ya zole. Bo tanga 'Kusadila zina ya Nzambi mpamba-mpamba ve' bonso nsiku ya zole.

Ebuna, bo kabisa nsiku ya nsuka, "Kuyuma ntima ve." (20:17), sambu bansiku kuma na nombre kumi.

Kana diswaswanu yai basika, nge lenda yula bana sambu na nki bo banza Katolika ke tanga ve "Kusala ve biteki to bifwanisu" bonso nsiku. (Keti yo lenda vanda sambu pratike na bo me fuluka na bifwanisu ya nsiku ya zole me buya ?)

© Kikuma ya lesu :

Bana ta bakisa nde Bansiku ya Nzambi ke songa beto mpila Nzambi zola beto kuzinga ti Yandi, mpi ti bantu ya nkaka. Beto kuka kulanda yo yonso ve, yo yina, beto bakisa nde beto kele bankwa-masumu na mfunu ya Mvulusi.

♥ Verse ya kulunguka :

« Bansiku yina kele kaka sambu na kusonga muntu nde yandi me sala masumu. » Roma 3 :20b

🗨️ Nkunga ya kwenda nzila mosi ti lesu yai :

Bansiku Kumi ya Kulanda

Yezaya 53 :6

II. Kusala Revisio –

Beto me mona nde bana ya Israele me basika na kimpika na Ezipte. Bo vandaka kukwenda na nsi ya Kanana ya Nzambi silaka bankaka na bo Abrahama, Izaki, Yakobi, ti Yozefi. Bo vandaka kutambula na nsi ya zelo na zelo, kansi Nzambi ke sadisa bo na bima ya bo vandaka na yo mfunu—masa ya kunwa ti madia.

Beto me mona nde Moize vandaka kusonga bantu bansiku ya Nzambi ya Nzambi me songa yandi. Kansi bansiku ya Nzambi vandaka ya kusonika ntete ve. Beto monaka nde kisalu ya kulonga mpi kusambisa bantu yonso lutaka ngolo ya Moize kusala yo. Yo yina Yetro, bukilo ya Moize, pesaka yandi conseye kusosa lusadisu ya bantu ya nkaka ya kinzambi Moize mpi landaka conseye na yandi.

III. Kulonga bana lesu yai –

➡ Kuyantika lesu :

Bantu ya Israele vandaka na nzila kukwenda na nsi ya Nzambi silaka bo. Nki mutindu bo ta zinga na kintwadi bo na bo, ntangu bo kwisa na nsi yina ? Ntangu me lunga nde bantu yonso zaba bansiku ya Nzambi, nki mutindu Yandi zola beto kuzinga. Bo ta mona nswalu nde bo lunga ve kupesa Nzambi kiese. Yo yina, bo ta mona mfunu ya Mvulusi.

🏠 Developpement--Mambu ya nene ya lesu yai na bandambu 4:

15.1 Bantu yilamaka sambu na kubaka bansiku na Yandi.

📖 Tangila bana somere yai ya Kubasika 19 :

Bantu ya Israele kumaka na ngumba ya Nzambi. Kuna, Moize tombukaka sambu na kusolula na Nzambi. Nzambi vutulaka yandi sambu na kusonga bambuta ya Israele nki mutindu bo fweti yilama. Na nima, yandi tombukaka diaka ti Aroni.


Nzambi songaka bo kuziungisa ngumba yonso na lupangu, bo songa bantu ngolo nde bo kusimba yo ve, ata bambisi na bo ve, ata bambuta ya bo ve. Nzambi zolaka kulumuka na ngumba yina. Bo kuma penepene ve. Kana ve, bo fweti kufwa. Nzambi vandaka kusonga bo nde masumu na bo me zenga kinduku na bo ti Yandi, me tula Yandi ntama ti bo.

❓ Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗨️ Bana yimba ti kina sambu na kusonga nki me salama.

15.2 Nzambi songaka nki mutindu bantu fweti vanda ti Yandi. Nsiku ya ntete ti ya zole : 1) Kusamba banzambi ya nkaka ve, kaka Mono. 2) Kusala ve biteki. Kufukama ve na ntwala ya biteki sambu na kusambila yo.


 **Tangila bana :** Kubasika 20 :1-5


20 :1-2 Nzambi tubaka mambu yai yonso nde : Mono kele Mfumu Nzambi, Nzambi na nge. Mono mosi katulaka nge na kimpika na nsi ya Ezipte.

3 Kusamba banzambi ya nkaka ve, kaka Mono.

4-5 Kusala ve biteki to bifwanisu ya bima... Kufukama ve na ntwala ya biteki sambu na kusambila yo, sambu Mono Mfumu Nzambi, Nzambi na nge, Mono kele Nzambi mosi ya zwa. Mono ke ndima banzambi ya nkaka ve...

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.


 Bana yimba ti kina sambu na kusonga nki me salama.


15.3 Nzambi songaka nki mutindu bantu fweti vanda ti Yandi. Nsiku ya tatu : 3) Kusadila zina ya Nzambi mpamba-mpamba ve.

 **Tangila bana :** Kubasika 20 :7


7 Kusadila zina na Mono Mfumu Nzambi, Nzambi na nge, mpamba-mpamba ve, sambu Mono ta pesa ndola na konso muntu yina ke sakana na zina na Mono.

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

15.4 Nzambi songaka nki mutindu beto fweti vanda ti Yandi. Nsiku ya iya : 4) Zitisa Kilumbu ya Kupema.


 **Tangila bana :** Kubasika 20 :8-11


8 Zitisa Kilumbu ya Kupema. Yo kele kilumbu na Mono Mfumu Nzambi.

9-10 Nge ta sala kisalu na nge yonso bilumbu sambanu, kansi kilumbu ya nsambwadi kele Kilumbu ya Kupema, kilumbu ya Mono Mfumu Nzambi, Nzambi na nge. Na kilumbu yango, muntu ta sala kisalu ve...

11 Mono salaka zulu, ntoto, masa, ti bima yonso kele muna na bilumbu sambanu. Ebuna na kilumbu ya nsambwadi, Mono pemaka. Yo yina, Mono Mfumu Nzambi sakumunaka Kilumbu ya Kupema. Mono kumisaka yo kilumbu na Mono.

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa leso :

Nzambi pesaka bansiku yai sambu beto zaba mpila beto fweti vanda ti Yandi—beto samba kaka Yandi, beto sala biteki ve, beto zitisa zina na Yandi ti lumbu na Yandi.

Yai kele kimvuka ya ntete ya bansiku. Keti beto me lemfuka na yo ? Ikele ve. Nzambi zabaka nde beto ta kuka ve kusala yo. Yo yina, Yandi tindilaka beto Mwana na Yandi sambu na kubaka ndola ya masumu yonso na beto.

 **Devoir sambu na bakristo :**

Devoir mono ke pesa beno bakristo, yo yai : Na mposo yai, meka kulemfuka na bansiku yai 4 ke tadila mpila kuvanda ti Nzambi. Kana nge mona nde nge me bwa na mambu mosi, ndima masumu yina na Nzambi ti lomba pardo na Yesu Kristo.

 **Kubinga bana ya zaba Yesu ntete ve :**

Kansi mbala mingi, bana ikele na ecodim na beto ya me ndima Yesu Kristo ntete ve na ntima ti na luzingu na bo. Kana nge me yamba Yandi ntete ve, yindula bansiku yai. Bansiku ikwa nge me fwaka dezia ? Kana nge me fwa kaka mosi, nge kele muntu ya masumu. Ee, kana beto tuba mbote, beto yonso fweti ndima nde beto me fwa bansiku ya Nzambi mingi.

Masumu lenda kota na bwala ya Nzambi ve. Yo yina, Nzambi tindaka Mwana na Yandi Yesu Kristo. Na kati ya bantu yonso, kaka Yesu lungisaka bansiku yonso ya Nzambi mbote-mbote. Yandi mpi kudipesaka nitu ti menga na Yandi bonso nkailu sambu na kufuta mfuka ya masumu na beto. Yandi fwaka, kansi Yandi mpi telamaka na lufwa. Bubuyai, kana nge ta binga zina na Yandi, Yandi ta wa nge. Bible ke songa beto nde konso muntu ya ta binga zina ya Mfumu Nzambi, « yandi TA guluka » (Roma 10 :13).

Kana nge me binga zina ya Nzambi ntete ve sambu na kulomba nde Yesu gulusa nge, ntangu ya mbote,

yo yai. Binga Yandi na ntima na nge sesepiyai. Na nima ya ecodim, kwisa vanda awa na bakiti yai sambu beto mpi zaba nde nge me guluka bubuyai.

Kana ntangu lunga—Longa mikanda ya Bible

Mbote kuzaba wapi Bansiku Kumi ke monika na kati ya Bible—Kubasika kapu 20. Kana Bible kele, sadisa bana kumona yo.

===NSUKA YA LESO 15

Leso 15-16

Nzambi pesaka Moize Bansiku Kumi ya nene na Yandi. Bansiku iya ya ntete songaka mpila beto fweti vanda ti Nzambi. Bansiku sambanu ya nsuka songaka mpila beto fweti vanda ti bantu ya nkaka. Beto me lemfuka ve na bansiku yina. Yai ke songa beto nde beto kele bankwa-masumu. Beto ke na mfunu ya Mvulusi.

« Bansiku yina kele kaka sambu na kusonga muntu nde yandi me sala masumu. »

Roma 3 :20b

Leso 16. Nzambi pesaka bansiku kumi ya nene na Yandi kusonga beto mfunu ya Mvulusi.

(Bansiku 5-10, yina ya ke songa mpila kuvanda ti bampangi)

I. Preparasio ya moniteur--

🕒 Kikuma ya lesa :

Diaka--Bana ta bakisa nde Bansiku ya Nzambi ke songa beto mpila Nzambi zola beto kuzinga ti Yandi, mpi ti bantu ya nkaka. Beto kuka kulanda yo yonso ve. Yo yina, beto bakisa nde beto ke na mfunu ya Mvulusi.

♥ Verse ya kulonguka : (Diaka, bonso na L 15)

« Bansiku yina kele kaka sambu na kusonga muntu nde yandi me sala masumu. » Roma 3 :20b

👤 Nkunga ya kwenda nzila mosi ti lesa yai :

Bansiku Kumi ya Kulanda

Yezaya 53 :6

II. Revisio—

Bansiku kumi Nzambi pesaka Moize ke tadila mambu zole—mpila beto fweti sala ti Nzambi, ti mpila beto sala ti bantu ya nkaka. Na mposo me luta, beto yindulaka mpila kusala ti Nzambi. Mposo yai, beto ke yindula bansiku 6 tii na 10—mpila kusala ti bantu ya nkaka.

III. Kulonga bana lesa yai--

👤 Kuyantika lesa :

Beto me mona nde Bansiku Kumi ya nene ya Nzambi pesaka Moize yantikaka na bansiku kusonga beto nki mutindu kuzitisa Nzambi. Na nima, yo ke landa kusolula nki mutindu kuvanda mbote ti bantu ya nkaka. Bubuyai, beto ta landa bansiku yina. Kubasika 20 :12.

🏠 Developpement--Mambu ya nene ya lesa yai na bandambu 4:

16.1 Nzambi songaka nki mutindu kuvanda ti bampangi. Nsiku ya tanu (5) : Zitisa tata ti mama na nge.

📖 **Tangila bana :** Kubasika 20 :12

12 Zitisa tata na nge ti mama na nge. Mpidina nge ta zinga bilumbu mingi na ntoto ya Mono Mfumu Nzambi, Nzambi na nge, ke pesa nge.

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

16.2 Nzambi songaka nki mutindu kuvanda ti bampangi. Nsiku ya sambanu ti ya nsambwadi : 6) Kufwa muntu ve.

📖 **Tangila bana :** Kubasika 20 :13-14

13 Kufwa muntu ve.

14 Bakala ti nkento ya me kwela—vanda kwikama na muntu nge me kwela. Kwenda ve na muntu ya nkaka. ? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

16.3 Nzambi songaka nki mutindu kuvanda ti bampangi. Nsiku ya nana ti ya uvwa: 8) Kuyiba ve. 9) Kutuba luvunu ve.

📖 **Tangila bana :** Kubasika 20 :15-16

15 Kuyiba ve.

16 Kutuba ve kitemwe ya luvunu sambu na mpangi na nge.

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

16.4 Nzambi songaka nki mutindu kuvanda ti bampangi. Nsiku ya kumi : 10) Kuyuma ntima ve.

📖 **Tangila bana :** Kubasika 20 :17

17 Kuyuma ntima ve na nzo ya ngani. Kuyuma ntima ve na nkento ya ngani, to bantu ya kisalu, to bangombe, to bampunda, to konso kima ya ngani.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

>|< Kumanisa Leso :

Nzambi pesaka bansiku yai mpi sambu beto zaba mpila beto fweti vanda ti bampangi ya nkaka—beto zitisa mama ti tata, beto kufwa muntu ve kansi beto zitisa moyo na yandi. Beto zitisa makwela ti vanda kwikama na kati na yo. Beto yiba ve bima ya bantu ya nkaka. Beto tuba luvunu ve. Beto yuma ntima ve sambu na bima ya bantu ya nkaka, kansi beto vanda na kiese na bima ya Nzambi me pesa beto. Yai ke songa mpila Nzambi zola beto kuzinga.

Kansi beto yonso fweti ndima nde beto me bwa na mambu yai yonso. Beto me zinga ve mpila Nzambi zola. Beto me sala masumu. Beto lenda kudiguluka ve. Beto kele na mfunu ya Mvulusi.

👤 Devoir sambu na bakristo :

Beno bakristo, devoir mono ke pesa beno, yo yai : Kuyindula nki nsiku nge ke fwaka mingi, ti kulomba lusadisya ya Nzambi kuyantika kupesa Yandi kiese na mambu yina.

✝️ Kansi beto bakisa nde dezia beto me fwa bansiku ya Nzambi. Dezia beto me sala masumu.

Yo yina, beto ke na mfunu kukwenda nswalu na Yesu Kristo, Mvulusi ya fwaka na sika na beto. Kana nge me kudilosaka na Yesu ntete ve sambu Yandi gulusa nge, ntangu ya mbote, yo yai.

Kana ntangu lunga—

📖 Longa Mikanda ya Bible

Bana yimba nkunga, 'Mikanda ya Moize'. Bambuka bakapu ya nene na Kuyantika—Nzambi salaka bima yonso (Bakapu1-2), Masumu kotaka (Kapu 3). Bambuka mpi kapu ya Kubasika ya songa beto mfunu ya Mvulusi--Bansiku ya nene ya Nzambi na Kapu 20.

===Nsuka ya Leso 16

**Leso 16**

Nzambi pesaka Moize bansiku kumi ya me luta mfunu. Yo songa beto nzila ya mbote kuzinga. Mpasi kele nde beto me landa yo ve ata fioti. Nzambi zola nde kubwa yina songa beto nde beto kele na mfunu ya Mvulusi.

« Bansiku yina kele kaka sambu na kusonga muntu nde yandi me sala masumu. »

Roma 3 :20b

Leso 17. Nzambi tendulaka bansiku na Yandi ti sonikaka yo na matadi.

Kubasika somere bakapu 21-24

I. Preparasio ya moniteur --

☉ **Moniteur, yilama na kikuma ya leso :**

Bana ta zola kuzinga na kintwadi ti Nzambi. Bo ta bakisa nde Nzambi zola beto kuzaba Yandi. Yandi tulaka ngolo kusonga beto bansiku na Yandi.

♥ **Verse ya kulonguka :**

Mfumu Nzambi tubaka na Moize nde : «Kwisa kutombuka awa na Mono na ngumba, nge bikala awa. Mono ta pesa nge matadi yina ke na bansiku ya Mono me sonika na kulonga bantu na Mono. »

Kubasika 24 :12

🗨️ **Bankunga ya kwenda nzila mosi ti leso yai :**

Bansiku Kumi ya Kulanda
Lomba na Nzambi, verse 2

II. Kusala Revisio –

↑ **Niveau Primaire-**

Na misapi, bana tesa kutuba bansiku kumi :

1. Kuvanda na banzambi ya nkaka ve.
2. Kusadila biteki ve.
3. Sadila zina ya Nzambi mpamba-mpamba ve
4. Zitisa lumbu ya bisambu ti ya kupema.
5. Zitisa mama ti tata na nge.
6. Kufwa muntu ve.
7. Kusala ve bizumba.
8. Kuyiba ve.
9. Kutuba luvunu ve.
10. Kuyuma ntima ve sambu na bima ya bantu ya nkaka.

↑ **Niveau Secondaire-**

Kana bana ke na Bible, bo kangula na Kubasika 20. Nge lomba bo kusosa, mpi kutelama kutanga Nsiku ya ntete, nsiku ya iya, nsiku ya kumi, etc.

Na nima, bo kanga Bible, bo tesa kutuba yonso 10.

III. Kulonga Leso Yai –

➡ **Kuyantika leso :**

Mwana zina ya Toma zolaka Yesu mingi. Konso ntangu, yandi vandaka kusonga banduku mambote ya Yesu na luzingu na yandi. Lumbu mosi, nduku zina ya Munkisi vutulaka nde, “Mono kwikila na Yesu ve. Kana Nzambi ikele, Yandi me bumbana ntama na zulu. Yandi ke zola kuzabana ve na beto bantu. Yandi kele na mfunu na mono ve. Yo yina, mono mpi ke na mfunu na Yandi ve.”

Nki nge ta tuba na Munkisi, kana nge vandaka Toma ? Keti Bible ke songa beto Nzambi ya zola kubumbana na bwala na Yandi, to yo ke songa beto Nzambi ya zola kuzabana na bantu na Yandi ? Yindula kestio yina ntangu nge ke wa leso na beto bubuyai.

Beto me bika Moize na zulu ya ngumba ya Sinai, sika Nzambi pesaka yandi Bansiku Kumi ya nene na Yandi.

🌟 **Developpement--Mambu ya nene ya leso yai na banti 4 :**

17.1 Nzambi pesaka bansiku ya nkaka mutindu na mutindu sambu na luzingu ya bantu.

📖 **Tangila bana somere yai :** Kubasika kapu 21, 22, tii na 23 :19

Ntete Nzambi pesaka bantu Bansiku 10 na nkufi sambu konso muntu mona mpasi ve kubakisa mpi kubambuka. Na nima, Yandi pesaka mpi bansiku mingi mutindu na mutindu sambu na luzingu ya bantu.

Yandi pesaka bansiku ya vandaka kutadila mambu mingi, bonso :

- ~ bantu ya kisalu
- ~ kunwana ya bantu
- ~ bambisi ya sala bantu mbi
- ~ nki mutindu kusala kana muntu me yiba
- ~ kana muntu defa kima kansi yo beba na diboko na yandi
- ~ kana bakala ladisa nkento ti pesa yandi divumu ~ kana muntu sala kindoki
- ~ nki mutindu kudefa mbongo
- ~ nki mutindu kutuba sambu na bantwadisi
- ~ mambu ke tadila songi-songi
- ~ nki mutindu kuvanda ti banzenza
- ~ bafete ya kusala

~ nki mutindu kusala nkailu na Nzambi

~ ti bima mingi ya nkaka.

Nzambi zolaka bantu na Yandi kuzaba nki mutindu kuvanda ti Yandi ti nki mutindu kuzinga ti bantu ya nkaka.

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

17.2 Nzambi silaka nde, kana bo lemfuka, Yandi ta nata bo na nsi ya Kanana. Yandi ta sakumuna bo kuna.

📖 **Tangila bana** : Kubasika 23 :23-33

23 Wanzio na Mono ta vanda na ntwala na beno. Yandi ta nata beno na nsi ya...Kanana. Bantu ya (Kanana), Mono ta fwa bo.

24 Beno lenda fukama ve na ntwala ya banzambi na bo sambu na kusambila bo...

25 Beno fweti samba Mono Mfumu Nzambi... Mono ta pesa beno madia ti masa. Mono ta katula mpi maladi na kati na beno.

26 Na ntoto na beno, ata nkento mosi ta basisa divumu ve to ta vanda mukobo. Mono ta pesa beno luzingu ya nda.

27 Bantu yina ke menga beno, Mono ta pesa bo boma... Bambeni na beno...ta tina beno...

29 Mono ta kula bo na mvula mosi ve, sambu mbaimbai...bambisi ya makasi ta kwisa kuluta mingi...

30 Kansi Mono ta kula bo malembe-malembe tii kuna...bana na beno ta baka ntoto yina...

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

17.3 Nzambi bingaka bambuta kutombuka ndambu na zulu ya ngumba, kansi Moize tombukaka tii na nsongi na yo. Bantu ya Israele

ndimaka kulemfuka na yonso, yo yina Moize sonikaka bansiku yina yonso.

📖 **Tangila bana** : Kubasika 24 :1-12

1 Mfumu Nzambi tubaka na Moize nde : « Nge ti Aroni, Nadabi, Abihu, ti bambuta ya Israele 70, beno kwisa kutombuka awa na Mono na ngumba. Beno fukama mwa-ntama fioti sambu na kusamba Mono.

2 Ntangu yai, nge mpamba muntu fweti kuma penepene na Mono, bambuta ve. Bantu ya nkaka, bo yonso fweti bikala na nsi ya ngumba...

3 Moize kwendaka kutubila bantu bansiku yonso ya Mfumu Nzambi tubaka. Ebuna bantu yonso tubaka...nde : “Beto ta sala yonso ya Mfumu Nzambi me tuba.”

4-6 Ntangu yai, Moize sonikaka bansiku yonso... Yandi tungaka mesa-kimenga... Yandi songaka bana-babakala ya Israele kupesa makabu... Moize bakaka menga. Yandi losaka yo na zulu ya mesa-kimenga.

7 Ntangu yai, yandi bakaka Mukanda ya Kuwakana, mukanda sika yandi sonikaka bansiku ya Mfumu Nzambi. Yandi tangaka yo na ndinga ya ngolo na meso ya bantu. Bantu vutulaka nde : « Beto ta sala yonso ya Mfumu Nzambi me tuba. Beto ta landa bansiku na Yandi. »


8 Ebuna Moize bakaka menga. Yandi losaka yo na bantu. Yandi tubaka nde : « Menga yai ke songa kuwakana ya Mfumu Nzambi me wakana na beno...»

9 Moize, Aroni, Nadabi, Abihu ti bambuta ya Israele makumi nsambwadi, bo tombukaka na ngumba.

12 Mfumu Nzambi tubaka na Moize nde : « Kwisa kutombuka awa na Mono. Mono ke pesa nge matadi yina ke na bansiku ya Mono me sonika sambu na kulonga bantu na Mono.”

? Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

17.4 Kuna na nsongi ya ngumba, Nzambi pesaka Moize bansiku ya Yandi mosi me sonika na zulu ya matadi. Ebuna Moize bikalaka kuna bilumbu 40.


 **Tangila bana :** Kubasika 24 :13-18


13 Moize... tombukaka na ngumba ya Nzambi, ti...Yozue.

14 Na ntwala yandi vandaka kutombuka, yandi tubaka na bambuta ya Israele nde : « Beno vingila beto awa tii kuna beto ta kwisa kuvutuka...

15-18 Moize tombukaka na ngumba ya Sinai. Dititi fikaka ngumba, ye lukumu ya Mfumu Nzambi kwisaka kumonika... Mfumu Nzambi... bingaka Moize. ...Yandi bikalaka kuna bilumbu 40...

 Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa leso :

Nzambi bingaka Moize kupesa yandi bansiku na Yandi, sambu Yandi zolaka bantu kuzaba Yandi. Yandi vandaka ve Nzambi ya bumbanaka sambu bantu kuzaba Yandi ve, to bo kaka meka-meka kuzaba Yandi na mpila na bo. Yandi bingaka Moize, ti Yandi mosi sonikaka bansiku na Yandi sambu bantu kuzaba Yandi, ti bo zaba nki ta pesa Yandi kiese. O, matondo sambu Nzambi kele kusosa beto bantu !

Devoir sambu na bakristo :

Beno bakristo, devoir mono ke pesa beno na mposo yai kele kusonga histoire ti verse na beto na bantu ya nkaka. Nge lenda songa yo na bantu ikwa na kati ya mposo yai ? Konso ntangu nge songa

mpangi histoire yai, nge ke songa bo mpi nde Nzambi ke kudibumba ve, kansi Yandi ke zola beto bantu kuzaba Yandi.

Kubinga bana ya zaba Yesu ntete ve :

Ee, Nzambi zola beto bantu kuzaba Yandi, kansi bantu yonso zaba Yandi ve. Nge mosi, mbala ya nkaka nge zaba Yandi ntete ve. Kansi nge lenda. Nge fweti kaka ndima nde Nzambi zola nge, Yandi tindaka Mwana na Yandi Yesu Kristo kukota nsi-ntoto yai sambu na kugulusa nge. Yesu pesaka Tata Nzambi kiese konso ntangu. Yandi fwaka na zulu ya kulunsi bonso nkailu to makabu ya kulunga sambu na mbi ya nge me sala. Yandi telamaka na lufwa, Yandi vutukaka na zulu, ti kuna Yandi ke zinga mvu ya mvu.

Kana nge ta binga zina na Yandi bubuyai, Yandi ta lolula nge na masumu yonso, Yandi ta pesa nge ntima ya mpa, Yandi ta pesa nge moyo ya mvu ya mvu.

Keti nge ta binga Yandi sesepiyai ? *[Moniteur, kinga fioti bu bana samba na ndinga ya pima.]*

Kana nge me yamba Yesu bubuyai, to kana nge ke sosa lusadisu na mambu yina, kaka bikala na nima ya kalasi, ebuna beto ta sadisa nge.

Kana ntangu lunga--

Longa Mikanda ya Bible --

Beto mona Bansiku 10 ya Nzambi pesaka bantu wapi na Bible? (Kubasika kapu 20.)

Bantu tuba na mpila ritimika :

Ban-siku **Ku**-mi ya **Nza**-mbi-ee

Ku-ba-**si**-ka **ka**-pu makumi **zo**-le—ee.

Bana yimba nkunga, 'Mikanda ya Moize', ti tuba mikanda yina na ndonga. Yula bana, « Nki beto ke mona na Kubasika kapu 20 ? (Bansiku 10 ya nene ya Nzambi.)

===NSUKA YA LESO 17

Leso 17

Dituti fikaka nsongi ya ngumba ntangu Nzambi pesaka Moize bansiku na Yandi.



**Mfumu
Nzambi
tubaka
na
Moize**

nde : «Kwisa kutombuka awa na Mono na ngumba, nge bikala awa.

Mono ta pesa nge matadi yina ke na bansiku ya Mono me sonika na kulonga bantu na Mono. »

Kubasika 24 :12

Leso 18. Nzambi lombaka makabu kutunga ntenta ya bisambu ti songaka mutindu kusala yo.

Kubasika kapu 25-31 somere

I. Preparasio ya moniteur--

Moniteur, bakisa mpila beto ta longa lesa yai :

Leso yai kele somere ya bakapu mingi. Yo yina, nge ta longa yo na bana na mutindu ya nkaka. Kana nge kuma na developpement ya lesa, nge ta mona bafoto No. 1 tii na 18. Nge ta songa bana bafoto yina mosi-mosi ti tangila bo ntendula na yo.

Banombre ya ntendula ta kwelana ti foto. Ndambu mambu ya bana ta sala, nge ta mona yo ya kumwanga kisika na kisika na kati ya lesa yina. Kaka tanga baparti yina ve, kansi twadisa bana kusala mpila yo ke songa nge.

☉ Kikuma ya lesa :

Bana ta tula ngolo kusambila Nzambi na bamakabu yonso ya Yandi me pesa bo. Bo ta bakisa nde Nzambi me pesa beto bima ti bamakabu mutindu na mutindu sambu beto sadila yo kusambila Yandi.

♥ Verse ya kulonguka :

Pesa lukumu na Mfumu Nzambi ! Kumisa zina na Yandi ya longo na ntima na mono yonso !
Bankunga 103 :1

🗣️ Bankunga ya kwenda nzila mosi ti lesa yai :

Bandeke Kele Yimba
Beno Pesa Makabu
Zitisa zina ya Yesu

II. Kusala Revisio –

† Na lesa me luta, beto me bika Moize wapi ?
(Na zulu ya ngumba, sika yandi me kwenda kutana ti Nzambi, mpi kubaka Bansiku ya Nzambi mosi me sonika sambu na bantu na Yandi Israele.)

III. Kulonga Lesa Yai –

🔄 Kuyantika lesa :

Na kati ya bansiku ya Nzambi pesaka Moize vandaka mpi bansiku nki mutindu bo lenda samba Yandi, ti nki mutindu bo lenda sala nzo ya bisambu

ya ntenta.

🌟 **Developpement**—[*Moniteur, atasio ! Beto me zenga lesa yai na mutindu ya nkaka. Songa foto na bana mosi-mosi, ti na nima na yo, tangila bo basomere ya fioti. Nombre ya konso foto ta kwelana ti nombre ya ntendula.*]



18.1 Tangila bana somere yai : Kupesa Makabu

Nzambi zolaka bantu ya Israele kutungila yandi ntenta ya bisambu. Bo lenda kanga ntenta yina sambu na kutambula ti yo bisika yonso ya bo ta kwenda. Bima mingi ta vanda mfunu sambu na nzo ya bisambu yina. Yo yina, kuwa nki Nzambi tubaka. (Kubasika 25 :1-2)

1-2 Mfumu Nzambi tubaka na Moize nde :« Songa bantu ya Israele nde bo pesa Mono makabu...konso muntu yina ta ndima na kupesa na luzolo na yandi mosi, yandi ta pesa.»

Mpila bo pesaka makabu songaka nde Tata Nzambi ta pusa Yesu ve kukwisa, kansi Yandi na ndima kukwisa.

18.2 Mingi mingi mutindu na mutindu

Nzambi songaka bo bima mingi ya bo lenda pesa, yonso ya bo fweti sadila sambu na kutunga ntenta ya bisambu mosi ya kitoko. Bo lenda pesa bametai bonso wolo, arza to bronze.

Bo lenda pesa bansinga ya lele ya bule ti ya mbwaki. Bo lenda pesa lino ya kitoko, to lele ya bo me sala na mika ya bambisi, to mukanda ya kitoko ya mbisi.

Bo lenda pesa mabaya, ti mafuta sambu na bamwinda. Bo lenda pesa matadi ya ntalu mutindu na mutindu. Bo lenda pesa baespise ya nsudi ya kitoko.


Bo ta vanda na mfunu ya bima yina yonso. Yo yina, konso muntu lenda sola na kati ya bima ya yandi lenda vanda na yo.

Bana sala :


Bana yonso sala bageste bonso bo ke pona bima bo ke na yo,



Yai ke songa beto nde Yesu Mwana ya Nzambi vandaka ntalu na meso ya Tata Nzambi. Mwana ya kitoko ti ya luzolo mingi.



18.3



18.3 Lukanu ya Kusala yo

Nzambi pesaka bana mpila kusola makabu na bo, kansi Nzambi songaka bo nki mutindu kutunga nzo ya bisambu ya ta pesa Yandi kiese. Yandi tubaka nde :

« *Beno fweti tunga nzo ti bima na yo yonso kaka mutindu Mono ke songa nge* » (Kubasika 25 :9).


Yai songaka bo nde bo lenda kwisa na Yandi ve na mpila na bo mosi, kansi Nzambi Yandi mosi ta yidika mpila sambu na bo kukwisa. Nzila yai keke Mwana na Yandi Yesu.

18.4 Sanduku ya Kuwakana

Nzambi songaka bo nki kusala sambu na kutula na kati ya nzo yina. Ntete, Yandi songaka bo kusala sanduku ya kitoko, sika ya Yandi ta kutana ti bo.

Yandi pesaka bo ve nzila kusala yo konso mutindu bo zolaka, kansi Yandi mosi songaka bo nki mutindu kusala yo. Yandi songaka nene na yo, ti nki mutindu kusala yo. Bo fweti landa kaka mpila Yandi tubaka.

Sanduku sika Nzambi ta kutana ti bo, yo songaka bo nde na kati ya Yesu, Nzambi mosi ta kutana ti beto.



18.4



18.5 Mesa ya Mampa

Na nima, Nzambi songaka bo kusala mesa ya kutula mampa na zulu na yo. Yandi songaka bo mpi mpila kusala malonga, makopa, babolo, ti bima bonso yo ya bo ta sadila na kati ya nzo ya bisambu.


Yandi songaka bo nki mutindu kusala bima yina yonso, ye bo fweti sala kaka na mpila Yandi tubaka.

Mesa ya mampa songaka bo nde Yesu ta vanda « Mampa ya Moyo. » Bonso mampa katula nzala na beto sambu na madia, Yesu ta lungisa nzala na beto kuzaba Nzambi.

18.6 Bamwinda

Nzambi songaka bo mpi kusala kima ya kutudila bamwinda, ti bima ya foti-foti ya ta vanda mfunu sambu na bamwinda.

Bamwinda songaka bo nde Yesu ta vanda mwini ya ta katula mpimpa na beto ya kimpave. Yesu Yandi mosi tubaka nde, « Mono kele Mwinda sambu na bantu yonso » (Yoane 8 :12).





18.7 Kukanga ti kunata yo

Nzambi songaka bo nki mutindu kusala nzo ya ntenta ya bo lenda nata ti bo na nzila. Ntangu Nzambi twadisa bo na sika ya mpa, bo kaka kanga yo. Ebuna bantu mingi nataka yo bitini-bitini na sika ya Nzambi twadisaka bo. Yandi songaka bo ve kusala yo na mpila ya bo mosi monaka mbote, kansi Yandi Mosi songaka bo nki mutindu kusala yo. Yandi songaka nene na yo ti nombre ya konso parti bo fweti sala. Yandi songaka nki mutindu bo fweti kanga yo ntangu bo ta tambula kunata yo na sika ya nkaka.


Mpila bo ta kanga nzo ya ntenta ya bisambu ti tambula na bo, yo songaka bo nde Yesu ta tindila beto Mpeve ya Nzambi. yina ta tambula sikamosi ti beto, sambu Yandi ta zinga na kati na beto bakristo.


18.8 Mesa Kimenga

Na nzo ya bisambu yina, bo fweti pesa makabu ya menga. Bo fweti bambuka konso ntangu nde masumu ke nata lufwa. Yo yina, Nzambi songaka bo mutindu kusala mesa-kimenga, ti bima yonso ya ta vanda mfunu sambu na yo.

Nzambi yindulaka mambu yonso. Ata mpila bo fweti nata yo, Nzambi songaka bo mpila kusala yo. Bo fweti sala yonso kaka na mpila Yandi me songa bo.

Mesa ya kimenga songaka bo nde Yesu ta pesa menga na Yandi ya ntalu sambu na kukatula beto na masumu na beto ntangu Yandi fwaka na zulu ya kulunsi.





18.9

18.9 Barido

Nzambi songaka bo mpila kusala barido ya kitoko sambu na kuzenga ntenta yina na bitini. Na bisika ya nkaka, banganga-Nzambi fweti sala kisalu na bo, ti na bisika ya nkaka, kaka mfumu ya banganga-Nzambi lenda kota.

Na sika mosi na kati-kati vandaka « sika ya kuluta nsiku. » Yai vandaka sika ya lukumu ya Nzambi vandaka kumonika.

Kaka mfumu ya banganga-Nzambi lenda kota kuna, ti ata yandi lenda kota kaka mbala mosi konso mvula. Rido ya ngolo kangaka nzila nde bantu ya nkaka lenda kota ve na ntwala ya Nzambi.

Barido songaka bo nde bo me kabana na Nzambi sambu na masumu na bo, kansu **Yesu ta kangula nzila** sambu bo kota na kintwadi ti Yandi diaka. Barmvula mingi na nima, ntangu Yesu fwaka na zulu ya kulunsi, Nzambi pasulaka rido yai yantika na zulu ti na nsi, sambu Yesu kangulaka beto nzila kukota na ntwala ya Nzambi na kikesa yonso.


18.10 Mafuta ya Nsudi ya Kitoko

Nzambi yindulaka bima yonso. Ata mafuta ya nsudi ya kitoko sambu na kutula na barmwinda, Yandi songaka bo mpila ya kusala yo.

Mafuta ya barmwinda vandaka na **nsudi ya kitoko**. Yo songaka bo nde, ata bo me kuma nsudi ya mbi na mbombo ya Nzambi sambu na masumu na bo, na kati ya Yesu, bo ta kuma nsudi ya kitoko diaka.

18.10





18.11

18:11

18.11 Banganga Nzambi

Konso muntu lenda sadila Nzambi ve na ntenta ya bisambu yina. Nzambi solaka Aroni, mbuta ya Moize, ti fami na yandi kusadila Yandi bonso banganga-Nzambi na kati na yo.


Nzambi songaka nki mutindu kusadila bo bilele ya kinganga. Bo fweti lwata yo ntangu bo samba Yandi na ntenta yina.

Na ntulu na ya lele yina, Nzambi songaka bo kutula matadi ya ntalu 12, ditadi mosi kusonga konso tribu ya Israele.

Na nsi ya lele yina, bo fweti tula bangunga ya foti. Ntangu bantu vandaka kuwa ndinga ya bangunga yina, bo ta zaba nde nganga kele na moyo. Nzambi songaka bo kusala mpidina, sambu kana nganga pesa Yandi kiese ve, Nzambi lenda kufwa Yandi. Kudila ya mwa-bangunga yina songaka bo nde yandi vandaka na moyo.

18.12

18:12




Nzambi songaka bo nki bo fweti sala sambu na kukitula Aroni ti bana na yandi banganga-Nzambi.

Nzambi songaka bo kukitula Aroni ti bana na yandi **banganga-Nzambi**. Yai songaka bo nde na kati ya Yesu, beto bakristo yonso ta kuma banganga-Nzambi, ti beto yonso ta kota na ntwala na Yandi na kikesa.

18.12 Mesa ya Medinga ya Nsudi ya Kitoko

Nzambi songaka bo mpila kusala mesa-kimenga ya kupesa medinga ya nsudi ya kitoko, ti nki mutindu kupesa makabu na zulu ya mesa yina. Yai songaka bo diaka nde masumu kele nsudi ya mbi, kansi na kati ya Yesu, beto kuma mbote ti Nzambi diaka.



18.13 Nzambi pesaka mayele ya kusala

Na nsuka, Nzambi songaka bazina ya bantu zole ya Yandi me sola kutwadisa bantu kusala bima yai yonso. Nzambi me pesa dezia mayele na bantu yina kuzaba kusala bima yina mbote-mbote.

Bantu yina, bazina na bo Basalele ti Oholiabi. Nzambi tubaka mpi nde Yandi me pesa bantu yonso mayele kusadisa na kisalu yai ya nene.

Nzambi pesaka konso muntu mayele na yandi sambu yandi mona mpila kusadisa. Yai ke songa beto nde na kati ya Yesu, beto yonso bakristo me baka makabu ya kimpewe. Beto yonso kele na sika na kisalu ya Nzambi.

18.14 Zitisa Kilumbu ya Bisambu

Na nsuka, Nzambi bambukisaka bo nde, ata Yandi vandaka kupesa bo kisalu, bo zitisa kaka bilumbu ya bisambu ya Yandi pesaka bo katuka na luyantiku. Ata na ntangu bo kele kutunga nzo-Nzambi ya ntenta, bo bika kisalu ya Kilumbu ya Bisambu. Bo samba Nzambi na lumbu yina.

Beto mpi, beto fweti tula lumbu mosi konso mposo sambu na kupema, mpi sambu na kusamba Nzambi.



18.14



18.15
18.15

18.15 Nzo ya Nzambi ya Ntenta

Konso parti ya ntenta ya bisambu yina songaka bo Mesia ya Nzambi me sila kutindila bo. Yonso songaka bo Yesu, ata na ntwala Yandi kwisaka.

Ntenta ya bisambu yina pesaka bo kisika ya kusamba Nzambi na konso kisika Nzambi ta nata bo. Kansi yo yonso songaka bo mpi nde lumbu mosi, Nzambi ta tindila bo Mesia, Mvulusi. Mvulusi yina kele Yesu Kristo.

>|< Kumanisa Leso :

Bima yonso na kati ya ntenta ya bisambu yina, Nzambi me pesaka bo dezia bima ya kusala yo. Ntangu bo nataka bamakabu na bo, yonso vandaka ya kulunga. Nzambi mpi me pesa na bantu dezia mayele kuzaba kusala bima yonso ya ta vanda mfunu. Ya nkaka Yandi me pesa mayele kuzaba kusala bima ya kibende, ya nkaka kusala na bampusu ya bambisi, ya nkaka kusala lele ya mbote mutindu na mutindu, ya nkaka kutunga badessin na zulu ya lele, ya nkaka kusadila ba-erbe sambu na kusala mafutu ya nsudi ya kitoko, ya nkaka kusala na mabaya, ti bima mingi ya nkaka.


Nzambi lombaka nde konso muntu na luzolo na yandi mosi, yandi sala yina ta sadisa. Ebuna yonso lungaka sambu na ntenta ya bisambu ya kitoko.

 Devoir sambu na bakristo :

Nge mukristo, keti nge kele kusadila bamakabu ya Nzambi me pesa nge ? Ntete, kele kuzikisa kana Yandi me pesa nge nki makabu. Ya zole, kele kusadila yo na mpila ya ke pesa Nzambi kiese, mpi ke sadisa kisalu na Yandi kukwenda na ntwala.

Devoir mono ke pesa beno na mposo ke kwisa, yo yai : Beno tula ngolo kuzikisa nki mayele, nki makabu, ti nki bima Nzambi me pesa nge. Nge yantika kusamba nde Yandi twadisa nge kudevelope yo, mpi kusadila yo na mpila ya ke pesa

Yandi kiese.

 Kubinga bo ya me yamba Yesu ntete ve :

Kansi, kana nge me yamba Yesu ntete ve, devoir mono ke pesa nge kele kuyindula bampila yonso ya nzo ya bisambu ya Bayuda songaka bo kukwisa ya Mesia Yesu.

Rido ya ngolo vandaka na ntenta ya bisambu yina. Yo kangaka nzila kukwisa na Nzambi. Yesu kangulaka nzila yina. Bubuyai, beto lenda kota ti kwisa na ntwala ya Nzambi, kansi kaka na nzila ya Yesu Kristo.

Keti nge zola kota bubuyai ? To nge zola kubikala na nganda ? Yesu ke songa nge nde : “Kuwa ! Mono me telama na kielo, ke bula. Kana muntu kuwa ndinga na Mono ti kukangula kielo, Mona ta kota na nzo na yandi, ebuna Mono ta dia mesa mosi ti yandi” (Kusonga 3:20). Kana nge zola kota fami ya Nzambi bubu yai, kwisa solula ti mono na nima ya ecodim.

Kana ntangu lunga--** Longa Mikanda ya Bible --**

[Moniteur, yula bana kana bana zola tuba Mikanda 5 ya Moize, to yimba yo, to sala yonso zole.]

===NSUKA YA LESO 18

Leso 18



***Pesa
lukumu
na
Mfumu***

***Nzambi ! Mono fweti
kumisa zina na Yandi ya
longo na ntima na mono
yonso !***

Bankunga 103 :1

Leso 19. Bantu fwaka bansiku ya nene ya Nzambi.

Kubasika 32

I. Preparasio ya moniteur ---

🕒 Kikuma ya leso :

Bana ta bakisa nde beto yonso keke na makambu ti Nzambi, sambu beto yonso me fwaka bansiku na Yandi. Kaka Yesu Kristo lenda katula beto na makambu yina. Yo yina, bana ta tula Yesu ntima, ti samba Nzambi nde bampangi kusala kiteso mosi.

♥ Verse ya kulunguka :

Beto yonso, beto vandaka kuyungana bonso mameme, konso muntu na nzila na yandi. Ebuna Mfumu Nzambi tulaka mbi na beto yonso na zulu ya ntu na Yandi (Mesia). Yezaya 53 :6

👤 Moniteur, yilama na bankunga ya kwenda nzila mosi ti lesu yai :

Kana Nge Me Vuluswa
Masumu na Mono Me Kwenda
Yezaya 53:6

II. Kusala Revisio –

- 👆 Nzambi songaka Moize nki mambu tatu na zulu ya ngumba ?
(1. Bansiku na Yandi nki mutindu bo fweti zinga, 2. Mpila bo fweti sadila Yandi ntenta ya bisambu, 3. Mpila bo fweti samba Yandi na kati na yo. Nzambi songaka mambu yai na detayi ya mingi.)

III. Kulonga Leso Yai –

👉 Kuyantika lesu :

- Na baleso na beto, beto me bika Moize wapi ?
(Na zulu ya ngumba)
- Yandi bikalaka kuna ntangu ikwa ?
(Bilumbu 40)

Bantu ya Israele monaka bonso yandi me vanda kuna ntangu mingi. Bo yantikaka kuyindula nde yandi ta vutuka diaka ve. Bo vandaka ve na mpila kumata kuna kumona kana yandi me fwa to nki, sambu Nzambi me songa Moize kutula lupangu na

lweka na ngumba. Kana bo luta lupangu, kana bo ata kusimba yo, Nzambi ta fwa bo. Nki bo ta sala ?

Moize me vutuka mbala mosi dezia, me songa bo bansiku ya Nzambi me pesa yandi. Nani ke bambuka bansiku ya ntete ti ya zole ?
(Ee, ya ntete vandaka kusamba Nzambi kaka, ya zole kusala ve to kusamba ve biteki ya konso mutindu.) Bantu vandaka kaka kukinga Moize. Ti kukinga yandi. Ti kukinga yandi. Beto landa nki salamaka na Kubasika kapu 32.

🏠 Developpement--Mambu ya nene ya lesu yai na banti 4 :

19.1 Bantu lembaka kukinga Moize. Yo yina bo lombaka Aroni kusadila bo banzambi ya biteki sambu na kutwadisa bo. Ebuna Aroni wilaka bantu ti salaka mpidina.

📖 **Tangila bana :** Kubasika 32 :1-6

1 Ntangu bantu ya Israele monaka nde Moize me sukinina na kukulumuka na ngumba, bo yonso kwendaka kutuba na Aroni nde : “Aroni, sadila beto nzambi yina ta nata beto, sambu beto zaba ve nki me bwila muntu yai Moize...”

2-3 Aroni tubaka nde : “Beno katula bima-makutu ya wolo ya beno ke lwataka...”

4 Aroni bakaka yo ti tulaka yo na tiya sambu yo kuma masa-masa. Ebuna yandi salaka kiteki ya ngombe. Bantu ya Israele tubaka nde : “Yai nzambi na beto yina basisaka beto na nsi ya Ezipte !”

5 Ntangu Aroni monaka mpidina, yandi tungaka mesa-kimenga na ntwala ya ngombe ya wolo. Yandi zabisaka bantu nde : “Mbasi beto ta sala nkinsi sambu na kukumisa Mfumu Nzambi.”

6 Na kilumbu landaka...bo diaka, bo nwaka, ebuna bo yantikaka kukina kisakasaka.


👤 Yula bana bakestio ke tadila baverse yai.

👤 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

19.2 Nzambi vandaka na makasi na bantu ya

Israele. Yandi zolaka kumanisa bo, kansi Moize lombaka Nzambi kuwila bo mawa, ye Yandi waka lombilu yina.

 **Tangila bana :** Kubasika 32 :7-14

7 Ntangu yai, Mfumu Nzambi tubaka na Moize nde : « Kulumuka nswalu, sambu bantu na nge yina ya nge basisaka na Ezipte, bo me kudibebisa.

8 Bo me bikisa nswalu nzila ya Mono songaka bo kulanda. Bo me sala ngombe ya wolo, bo me sambila yo kupesa yo makabu. Bo ke tuba nde yandi yai Nzambi na beto ya basisaka beto na Ezipte.’


9-10 Mono zaba bantu yai. Bo kele ntu-ngolo. Ntangu yai...Mono fwa bo na makasi na Mono...»


11-12 Kansi Moize bondilaka Mfumu Nzambi... nde : “Mfumu,...Kuwa makasi ve, pardo...kufwa bantu na Nge ve.

13 Yindula bantu na Nge Abrahami, Izaki ti Yakobi. Yindula mpi mutindu Nge zengaka na zina na Nge mosi nde :“Mono ta pesa beno dikanda ya bantu mingi. Bana na beno ta vanda mingi-mingi bonso bambwetete na zulu. . .”

14 Yo yina, Mfumu Nzambi...fwaka ve bantu na Yandi...

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

19.3 Ntangu Moize monaka kiteki, yandi waka makasi. Yandi losaka matadi ya bansiku ya Nzambi na ntoto, ebuna yo pasukaka. Yandi tulaka yo tiya ti tutaka yo, yo kuma putulu. Kubasika 32 :15-20

 **Tangila bana :**


15-16 Ntangu yai, Moize kulumukaka na ngumba. Yandi nataka matadi zole ya Kuwakana. Nzambi ...sonikaka bansiku na zulu


na yo na diboko na Yandi mosi...

19 Ntangu Moize kumaka penepene na camp, yandi monaka kiteki ya ngombe, ti bantu ke kina kisakasaka. Yandi waka makasi mingi. Yandi losaka na ntoto matadi ya vandaka na maboko. Yandi pasula-pasulaka yo...

20 Yandi simbaka ngombe yina ya bo salaka, yandi yokaka yo tii kuna yo zikaka. Ebuna yandi tutaka yo sambu yo kuma putulu . . .

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

19.4 Nzambi pesaka ndola ti songaka mawa. Kubasika 21 :32-35 ti Kulonga 9 :20


 **Tangila bana :**


30 Na kilumbu landaka, Moize tubaka na bantu nde : “Beni me sala masumu mpenza. Kansi... mbala ya nkaka Yandi ta ndima mono kuwila beno mawa....”

31-32 Moize vutukaka na Mfumu Nzambi. Yandi tubaka nde : “A, bantu yai me sala mambu ya mbi mpenza... Ntangu yai pardo, wila bo mawa sambu na masumu na bo...

35 Mfumu Nzambi tindaka maladi na bantu sambu bo songaka Aroni kusadila bo kiteki ya ngombe...

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa leso :

Bantu ya Israele zwaka makambu ya ngolo ti Nzambi, sambu bo fwaka nsiku ya ntete ti ya zole na Yandi. Kieleka, Bible ke songa beto nde beto yonso kele na makambu ti Nzambi, sambu beto yonso me fwaka bansiku na Yandi. Ata muntu mosi ve me sala mambu ya kele mbote na meso ya Nzambi. Beto yonso me sala masumu, ebuna

Nzambi me zenga beto yonso ndola ya lufwa. Kansi Nzambi ke zola beto mingi, yo yina Yandi tindilaka beto Mwana na Yandi mosi, Yesu Kristo. Yesu fwaka na sika na beto sambu na kuvutula beto na kinduku ti Nzambi. Yo ke lomba kaka nde beto ndima ksalu Yandi me sala sambu na beto, beto yamba Yandi na ntima na beto.

Devoir sambu na bakristo :

Beno bakristo, devoir mono ke pesa beno mposho yai kele kusonga histoire yai na bampangi, kusonga bo nde beto yonso mpi me fwaka bansiku ya Nzambi, kansi Nzambi ta wila beto mawa kana beto tula ntima na Yesu Kristo.

Kubinga bana ya zaba Yesu ntete ve :

Mbala ya nkaka nge me tula ntima na Yesu ntete ve. Bible ke tuba nde beto yonso me fwaka bansiku na Yandi. Nzambi kele na makasi na beto sambu na yo. Kinduku ti kintwadi na beto ti Nzambi, yonso me zengana sambu na masumu ya beto me sala.

Kansi Nzambi zola nge mingi. Yandi zola kuwila nge mawa. Yo yina, Yandi tindaka Mwana na Yandi Yesu Kristo sambu Yandi kufwa na sika na nge, Yandi baka ndola yonso ya masumu na nge. Kana nge ta ndima Yandi, Nzambi ta wila nge mawa. Yandi ta kitula nge mwana na Yandi. Nani zola ndima Yesu bubu yai ? Nani zaba nde nge me yamba Yandi ntete ve, kansi bubu yai nge zola ?

Sesepi yai kaka songa Yandi nki kele na ntima na nge. Binga Yandi kuvulusa nge. Ebuna, na nima ya ecodim, mono ta vanda na mfunu ya kusolula ti nge, kusadisa nge.

Kana ntangu lunga--

Longa Mikanda ya Bible –

Mikanda ya Moize kele ndambu ya ntete ya Mikanda 39 ya Kuwakana ya Ntama.

Beto me kabisa mikanda ya Kuwakana na bandambu yai :

Mikanda ya Moize (5 livres)

Mikanda ya Histoire ya Bayuda na ntoto na bo (12 livres)

Mikanda ya Poesi (5 livres)

Mikanda ya Nda ya Profesi (5 livres)

Mikanda ya Nkufi ya Profesi (12 livres)

[Moniteur, bana tuba bazina ya bandambu ya Kuwakana ya Ntama na nima ya nge.]

===NSUKA YA LESO 19



Aroni sadilaka bo kiteki ya or ye bo sambilaka yo. Mawa !

Leso 19

**Beto
yonso,
beto
vandaka**

***kuyungana bonso mameme,
konso muntu na nzila na yandi.
Ebuna Mfumu Nzambi tulaka
mbi na beto yonso
na zulu ya ntu na Yandi (Mesia).
Yezaya 53 :6***

Leso 20. Nzambi pesaka bansiku na Yandi na zulu ya matadi diaka.

Kubasika kapu 33 tii na 35 :2

I. Preparasio ya moniteur ---

🕒 Kikuma ya lesa :

Na nsuka ya lesa yai, bana ta bakisa nde, ntangu beto me sala mbi, kana beto kudikumumusa ti balula ntima na beto, Nzambi kele mbote kuvutula beto na kintwadi ti Yandi. Yo yina, bo ta vanda nswalu kuvutuka na Nzambi konso ntangu ya bo vila nzila.

♥ Verse ya kulunguka :

...Mfumu Nzambi tubaka nde : « Mono kele Mfumu Nzambi. Mono kele na mawa mingi ti fuluka ya nlemvo. Mono ke wa makasi nswalu ve. Mawa ti masonga na Mono kele ya nene... Kubasika 34 :6

🗣️ Bankunga ya kwenda nzila mosi ti lesa yai :

Kudikumumusa na Meso ya Nzambi Nzambi Ta Wila Beto Mawa

II. Kusala Revisio –

† Bansiku ya Nzambi me sonika na ditadi na diboko na Yandi , nki salamaka na yo? (Moize losaka yo na ntoto, ebuna yo pasukaka.)

† Sambu na nki Moize losaka yo na ntoto ? (Na makasi, sambu yandi monaka nde dezia bantu me fwaka bansiku ya ntete ti ya zole.)

III. Kulonga bana lesa yai –

➡ Kuyantika lesa :

Nzambi pesaka bantu bansiku na Yandi, kusonika na batablo ya matadi, kusonika na musapi ya Nzambi Yandi mosi. Kansi ntangu yai, tablo ya bansiku yina, yo ke lala na ntoto ya kupasuka. Keti Nzambi ta wila bantu ya Israele mawa ? Keti Yandi ta pesa bo bansiku na Yandi diaka ? Beto ta mona nki me salama na Kubasika kapu 33.

🏠 Developpement--Mambu ya nene ya lesa yai na banti 4 :

20.1 Nzambi vandaka na makasi mingi na bantu ya Israele, kansi Yandi wilaka bo mawa sambu Moize sambilaka bo. Yandi ndimaka kusonika bansiku na Yandi na matadi mbala ya zole.

📖 Tangila bana somere yai : Kubasika 33

Bantu ya Israele me sala mambu mosi ya mbi na mpila bo salaka kiteki ti sambaka yo. Mbi ya nene na mpila bo tubaka nde kiteki yina vandaka Nzambi na bo ya vandaka twadisa bo. Yo yina, Nzambi songaka bo nde, “Sambu na Mono, Mono ke twadisa beno ve, Mono ke kwenda ve na beno. »

Bantu ya Israele waka nsangu yina na mawa bonso muntu me fwa. Moize sambilaka bo Nzambi ngolo, ebuna Nzambi waka bisambu na yandi ti wilaka bo mawa, sambu Nzambi vandaka na kiese na Moize.

📖 Tangila bana : Kubasika 34 :1-3

1 Mfumu Nzambi tubaka na Moize nde : « Sala matadi zole bonso yina ya ntete. Mono ta sonika diaka mambu ya vandaka na matadi ya nge pasulaka.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki me salama.

20.2 Moize salaka matadi diaka. Yandi tombukaka ngumba ye lombaka Nzambi kuwila bantu ya Israele mawa.

📖 Tangila bana : Kubasika 34 :4-9

4 Yo yina, Moize salaka matadi zole bonso yina ya ntete. Ebuna na suka-suka yandi kwendaka na zulu ya ngumba ya Sinai...

5-6 Mfumu Nzambi kwisaka kukulumuka... ebuna Yandi tubaka...nde : « Mono kele Mfumu Nzambi. Mono kele na mawa mingi ti fuluka ya nlemvo. Mono ke wa makasi nswalu ve. Mawa ti masonga na Mono kele ya nene...

8-9 Nswalu Moize fukamaka ilungi na ntoto. Yandi sambaka Nzambi nde : “...pardo Mfumu, kwenda ti beto nzila mosi...wila beto mawa sambu na masumu na beto...”

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣️ Bana yimba ti kina sambu na kusonga nki

me salama.


20.3 Nzambi ndimaka kupesa bo nsi ya Yandi silaka bo, kansi Yandi songaka bo kulanda bansiku na Yandi kuna, kulanda ve mpila ya bantu kuna vandaka kusamba biteki.


 **Tangila bana somere yai :** Kubasika 34 :10-28


Yo yina, Nzambi ndimaka kukwenda ti bo, kusala bimpa na Yandi sambu na kubasisa bantu ya vandaka kuzinga kuna.

Kansi Nzambi kebisaka bo ngolo nde bo landa ve mpila ya bantu ya bo ta mona kuna. Kuna, bo ta mona diaka biteki mingi. Bo fweti fwa-fwa, ti zenga-zenga, ti bwisa-bwisa biteki yina yonso. Bo samba ve biteki yango, sambu yo kanga bo ve na mbi diaka.


Nzambi kele Nzambi ya zwa. Yandi ke ndima banzambi ya nkaka ve. Bo fweti wakana ve ti bantu kuna. Bana na bo fweti kwelana ti bantu ya kuna ve.

 Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

20.4 Ntangu Moize kulumukaka na ngumba, bantu monaka nde luse na yandi vandaka kupela bonso ntangu. Moize bingaka bantu yonso sambu bo kuwa nki Nzambi me tuba.

 **Tangila bana :** Kubasika 34 :29-35, 35 :1-2
29 *Ntangu Moize kwisaka kulumukaka...ti matadi yina zole ya Kuwakana na maboko, ilungi na yandi vandaka kupela bonso ntangu, sambu yandi vandaka me solula ti Mfumu Nzambi. Kansi yandi kuzabaka yo ve.*

30-32 *Aroni t bantu yonso, ntangu bo talaka Moize, bo monaka nde ilungi na yandi vandaka pela bonso ntangu... Moize bingaka bo...ti yantikaka kusonga bo bansiku yonso ya Mfumu Nzambi pesaka yandi...*

35 :1-2 *Moize bingaka bantu yonso ya Israele . . . Yandi tubilaka bo nde : « Mfumu Nzambi me tuba*

na beno nde : « Beno sala kisalu na beno bilumbu sambanu, kansi kilumbu na nsambwadi kele Kilumbu ya Kupema, kilumbu ya Mono, Mfumu Nzambi... »

>|< **Kumanisa lesu :**

Bantu ya Israele salaka mbi ya nene kusala kiteki ya ngombe. Kansi Nzambi wilaka bo mawa ntangu Moise lombilaka bo Nzambi. Beto yonso mpi, beto ke na mfunu ya mawa ya Nzambi. Kana beto me bebisa, beto kudikulumusana na ntwala na Yandi, beto lomba Yandi ndolula. Yandi kele Nzambi ya mawa. Yandi ta vanda nswalu kulolula beto.

Devoir sambu na bakristo :

Beno bana ya zaba Yesu, devoir mono ke pesa beno yo yai : Kana nge zaba nde nge me bebisa, nge me vila nzila, nge me bwa na mbi, kinga ve. Kuvanda lulendo ve, kansi kudikulumusana. Kwenda nswalu kundima mbi nge me sala ti kulomba ndolula na Nzambi. Yandi kele Nzambi ya mawa. Yandi ta lolula nge.

Kubinga bana ya zaba Yesu ntete ve :

Mbala ya nkaka nge zaba nde nge me kwisa na Yesu ntete ve kubalula ntima na nge, kulomba Yandi kuvanda Mvulusi na nge. Nzambi tubaka nde, « Mono ke nungisaka ve bantu yina ke salaka mbi.” (Kubasika 34:7b).

Beto yonso me sala mbi. Nge me sala mbi. Nzambi lenda nungisa nge ve, kansi Yandi lenda wila nge mawa kana nge ndima nde nge kele nkwa-masumu. Kwikila Yesu Kristo. Lomba Yandi pardo. Nge lenda binga Yesu kugulusa nge konso sika nge kele, to konso ntangu.

Kana ntangu lunga--

Kulonga Mikanda ya Bible –

Bana tuba diaka bimvuka ya mikanda ya kele na Kuwakana ya Ntama :

Mikanda ya Moize (5)

Mikanda ya Histoire ya Israele na nsi na bo (12)

Mikanda ya Poesie (5)

Mikanda ya nda ya Baprofete (5)

Mikanda ya nkufi ya Baprofete (12).

Mikanda yonso 39 na Kuwakana ya Ntama.

===NSUKA YA LESO 20



Leso 20

Nzambi
pesaka
bansiku na
Yandi na
Moize mbala
ya zole.

***...Mfumu
Nzambi
tubaka
nde :***

***« Mono kele Mfumu Nzambi.
Mono kele na mawa mingi ti
fuluka ya nlemvo.
Mawa ti masonga na Mono
kele ya nene.***

Kubasika 34 :6

Leso 21. Bantu salaka nzo ya bisambu ya ntenta ti yantikaka kusamba kuna.

Kubasika 35 :4 –40 :38

I. Preparasio ya moniteur--

🎯 Kikuma ya lesu :

Bana ta samba Nzambi kuluta, sambu bo ta bakisa nde Nzambi zola beto kusamba Yandi na kiese yonso, mpi na ntima na beto yonso.

❤ Verse ya kulonguka :

Mono ta yimbila Nge na kiese ti na ntima na mono yonso, sambu Nge me gulusa Mono.

Bankunga 71 :23

🗣 Bankunga ya kwenda nzila mosi ti lesu yai :

Bandeke Kele Yimba

Konso Lumbu Kiese Kele

II. Kusala Revisio –

👉 Na mposu me luta, beto monaka nde ata bantu ya Israele me fwaka dezia nsiku ya ntete ti ya zole na Yandi, Nzambi lolulaka bo ntangu Moize sambilaka bo Nzambi. Ntangu yai, bo ta landa diaka voyage na bo kukwenda na nsi ya Nzambi silaka bankaka na bo.

III. Kulonga bana lesu yai –

➡ Kuyantika lesu :

Ntangu yai, bantu ya Israele zola kulanda nzila diaka. Kansi bo fweti sala kima mosi na ntwala bo lenda kwenda. Nzambi me songa bo kusala yo dezia, kansi bo me kangama na mambu ya kiteki ya ngombe. Yo yina, bo me sala yo ntete ve. Nki kima bo fweti sala ? Bo fweti sala nzo ya ntenta ya bisambu, ti bima yonso ya bo fweti sadila na kati na yo na bisambu.

🏠 Developpement--Mambu ya nene ya lesu yai na banti 4 :

21.1 Moize bingaka bantu kunata makabu sambu na kutunga nzo ya ntenta ya bisambu ti kusadila mayele Nzambi me pesa bo kutunga ti kusala bima sambu na nzo yina.

📖 **Tangila bana :** Kubasika 35 :4-10

4 *Moize tubaka na bantu yonso ya Israele nde : « Mfumu Nzambi me tuba nde :*

5-7 *Benofweti pesa makabu na Mono, Mfumu Nzambi. Konso muntu yina me ndima kupesa yandi mosi na luzolo na yandi, yandi ta nata makabu yai : wolo, arza ti bronze, bansinga ya lene ya bule, ya mbwaki...lino ya kitoko, lele ya bo me sala na mika ya nkombo, mukanda ya dimeme...(ti bima mingi ya nkaka.)*

10 *Bantu yonso ya mayele, bayina ke zaba kusala bima ya kitoko ya mutindu na mutindu, bo kwisa kusala bima yai ya Mfumu Nzambi me songa.*

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣 Bana yimba ti kina sambu na kusonga nki me salama.

21.2 Bantu nataka bamakabu mingi ti ya kuluta.

📖 **Tangila bana :** Kubasika 25 :20--36 :7

20 *Bantu yonso ya Israele bikisaka Moize, bo panzanaka.*

21 *Ebuna konso muntu yina ndimaka kupesa makabu na luzolo na yandi mosi, yandi kwisaka kunata bima sambu na kutunga Nzo-Nzambi ya ntenta, ti bilele ya kinganga-Nzambi, ti bima ya nkaka sambu na kusala bisalu yonso ya nzo-Nzambi.*


22 *Bantu yonso vandaka kwisa, babakala ti bankento. Konso muntu, na luzolo na yandi, kwisaka kunata bima ya kitoko ya yandi me sala.*

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

🗣 Bana yimba ti kina sambu na kusonga nki me salama.

21.3 Moize twadisaka bantu kusala yonso na mpila Nzambi songaka bo. Yandi tulaka babakala ya fami ya Aroni bonso banganga-Nzambi.


 **Tangila bana somere yai :** Kubasika 36 :8—40 :33


Moize songaka bantu mpila Nzambi me songa yandi, ebuna bo landaka lukanu ya Nzambi. Bo tungaka mesa-kimenga ti lupangu. Bo tulaka bamwinda, ti bilele ya banganga-Nzambi. Bo tulaka Aroni ti bana ya bakala na yandi banganga-Nzambi bonso Nzambi songaka bo.

Bo salaka malonga ti mafuta ya nsudi ya kitoko sambu na kusadila na bisambu. Bo salaka Sanduku ya Kuwakana bonso kisika ya Nzambi ta kutana ti mfumu ya banganga-Nzambi. Bo salaka mesa ya mampa ti bima yonso ya Nzambi songaka bo. Na kiese yonso bo salaka. Yai ta vanda nzo ya bisambu na bo !


Ntangu bo manisaka kusala, bo tedimisaka ntenta yina ti tulaka bima yonso na kati na mpila Nzambi songaka bo. Ebuna bo manisaka kisalu.

? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.


21.4 Lukumu ya Nzambi fulusaka nzo ya ntenta, ti dituti fikaka yo sambu na kutwadisa bo.


 **Tangila bana :** Kubasika 40 :34—37
34 Ntangu yai, dituti fikaka Nzo-Nzambi ya ntenta, lukumu ya nene ya Mfumu Nzambi mpi fulukaka muna...

36-37 Kana bantu ya Israele ke zola kupanza camp sambu na kwenda kutunga camp ya nkaka, bo fweti vingila tii kuna dituti katuka na zula ya nzo-Nzambi. Kana yo me katuka ve, bo lenda kwenda ve. Bo fweti vingila tii ntangu yo katuka.

38 Dituti vandaka kusonga nde Mfumu Nzambi vandaka ti bo. Na mwini yo vandaka kuvanda na zulu ya nzo, ebuna na mpimpa tiya vandaka kupela. Mpidina, bantu ya Israele vandaka kumona yo bilumbu yonso ya bo vandaka kutambula.


? Yula bana bakestio ke tadila baverse yai.

 Bana bageste to mwa-seneti ya ke songa nki me salama.

 Bana yimba ti kina sambu na kusonga nki me salama.

>|< Kumanisa lesu :

Kiese ya mingi sambu bo vandaka na nzo ya bisambu na bo mosi ! Kiese ya mingi sambu bo zabaka nde Nzambi vandaka kukwenda nzila mosi ti bo ! Kiese ya mingi sambu Nzambi me songa bo mpila bo lenda samba Yandi na mpila ya ta pesa Yandi kiese ! Privilaze ya nene kusamba Nzambi ya salaka zulu ti ntoto, Nzambi ya kieleka !

 **[Moniteur, awa kele ntangu ya mbote kulonga to kureviser verse ya kulonguka, Bankunga 71:23.]**

 **Devoir sambu na bakristo :**

Devoir mono ke pesa beno bakristo mposo yai kele kusamba Nzambi na kiese ti na ntima na nge yonso.

 **Kubinga bana ya zaba Yesu ntete ve :**

Kansi, kana nge me yamba Yesu ntete ve na ntima na nge, zaba mbote nde Nzambi ta ndima ve bisambu ya ke kwisa na nzila ya nkaka, kansi na Yesu ve. Kwisa na Yesu ti tula Yandi ntima. Yandi ta gulusa nge, ebuna nge mpi lenda samba Yandi na kiese.

Kana ntangu lunga--

 **Longa Mikanda ya Bible --**

Sadila Bible na nge. Kangula na mukanda ya Kuyantika ti songa bana. Yula bo nge mukanda bo ta mona na nima na yo.

Pesa Bible na nge na mwana ya zaba kutanga. Yandi luta na ntwala ndambu, yandi mona mukanda ya Kubasika ti songa bana ya nkaka Bana yonso tuba zina yina, Kubasika.

Yula bana nki bo ta mona na nima ya Kubasika. Pesa Bible na nge na mwana ya lenda tanga. Yandi kwenda na ntwala ndambu, yandi mona mukanda ya Levi. Yandi songa bana ya nkaka. Bana yonso tuba zina yina: Levi. Moize ti Aroni vandaka bantu ya dikanda ya Levi.

===NSUKA YA LESO 21



Leso 21

**Mono ta yimbila Nge na kiese
ti na ntima na mono yonso,
sambu Nge me gulusa mono.**

Bankunga 71:23

Leso 22. Nzambi songaka Moize bansiku ya nkaka ya tadilaka nzo ya bisambu ya ntenta.

(Somere ya mukanda ya Levi yonso, kapu 1-27)

I. Preparasio ya moniteur

🕒 Kikuma ya lesa :

Bana ta bakisa nde Bayuda landaka bansiku mingi ti pesaka bamakabu mingi na mpila Nzambi songaka bo sambu na ntangu yina, kansi ntangu Yesu kwisaka, Yandi lungisaka mambu yina yonso. Yo yina, bo ta tula ngolo kulanda Yesu.

♥ Verse ya kulunguka :

(Yesu nde :) « Beno banza ve nde Mono me kwisaka sambu na kufwa Bansiku ya Moize ti malongi ya bapofete. Mono me kwisaka ve sambu na kufwa yo, kansi sambu na kulungisa yo mpenza. Matayo 5 :17

🔊 Moniteur, yilama na bankunga ya kwenda nzila mosi ti lesa yai :

Aleluya, Imene !
Na Kati ya Yesu

II. Kusala Revisio –

† Na lesa me luta, beto manisaka mukanda ya Kubasika. Beto monaka nde bantu ya Israele manisaka kusala Nzo ya Bisambu ya Ntenta na mpila ya Nzambi songaka bo kusala, ti lukumu ya Nzambi kubwaka sambu na kufulusa nzo yina.

III. Kulonga bana lesa yai –

➡ Kuyantika lesa :

Bantu ya Israele vandaka na nzila ya voyage kukwenda na nsi ya Nzambi me sila kusonga bo. Bo me kuma na Ngumba ya Sinai. Kuna, Nzambi pesaka bo bansiku na Yandi, nki mutindu bo fweti zinga bonso bantu ya Nzambi. Kuna, Nzambi songaka bo nki mutindu kusala Nzo ya Bisambu ya Ntenta, ti bo manisaka kusala yo na mpila Yandi tubaka. Lukumu na Yandi me fulusaka nzo yina. Keti bo lenda landa voyage na bo ntangu yai kukwenda na nsi ya Kanana ?

Ntete ve. Ntete, Nzambi fweti songa bo nki mutindu kusamba Yandi na Nzo ya Bisambu ya bo me sala. Bansiku ya Yandi pesaka bo kele na mukanda ya Levi na Bible na beto. Beto binga yo Levi, zina ya tribu mosi ya Israele, sambu Nzambi solaka babakala ya tribu yina kuvanda banganga-Nzambi, ti kuvanda bantu ya ta sadila Yandi na Nzo ya Bisambu. Nki bansiku ya bisambu Nzambi pesaka bo ?

🏠 **Developpement--Mambu ya nene ya lesa yai na banti 4 :**

22.1 Moize sonikaka mukanda ya Levi ya mvimba sambu na kusonga Bayuda nki mutindu kunata bamakabu na Nzambi. Banganga-Nzambi fweti pesa makabu ya menga --ntete sambu na masumu na bo mosi, na nima sambu na bantu ya nkaka.

📖 **Tangila bana :** Levi 1 :1--5b, 9 :8 & 15a 1-2 *Mfumu Nzambi bingaka Moize kuna na Nzo-Nzambi ya ntenta...Yandi songaka yandi kutubila bantu ya Israele nde : « Kana muntu zola pesa Mfumu Nzambi makabu ya mbisi, yo lenda vanda ata ngombe ata dimeme to nkombo.*

3 *...yandi fweti nata ngombe ya bakala ya kukonda kifu...na munoko ya Nzo-Nzambi ya ntenta sambu Mfumu Nzambi kundima yo.*

4-5 *Muntu yango fweti tula diboko na yandi na zulu ya ntu ya ngombe...yandi fweti fwa yo... Menga na yo, banganga-Nzambi...fweti pesa yo makabu...*

9 :8 *Aroni kwisaka penepene na mesa-kimenga, yandi fwaka mwana-ngombe ya yandi fweti pesa bonso makabu sambu na masumu na yandi mosi.*

15 *Na nima, Aroni pesaka Mfumu Nzambi makabu ya bantu ya Israele...*

Baebreo 7 :27 Yandi (Yesu) kele ve bonso bamfumu ya nkaka ya banganga-Nzambi : Kana Yandi vandaka bonso bo, Yandi zolaka kuvanda na mfunu kupesa makabu na Nzambi konso lumbu, ntete sambu na masumu na Yandi mosi, na nima sambu na masumu ya bantu ya nkaka.

Kansi Yandi...pesaka makabu na Nzambi mbala mosi mpamba, ntangu Yandi kudipesaka Yandi mosi.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

22.2 Banganga-Nzambi lenda ve kunwa malafu ya ngolo, sambu bo fweti zenga makambu ya Nzambi ti longa bantu ndinga na Yandi.

📖 **Tangila bana :** Levi 10 :8-11

8-9 Mfumu Nzambi tubaka na Aroni nde : « Nge ti bana na nge, beno lenda nwa ve vinu to konso malafu ya ngolo ntangu beno ke kota na Nzo-Nzambi ya ntenta. . .

10 Mpidina beno ta kuka kuzaba kana kima kele sambu na Nzambi to sambu na bantu, kana yo kele ya nsiku to nsiku ve.

11 Beno ta kuka mpi kulonga bantu ya Israele bansiku yonso ya Mono Mfumu Nzambi...

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

22.3 Nzambi songaka bo kulanda bansiku na Yandi, kansi bampila ya bantu ya nsi yina ve, ti bansiku mingi ya nkaka. Mbandu-kusamba ve biteki ya bantu ya nsi yina, kukwenda ve na banganga-ngombo.

📖 **Tangila bana :** Levi 20 :1-6, 22-23, kapu 23-27 somere

1-6 Mfumu Nzambi songaka Moize., « Konso muntu ke sosa bantu yina ke kwendaka kuyula mambu na bafwa, ata na banganga-ngombo, Mono ta balukila yandi...

7 Beno kudipesa na Mono Nzambi sambu beno vanda bantu na Mono ...

22 « ...Landa bansiku na Mono yonso ti mambu yonso ya Mono me tuba na beno. Mpidina nsi

ya Kanana, ya Mono ke nata beno na kutunga muna, yo ta luka beno ve.

23 Beno landa ve bikalulu ya bantu yina ke zingaka kuna. Mono ke kula bo na ntwala na beno sambu bo me sala mambu yai yonso ya mbi...

Bakapu 23-24 Somere Nzambi pesaka bansiku mingi ya nkaka-- nki mutindu bo fweti zinga ti nki mutindu bo fweti samba Yandi, bafete ya bo fweti sala, ti madia ya bo fweti kudia. Bansiku mingi mutindu na mutindu.

? Yula bana bakestio ke tadila baverse yai.

👥 Bana bageste to mwa-seneti ya ke songa nki me salama.

👤 Bana yimba ti kina sambu na kusonga nki me salama.

22.4 Nzambi lungisaka bamakabu yonso ti bansiku yonso na kati ya Yesu.

📖 **Tangila bana :** Matayo 5 :17

17 (Yesu nde :) « Beno banza ve nde Mono me kwisa sambu na kufwa Bansiku ya Moize ti malongi ya bapofete. Mono me kwisa ve sambu na kufwa yo, kansi sambu na kulungisa yo mpenza.

Kaka Yesu landaka bansiku yonso ya Nzambi na mpila ya pesaka Nzambi kiese. Ntangu Yesu pesaka menga na Yandi na zulu ya kulunsi, Yandi manisaka mambu ya bamakabu ya menga, sambu Yandi pesaka makabu ya vandaka kulunga. Kiese na kiese ! Beto bakisa yo bubuyai, kansi ntangu yina, bo vandaka kaka kumeka kulungisa bansiku ya Nzambi yina.

>|< Kumanisa leso :

Bayuda landaka bansiku mingi ya Nzambi pesaka bo sambu na ntangu yina. Bima yina, mingi songaka kukwisa ya Yesu. Bonso bo pesaka mbisi ya makabu ya kifu ve, Yesu vandaka na masumu ve, kifu ve. Yandi kudipesaka makabu ya Yandi mosi na zulu ya kulunsi bonso makabu ya kitoko ya kulunga.

👤 Devoir sambu na bakristo :

Devoir mono ke pesa beno bakristo, yo yai : Konso lumbu na mposi yai, tonda Yesu sambu na menga

na Yandi. Tonda Yandi sambu Yandi lungisaka makambu ya bansiku yonso, Yandi lungisaka mfunu ya kupesa makabu ya menga.

✝ Kubinga bana ya zaba Yesu ntete ve :

Mbala ya nkaka nge me tula ntima na Yesu ntete ve. Mbala ya nkaka nge banza nde nge mosi lenda lungisa bansiku ya Nzambi. Kansi nge zaba nde nge me lungisa yonso ve. Nge me sala masumu. Beto yonso me sala masumu. Yesu Kristo pesaka menga na Yandi kaka sambu nge lenda guluka. Keti nge ta yamba Yandi bubuyai bonso Mvulusi na nge ?

Kana ntangu lunga—

Kulonga Mikanda ya Bible --

Kabisa bana na bandambu zole. Bo ta tuba mikanda tatu ya ntete ya Bible ti nki ya mfunu me luta na konso mukanda. Ndambu ya ntete ta tuba fraze ya ntete na nima ya nge. Ndambu ya zole ta tuba fraze ya zole na nima ya nge. Sala yo mbala zole. Na nima, tesa kana bo lenda tuba yo bo mosi.

Fraze ya ntete : Fraze ya zole :

Kuyantika

Bima yonso yantika

Kubasika

Kubasika na kimpika

Levi

Banganga ti bamakabu

===NSUKA YA LESO 21

Leso 22

**(Yesu
nde :)
« Beno
banza
ve nde
Mono
me
kwisaka**



**sambu na kufwa Bansiku ya Moize
ti malongi ya baprofete.**

**Mono me kwisaka ve sambu
na kufwa yo, kansi sambu na
kulungisa yo mpenza.**

Matayo 5 :17

Leso 23 Revisio ya Mikanda ya Kubasika ti ya Levi

I Preparasio ya Moniteur—

☉ Kikuma ya Leso :

Beto ta sala baleso zole ya revisio. Na lesa yai, bana ta bambuka diaka mambu ya nene bo me longuka na mikanda yai zole, Kubasika ti Levi. Na Leso 22, na mposo ke kwisa, bo ta yindula nki mikanda yai zole kele kusonga beto na kati ya mabanza ya mvimba ya Bible, to na lukanu ya nene ya Bible yonso.

Moniteur, kusala na ntwala :

Nge ta sadila linya ya ntangu ya ke songa mikanda ya Kubasika ti Levi. Tala linya yina mbote-mbote ti tula ngolo kubakisa yo yonso.

Sonika mambu ya nene ya salamaka mosi-mosi na bapapier na bisono ya nene. Nge ta sadila bapapier yina na nsaka mosi.

Nata diaka bapapier 6 ti markeur sambu na bana kusadila.

Kana ntangu lunga—

Kulonga Mikanda ya Bible—

Bana yimba « Mikanda ya Moize ». Beto me longuka mikanda tatu ya mikanda yina, ti mikanda zole me bikala. Bana tuba mikanda ya Moize yonso na ordre.

II. Revisio—

† Revisio ya lesa me luta :

Na mposo me luta, beto tubaka malongi ya mukanda ya Levi yonso na nkufi. Beto monaka nde mukanda ya mvimba kele bansiku nki mutindu kusamba Nzambi na kati na nzo ya bisambu ya ntenta ya bantu ya Israele me sala.

III. Kulonga bana lesa (Leso ya Revisio)

Bubu yai beto zola kubambuka diaka mambu ya nene ya beto me longuka na mikanda ya Kubasika ti Levi.

[Moniteur, songa bana linya ya ntangu, ti tendula yo. Yo ke monika na nima ya lesa 24. Bafoto na yo ke songa bahistoire ya nene na mukanda ya

Kubasika. Foto mosi na nsi ya linya, (foto ya nganga-Nzambi na lele na yandi), yo ke songa malongi ya mukanda ya Levi. Tala bakapu ya ke songa konso histoire. Tala badate ya mambu yina me salama. Yonso kele na ntwala ya Yesu, sambu Kuwakana ya Ntama ya mvimba, bo me sonika yo na ntwala Yesu kwisaka.

Pesa nzila na bana kuyula bakestio ya tadila linya ya ntangu ya nge ke songa.]

Nsaka ya Revisio :

Pesa bana bitini ya papier ya ke songa mambu ya nene ya salamaka. Balula-balula yo sambu yo landa na ordre ve.

Yula nani banza yandi kele na papier ya ke songa mambu ya ntete ya salamaka. Yandi kwisa na ntwala ti songa bana ya nkaka papier na yandi. Na nima, yula nani kele na mambu ya zole, etc. Bana ya nkaka tala nde bo yonso ke songa mambu ya salamaka na ndonga, bonso yo salamaka.

Balula bapapier ti sala yo diaka.

Nsaka :

Yula bana nani vandaka bantu ya nene na mikanda yai, Kubasika ti Levi. Bo lenda tuba :

Moize Aroni Farao
Jethro Miriami etc.

Bantu ya nkaka mpi ke possible, bonso fami ya Moize to mwana ya Farao ya bakaka Moize na fami na yandi.

Mwana mosi lenda baka bapapier ti markeur ya nge me nata, yandi sonika na bisono ya nene bazina bantu yonso ya bana me tuba.

Kabisa bana na bandambu to ba-ekipe zole. Bo lenda baka batitre bonso 'Bana ya Kinshasa' ti 'Bana ya Brazzaville.'

Tula bapapier na zulu ya mesa na mpila nde bisono kele na nsi, ke monika ve. Mwana ya ekipe ya ntete sola papier mosi. Bana ya ekipe na yandi fweti songa mambu yonso ya bo zaba sambu na muntu yina. Bo baka 10 points sambu na konso mambu bo tuba. Kansi, kana bo tuba kima ya kele kieleka ve, bo fweti katula bapoint 20. Bo tuba tii ntangu ya bo zaba kima ya nkaka ve, to ntangu ya

bo tuba kifu.

Na nima, beno tala bo me baka bapoint ikwa, ti ekipe ya nkaka sala kiteso mosi.

Ekipe ya baka bapoint ya kuluta me nunga. Bo kele shampio. Yangalala ti kina ti bo.

Luyantiku, Na Nzila, ti Na Nsuka :

- Na luyantiku ya mukanda ya Kubasika, bantu ya Israele vandaka wapi ?
(Na nsi ya Ezipte)
- Na nsuka, bo vandaka wapi ?
(Na Ngumba ya Sinai na sika ya zelo na zelo)
- Na luyantiku, bo vandaka na nki konditio ?
(Bampika na luzingu ya mpasi)
- Na nsuka, bo vandaka na nzila kukwenda wapi ?
(Na nsi ya Kanana ya Nzambi me sila kupesa bo.)
- Nki bampasi bo monaka na nzila ?
(Nzala ya masa, nzala ya madia)
- Nki mutindu Nzambi sadisaka bo ?
(Yandi sadisaka bo na masa ti madia)
- Nki masumu ya nene bo salaka na nzila ?
(Bo tungaka kiteka ya ngombe.)
- Na nsuka ya mikanda yai zole, Kubasika ti Levi, Nzambi me pesa bo nki ?
(Bansiku na Yandi)
- Nki me songa kiese ya Nzambi na nzo ya bisambu ya ntenta ya bo me tunga ?
(Lukumu na Yandi fulusaka nzo yina.)

>|< Kumanisa Leso :

Na nsuka ya mikanda ya Kubasika ti Levi, bana ya Israele me yilama kulanda nzila diaka, kukwenda na Kanana, sika ya Nzambi me sila kupesa bo.

Devoir sambu na bakristo :

Nki mambu kuluta nene Mpeve ya Nzambi me longa nge na kati ya mikanda yai, Kubasika ti Levi ?
[*Moniteur, bana lenda pesa mvutu.*] Lomba Nzambi sesepi yai nde Nzambi sadisa nge kubambuka mambu yina, ti landa kaka kusala mpila Mpeve ya Nzambi ta songa nge.

Kubinga bana ya zaba Yesu ntete ve :

Kana nge zaba nde nge me yamba Yesu ntete ve tii ntangu yai, nki ke kanga nge nzila ? Beto me kuma na nsuka ya baleso yai ya Kubasika ti Levi. Kana nge kinga, nge lenda kuma na nsuka ya luzingu ya nge kukonda kuzaba Yesu. Kana nge ke na mfunu ya lusadisu sambu na kukwisa na Yesu, kwisa na beto na nima ya ecodim. Beto ta vanda na kiese ya mingi na kusadisa nge.

===NSUKA YA LESO 23, REVISIO YA MIKANDA YA KUBASIKA TI LEVI

Leso 24 Mikanda ya Kubasika ti Levi na Kati ya Histoire ya Bible

Na Bible ya mvimba, beto mona mpila Nzambi gangaka bantu, mpila beto bwaka na masumu, mpila Nzambi tindaka Mesia-Mvulusi sambu na kuvutula beto na Yandi, ti na nsuka, mpila Yandi ta vutula beto na Yandi diaka.

Mambu yai zole ya mfunu, beto monaka na mukanda ya Kuyantika :

- Mpila Nzambi gangaka bantu
- Mpila beto bantu bwaka na masumu

Mpila Nzambi tindaka Mesia-Mvulusi, beto ta mona yo na Kuwakana ya Mpa—na mikanda ya bo sonikaka na nima ya kwisa ya Yesu. Beto ta mona yo kuluta na Nsangu ya Mbote ya sonikaka na Matayo, Marko, Luka, ti Yoane.

Mpila Nzambi ta vutula beto na Yandi diaka, beto mona yo na mukanda ya nsuka ya Bible, mukanda ya Kusonga.

Beto me tuba bimvuka zole ya mikanda yai :

Mikanda ya Kuwakana ya Ntama

(na ntwala ya Yesu)
(Mesia-Mvulusi ta kwisa)



Kuyantika
Yobi
Kubasika-Levi

Mikanda ya Kuwakana ya Mpa

(na nima ya Yesu)
(Yesu kele Mesia-Mvulusi, ti Yandi me kwisa !)



-----Nsangu ya Mbote-----



-----Kusonga



Ya sonikaka na Matayo, Marko, Luka, Yoane

Kansi, tala. Espase ya nene kele na kati ya Kuyantika ti Nsangu ya Mbote. Yai ke songa nde na nima ya Kuyantika ti Kubasika, Nzambi pesaka bantu ya nkaka ndinga na Yandi mpi. Bo sonikaka mikanda ya nkaka ya Kuwakana ya Ntama. Na kati ya mikanda yina, Nzambi solaka dikanda mosi, dikanda ya Abrami na nzila ya mwana na yandi Isaki, kubuta Mesia-Mvulusi yina ta vanda sambu na bantu yonso.

Tangila bana : Kuyantika 12 :3 [“...Na kati ya nge, Mono ta sakumuna bantu yonso ya nsi-ntoto.”](#)

Nzambi solaka dikanda ya Abrahami mpi kusonika Bible, Ndinga ya Nzambi, sambu na beto yonso.

Nzambi silaka kupesa bo bana mingi sambu bo kuma nasio, mpi kupesa bo ntoto ya Kanana.

Kuwakana ya Ntama ke songa nki mutindu Nzambi salaka yo. Yo kele histoire ya bo, dikanda ya Abrahami, kansi yo kele sambu na beto yonso.

Na mukanda ya Kuyantika, Nzambi silaka Abrahami bana mingi ti ntoto ya Kanana. Yandi ti bana na yandi Izaki ti Yakobi, ti bana ya Yakobi kumi na zole, bo zingaka na nsi yina, kansi bonso banzenza kaka. Nzambi pesaka yo na bo ntete ve. Na nsuka ya mukanda ya Kuyantika, beto monaka mpila bo kwendaka na Ezipte, ti mpila mfumu ya nene Farao yambaka bo kuna.

Na mukanda ya Kubasika, beto mona mpila bo kumaka bampika na Ezipte bamvula 400, ti mpila Nzambi sadilaka Moize ti Aroni sambu na kubasisa bo na kimpika.

Na mukanda ya Kubasika, beto mona mpila bo tambulaka na ntoto ya zelo na zelo tii bo kumaka na Mont Sinai, mpila Nzambi pesaka bo bansiku na Yandi, ti mpila Yandi songaka bo nki mutindu kutunga nzo ya bisambu ya ntenta.

Na luyantiku ya Kubasika, bo vandaka bampika na Ezipte. Na nsuka ya Kubasika, bo vandaka na ngumba ya Sinai. Bo me tunga nzo-Nzambi ya ntenta, ti lukumu ya Nzambi me fulusa yo.

Na mukanda ya Levi, Nzambi songaka bo nki mutindu kusamba Yandi na nzo ya bisambu yina. Bo me yilama kutambula diaka sambu bo kuma tii na ntoto ya Kanana, nsi ya Nzambi me silaka kupesa bo.

Mikanda ya Moize yonso tanu ta songa kutambula na bo tii ntangu bo kota nsi ya Kanana.

Kana beto kuma na kimvuka ya mikanda 12 ya beto binga “Histoire ya Bazwif na Ntoto na Bo,” beto ta tanga mpila bo kotaka ti mpila bo zingaka muna. Mikanda yai ta yantikaka na mukanda ya Yozue.

Beto me mona Mukanda mosi ya Poesi dezia—mukanda ya Yobi, ya salamaka na ntangu ya Abrami. Mikanda ya nkaka ya Poesi ti Mikanda ya Profesi ya nda ti ya nkufi, mikanda yina yonso ke tadila histoire ya bantu ya Israele na kati ya nsi na bo mpi. Yo kele kusonika ya bantu ya ntangu yina ya sonikaka poesie, ti ya sonikaka profesi.

- Yo yina, ntangu beto sukisa baleso ya beto ya Kubasika ti Levi, bantu ya Israele kele wapi ?
(Na ngumba ya Sinai na nzila kukwenda kukota nsi ya Kanana)

 **Bana yimba** ‘Mikanda ya Moize.’

 **Verse ya Kulonguka :** *2 Piere 1 :21*

Sambu ata profete mosi ve me tuba na luzolo ya kimuntu, kansi bo tubaka kaka na zina ya Nzambi. sambu Mpeve-Santu vandaka kusonqa bo mambu yonso ya bo vandaka kutuba.

 **Bankunga ya Kuyimba :**

Bi-bi-la !

Kuwa Bible, Tanga Bible

O, Bible Kele Kieleka

===NSUKA YA LESO 24, TI NSUKA YA BALESO YA KUBASIKA-LEVI YONSO

Mukanda ya Kuyantika

Kapuu 1-2

Luyantiku

Nzemono

Kapuu 2

Adami
Ti Eva

Makwela

Kapuu 3

Kapuu 4

Kaini
Kufwa
Abele

Kapuu

6-9

Masa ya
Nene

Kapuu

11

Nzo ya Nda
Rebelio
Na Babele



Kiteso

ya

4,000

2,400

2,200

Bamvula na ntwala ya Yesu

Mukanda ya Kuyantika

Kapu

12

Abrahami

Kapu

21>

Izaki

Kapu


27>

Yakobi

Kapu

37-50

Yozeffi



2,000



Mukanda ya Yobi

2,000

1900

1750

1700

Bamvula na ntwala ya Yesu



Mikanda ya Kubasika ti Levi . . .

Kapu

1-4

Kimpika ti Moize



Kapu

6-13

Bampasi ti Paki

Kapu

14-15

Nzadi ya Mbwaki



Kapu

15-17

Kubokuta Masa ti Mana

Kapu

18-24

Bansiku



Kapu

21-31, 35-40

Nzo ya Bisambu ya Ntenta



1,570

1,490

Bamvula na ntwala ya Yesu

1,490


Levi

Kapu

1-27



BANKUNGA YA BETO SADILA NA MUKANDA YAI

Moniteur, NB : Bankunga ya kele na kidimbu  na ntwala ya titre, nge lenda kuwa yo na YouTube canal Ecodim Congo, to na www.teachingforAfrica.com.

Aleluya, Imene !

Aleluya, Imene !

Mono kwikila Yesu.

Mono me gulusa na menga ya Yesu.

(Repete yonso mbala zole)

Bandeke kele Yimba

Bandeke kele yimba

na Yandi

Bawanzio kumisa zina n'Yandi

Bintuntu kele songa

kitoko na bo

'Buna beto bana na Yandi

Kumisa Yandi mpi!

 **Bansiku Kumi ya Kulanda**

Nzambi kupesaka

Bansiku kumi (3x)

Ya beto fweti kulanda.

Ntete, kusamba kaka

Yandi, Nzambi (3x)

Nsiku ya ntete kulanda

Ya zole, sala biteki

Ve, Ve, Ve ! (3x)

Nsiku ya zole kulanda

Ya tatu, zitisa

zina ya Nzambi (3x)

Nsiku ya tatu kulanda

Ya iya, zitisa

Kilumbu kupema (3x)

Nsiku ya iya kulanda

Ya tanu, zitisa

Tata ti mama (3x)

Nsiku ya tanu kulanda

Sambanu, Kufwa muntu

Ve, ve, ve ! (3x)

Nsiku ya sambanu kulanda

Nswambadi, Kusala

bizumba ve (3x)

Nsiku ya nswambwadi kulanda

Ya nana, kuyiba ve

Mpangi na nge (3x)

Nsiku ya nana kulanda

Ya uvwa, kutuba

luvunu ve (3x)

Nsiku ya uvwa kulanda

Ya kumi, yuma ntima ve

Na bima ya mpangi (3x)

Nsiku ya kumi kulanda !

 **Banzambi ya Nkaka**

Banzaaa-mbi ya nkaka

Bantu me sala yo

Nge kaka ke Nzambi

Ya salaka beto ! (O Yesu) [repete yonso]

Beno Pesa Makabu

Beno baleki, beno pesa makabu

Na nzo ya Nzambi nkembo ikele ! (2X)

Beno, babakala, beno pesa makabu

Na nzo ya Nzambi nkembo ikele ! (2X)

Beno, bankento, beno pesa makabu

Na nzo ya Nzambi nkembo ikele ! (2X)

Ee, Mfumu Ee

Ee, Mfumu, ee

Na yonso ya Nge tuba

Ee, Mfumu, ee

Mono zola lemfuka

Mvutu:

Bu mo' tanga Bibila
 Mono kaka ta ndima
 Ye mono ta tuba ee,
 Mfumu, ee !

👂 Kana Mo' Menga Menga

Kana mo' mona menga
 Kana mo' mona menga
 Kana mo' mona menga ya Yesu
 Mono ta luta nzo na nge.

Konso Lumbu Kiese Kele

Na lumingu kiese kele
 Kintete ke mbote
 Kizole ngemba ya Nzambi
 Ke fuluka ntima.
 Kitatu mpi kiiya, mo' landa na mwini,
 Kitanu ke bonso zulu, mpi
 Mposo ke mbote !

Konso lumbu mono samba
 Mvulusi na mono.
 Konso lumbu Yandi kuwa, mpi
 Ya' sadisa mono.

Mvutu :

O, nkembo, nkembo, nkembo !
 O nkembo na Yesu !
 O Aleluya na Yesu !
 Kiese konso lumbu !

Kudikumumusa na Meso ya Nzambi

Kudikumumusa na meso ya Nzambi
 (Kudikumumusa na meso ya Nzambi)
 Kudikumumusa na meso ya Nzambi
 (Kudikumumusa na meso ya Nzambi)

Ye Yandi ta nangula nge (Lumbu na lumbu)
 Ye Yandi ta nangula nge !

Kumisa Nzambi

Kumisa Nzambi na kiese (3x)
 Aleluya ! Na kiese !

Kuwa Bible

Kuwa Bible
 Tanga Bible
 'Buna Nge
 Ta mona
 Nzila mbote mingi
 Nzila mbote mingi
 Ye ngangu
 Ye ngangu

Kwenda na Yesu

Kwenda na Yesu
 Konso lumbu
 Kwenda na Yandi
 Kwenda na Yesu
 Kwenda na Yesu kaka !

Kwisa na Yesu Kristo

Kwisa na Yesu Kristo (3X)
 Nge ata guluka !

Menga n'Yandi ta lunga (3X)
 Kukatula mbi !

Landa, Mo Ta Landa Nge, Mfumu

Landa, mo' ta landa Nge, Mfumu
 Landa lumbu na lumbu
 Mbasi na mono, nge zaba yonso
 Nge ta twadisa mono.

👂 Lomba na Nzambi

Beto fweti lombila
 Na Nzambi, Yandi kaka
 Ata muntu mosi ve
 Ya nkaka lenda sadisa !

MVUTU:

Lomba na Nzambi !
 Na Nzambi kaka
 Lomba na Nzambi
 Na zina ya Yesu !

Nzambi zola sadisa
 Bantu na Yandi mpenza

Yandi mene silaka
Yandi ata sadisa

Mfumu Zaba Nzila na Mono

Mfumu zaba nzila na mono
Mono fweti landa kaka
Mfumu zaba nz'ila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

Mikanda ya Moize

Mikanda ya Moize, Moize, Moize,
Mikanda ya Moize—Bansiku-Nzambi !
Kuyantika, Kubasika, e Levi, Kutanga
Ye nsuka ke Kulonga, Mikanda ya Moize !

Mo' Ta Kwisa na Nzambi na Lulendo Ve

Mo' ta kwisa na Nzambi na lulendo ve
Mo' ta kwisa na lulendo ve
Mo' ta kudikumusa na ntwala n'Yandi
Mo' ta kwisa na lulendo ve.

Mvutu :

Sambu Yandi kele Nzambi
Mo' ke Nzambi ve.
Kele Yandi me salaka mono !

Mono Kele na Nzo Kitoko, vs. 7 (Makabu Kele Kana Beto Kanga Ntima)

Mono kele na nzo kitoko
Kuna n'zulu !
Mono kele na nzo kitoko
Kuna n'zulu !
Mono kele na nzo kitoko
Kuna n'zulu !
Kuna na zulu ! (O Nzambi !)

Mvutu:

Mfumu, O Mfumu, mono ta tonda Nge
(O Nzambi)

Mfumu, O Mfumu, mono ta tonda Nge
(O Nzambi)
Mfumu, O Mfumu, mono ta tonda Nge
Kuna na zulu !

Makabu kele kana beto
Kanga ntima
Makabu kele kana beto
Kanga ntima
Makabu kele kana beto
Kanga ntima
Kuna na zulu! (O Nzambi)

Mono Me Sila Kulanda Yesu

Mono me sila kulanda Yesu (3X)
Kuvutuka, yo lunga ve.
Ata mono mosi (3X)
Ee, mono ta landa
Kuvutuka, yo lunga ve.

Na Kati ya Yesu

Mono vandaka ntama
na Nzambi na masumu
Mono vandaka mbeni
Kansi bubu, kintwadi kele !

Mvutu :

Kinduku kele ! (3x)
Na kati ya Yesu !

Nzambi ke Mbote

Nzambi ke mbote !
Nzambi ke mbote !
Nzambi ke mbote !
Ke mbote na mono !

Nzambi Ta Wila Beto Mawa

O, Nzambi ta wila beto mawa
Na nlemvo nene na Yandi
Kana beto balula ntima,
Ndima mbi na beto !
O, wale, wale-wo
Wale, wale-wo

Wale, wale-wo
Matondo na Nzambi !

 **Tesa Mono**

Tesa mono
Tala ntima mono
Tesa ye meka
Mabanza na mono.

Tala kana mbi
Me kota na mono
Yobisa ye lolula
Mbi yonso !

Vutuka, Afrika, Vutuka !

Vutuka, Afrika! Vutuka !
Vutuka na Nzambi nge me vila
Beto bika bampeve yonso, biteki yonso,
Beto vutuka n’andi ya salaka beto !
Beto vutuka n’andi ya salaka beto !

 **Yezaya 53 :6**

Beto yonso, beto vandaka
kuyungana bonso mameme,
Konso muntu na nzila na yandi,
Mawa na beto !

Ebuna Mfumu Nzambi tulaka
Mbi na beto yonso na zulu
na ntu na Yandi, Yandi Mesia
Kiese na beto ! (wa-la-la-la !)
Kiese na beto !